

**NATIONAL ASSEMBLY OF  
SEYCHELLES**

*Tuesday 19<sup>th</sup> October, 2021*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab e bonzour nou telespektater e oditer ki pe swiv nou. Bon retour Onorab Loze apre en long labsans.

Bon nou ava konmanse avek travay pou sa semenn. En pti lesplikasyon lo nou *Order Paper*. Nou'n bezwen sakrifye, parey zot in vwar lo *Order Paper* nou'n bezwen sakrifye *regular Question Time* sa semenn, akoz nou ti anvi pran Mosyon ki ti la depi lontan.

E osi i annan en Mosyon ki'n anmennen par Onorab Esparon lo lapar *Women's Caucus* ki *timely* e son levennman i tonm ozordi. So nou'n anvi pran sa. E se pou sa ki nou pe osi mon pe *suspend Standing Order 25*, pou nou kapab pran Mosyon ki nou annan *notice* avan ki nou pran *Bills* parey normalman i leka.

So avek sa nou pou konmans avek *First Reading Public Bill* Madanm Clerk.

**MADAM CLERK**

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. *Bill* ki pe ganny prezante *Companies and Associations (Interim Measures) Bill, 2021*.

*This Act may be cited as the Companies and Associations (Temporary Measures) Act, 2021.* Mersi Mr Speaker.

**MR SPEAKER**

Mersi Madanm Clerk. Nou ava kapab pas lo *Private Notice Question*, madanm raporter ou ava apel Minis Antony Derjaques.

Nou letan ozordi i vremen *tight* avek sa bann biznes ki devan nou. Me nou pou sey termin pou 10er edmi akoz *Women's Caucus* zisteman annan en pti seremoni ki zot in kalifye dan *lobby*.

Bon bonzour e byenveni Minis Antony Derjaques Minis pour Transpor e bonzour e byenveni egalman Mr Alain Renaud *Principal Secretary for Civil Aviation Ports and Marine* e Mrs Magalie Isaac Direkter

*Policy and Strategy* dan Sekretarya sa Minister.

Nou konmans avek *Private Notice Question* Onorab Leader Lopozisyon. Onorab.

### **HON SEBASTIEN PILLAY**

Mersi Mr Speaker. Mr Speaker avan mon konmanse permit mon osi pou mon *welcome back* Manm lo mon kote latab - Onorab Loze - apre son long labsans. Nou tre kontan ki ou'n nobou kapab rezwenn nou dan Lasanble Nasyonal.

Dezyenmman Mr Speaker zis permit mon pou mansyonnen ki nou ti annan en *Urgent Question* ki nou ti'n table *regarding* sityasyon sa dife ki ti afekte *Le Chantier Mall*. Me parey ou'n eksplike pou rezon letan, me i pa'n posibil. E mwan mon napa loportinite pou anmenn plis ki en *PNQ*, akoz sa size ki mon'n anmennen osi la dan Lasanble i en size enportan.

So mon ti ava apresye ki si nou kapab pran sa Kestyon Irzan ki nou'n anmennen kantmenm semenn prosen, pou ki piblik ava kapab ganny serten lenformasyon lo la.

### **MR SPEAKER**

Wi Onorab. Mersi pou sa.

### **HON SEBASTIEN PILLAY**

Avek sa, mon ava demann Minis mon kestyon pou ozordi. Minis bonzour e bonzour avek ou delegasyon bonzour tou koleg Onorab e byensir bonzour tou dimoun ki a lekout.

Mr Speaker Gouvernman Sesel i sipoze annan en Lagreman avek en lakonpannyen *Travizory* kot si ou pe vwayaz Sesel ou bezwen fer en laplikasyon pou en lotorizasyon. Eski Lasanble i kapab ganny detay lo :-

Konbyen sa lakonpannyen in fer konman reveni depi ki sa lagreman i an fors?

Ki sa lakonpannyen in kontribye direktman konman reveni pou Sesel?

Vi ki sityasyon *COVID* pe amelyore dan lemonn, kot plizyer pei pe ouver lafrontyer avek Sesel, eski sa laranzman avek lakonpannyen *Travizory* i ankor relevan? E ki kalite *feedback* eski Gouvernman in gannyen depi sa lagreman i an fors? Mersi Mr Speaker.

### **MR SPEAKER**

Mersi pou ou kestyon Onorab. E Minis mon ava envit ou pou larepons.

### **MINISTER DERJAQUES**

### **ANTONY**

Mersi Mr Speaker. Bonzour tout a kout, bonzour *Leader of the Government of Business*, bonzour Onorab *Leader of the Opposition*, bonzour tou Onorab.

Mr Speaker o konmansman 2020 lemonn antye enkli Sesel in ganny frape sa pandemik *COVID-19*. An rezilta sa Sesel i bezwen rod en fason pli fezab pou fasilite touris kontinyen antre dan pei, e reouver lekonomi. Pou vwayaze konmela i en nesesite Servis Lasante Piblik pou prodwir en test *PCR* ki negatif.

O komansman Seselwa ek viziter ti bezwen *email* Lotorite Lasante Piblik direk, e esper en peryod 24erdtan *minimum* avan ki zot ti kapab resevwar lotorizasyon par *Public Health Authority*.

Sa prosedir a sa letan ti ganny fer a faz. Apre ki ou'n resevwar sa lotorizasyon par *email* ou ti osi bezwen soumet en tes negatif van ki ou vwayaze e ankor kot sak *Airport*.

I ti pran omwen 3erdtan pou debarke, verifie e *process* sak *load* pasaze lo en avyon.

An plis, ners ek dokter ti osi bezwen fizikman prezan lo *Airport* dan zot *PPE suit* pou pran tanperatir tou vwayazer enn par enn, tyek sak *PCR* pou verifie si i otantik e sorti kot en

lopital ouswa en klinik ki'n ganny sertifye.

Lasante ti bezwen verifie tou konfirmasyon akomodasyon e re-tyek sa *email* lotorizasyon par *Public Health* pou fer sir ki napa okenn sertifika ouswa dokiman frod.

Mr Speaker, sa sistenm *Travizory* in ede retir sa prosedir mannyel e ede fer prosedir Lotorite Lasante Piblik bokou pli senp e pli vit avek sa nouvo teknolozi.

Sa sistenm in ede rezourd *Public Health*, ki i ti pe rankontre kot ti bezwen annan omwen 6 dokter e lezot *staff* medikal pou *process email* sorti kot tou bann dimoun dan diferan pei partou dan lemonn.

Le 25 Mars sa lannen, Sesel in kapab reouver son lafrontyer akoz sa sistenm ki an plas. E ase moman Sesel i parmi bann *leaders* dan lemonn an sa ki konsern teknolozi avanse, pou fasilite vwayaz enternasyonal.

Lannen prosenn *L'Europe* pe entrodwir en sistenm similer ki apel *ETIAS*. *L'Amerique* mwan prosenn an Novanm li i pe sey entrodwir sa sistenm *ETA* parey nou, savedir *Electronic Travel Autorisation*.

Mr Speaker an sa ki konsern reveni lakonpanyen *Travizory*, anba Lagreman

Gouvernman avek lakonpanyen *Travizory* Lartik 9 tou lenformasyon ki konsern finansman e kont sa lakonpanyen i konfidansyel e zis sa lakonpanyen ki kapab devwal son pozisyon finansyel.

Parkont anba Lalwa *Access to Information Act* No.4 2019 seksyon 22, tou lenformasyon ki annan pou fer avek en *third party*, parey lakonpanyen *Travizory* i konfidansyel.

E Gouvernman i bezwen protez lenformasyon e data eksepte si sa *third party* sa lakonpanyen i donn son konsantman pou devwal son bann finans i reste prive.

Nou osi kapab note ki a lafen sak lannen konman en lakonpanyen ki'n anrezistre anba *Companies Act 1972* isi Sesel, konman en lakonpanyen enternasyonal ki pe fer biznes Sesel, i pou bezwen prodwir son kont anyel ki ganny odite - *audited* avek *Registrar of Companies*.

E nenport manm piblik i kapab egzamin sa bann kont anyel. Alor Mr Speaker se avek regre ki mon bezwen dir avek Lasanble, ki a sa moman mon pa kapab devwal reveni lakonpanyen *Travizory*.

Me an Mars 2022 ler i soumet son anyel *accounts* avek

*Registrar* tou *MNA* enkli mon nou kapab rod en kopi e nou kapab soumet avek *secretariat* Lasanble Nasyonal.

Mr Speaker an sa ki konsern dezyenm kestyon, ki sa lakonpanyen in kontribye direktman konman reveni pour Sesel.

Mr Speaker ler bann fre ki *Travizory* ti sarze ti €45 par viziter, savedir depi Septanm 2020 ziska Me 2021, Gouvernman Sesel ti kolekte an tou apepre €1milyon 353mil 824 e 27 sou.

E tou sa larzan ti ganny ranmase par *Travizory* ki ganny anmase par *Travizory* i antre dan en kont ki ganny zere ant *Travizory* ek Minister Finans. Tou le de Minister Finans ek Transpor i annan akse avek sa kont.

Depi ler Gouvernman in reviz sa fre pou sorti €45 pou li vin €10 pou sak viziter, Gouvernman Sesel pa pe anmas okenn larzan avek sa sistenm *Travizory*.

Sa bann fre ki nou pe peye ansanm ek viziter, i kouver loperasyon e servis sa lakonpanyen.

Mr Speaker mon anvi port a latansyon Lasanble Nasyonal, ki an plis ki sa sonm ki ganny peye e direktman avek Gouvernman Sesel, *Travizory* i

fer donasyon avek *Environmental Trust Fund* e ase moman sa sonm i total apepre €250mil.

Sa i bann kontribisyon volonter ki sak pasaze lo avyon i fer ouswa i kapab fer.

Mr Speaker an plis ki sa *Travizory* i anplway 33 travayer Seselwa e parey tou bann lakonpanyen ki anrezistre Sesel, zot bezwen pey *business tax*, zot bezwen pey pansyon e *social security* pou tou zot *staff*.

Pou konklir lo kestyon No.2 anba sa lagreman tou lenformasyon e data ki ganny kolekte lo sak vwayazer i propriyete Sesel e ganny garde ant tou konfidansyalite.

Mr Speaker lo trwazyenm kestyon, vi ki sityasyon *COVID* pe amelyore dan lemondn plizyer pei pe ouver lafrontyer avek Sesel, eski sa lagreman avek lakonpanyen *Travizory* i ankor relevan e ki kalite *feedback*, eski Gouvernman i gannyen depi sa lagreman in an fors?

Son larepons Mr Speaker i *comme* swivan ;- mon fer rapel Lasanble ki sa sistenm lotorizasyon vwayaz ti nesese akoz *COVID-19* ki ti'n sezi lemondn boner 2020.

E Gouvernman ki ti la avan ti trouv li nesese apros *Travizory* pou ede fasilite obligasyon ek regilasyon *Public*

*Health Authority* e ki zot ti met an plas, ki tou dimoun ki antre Sesel, enkli Seselwa, pou bezwen fer bann test parey *PCR* e sa ti pou protez Lasante Piblik.

Tan ki lemondn i ankor san en pandemik *COVID-19*, pou annan en nesese ki tou vwayazer pou bezwen annan en kart vaksinyasyon e en tes *PCR* negatif pou li kapab vwayaze.

Menm pou anbank lo avyon lemondn atraver Lasosyasyon Lavyasyon Enternasyonal, i krwar ki bann demann strik lo Lasante Piblik pou kontinyen.

An plis ki sa Sesel pe osi devlop sa sistenm elektronik pou fer li vin pli avanse ki i deza ete pou ede fer ki nou annan en sistenm *travel* ki *seamless*. Par egzant a lavenir nou pa pou bezwen ranpli bann form Imigrasyon, *Customs*, *Bio-Security* e Finans e fizikman, akoz tousala pou'n fini ganny reponn dan ou laplikasyon elektronik, avan ki ou menm vwayaze.

Mr Speaker alor mon repons se wi *Travizory* i ankor relevan. Mr Speaker lo kote *feedback*, *feedback* ki nou Minister Transpor i resevwar i enkli premye Sesel i parmi premye dan lemondn pou kree en

tel sistenm tre avanse e modern.

Dezyenm Sesel in kapab ouver son lafrontyer le 25 Mars 2021, akoz sa sistenm teknolozi ki vreman avanse e in ede mentenir standar Lotorite Piblik, Lasante Piblik e sa ki konsern tou vwayazer.

Trwazyenm ki peyman i en pe tro ser, me selman dimoun i apresye sa rediksyon signifikan pou viziter sorti €45 ki'n ganny met an plas par Gouvernman oparavan. E pou li vin €10 la aprezan.

I annan Seselwa parkont ki ankor krwar ki zot pe demann *Travizory* permisyon pou antre dan zot pei. Ler nou eksplik zot sa regilasyon Lasante Piblik se sa Lalwa ki demande, ki sak viziter enkli Seselwa i fer en tes *PCR* avan ki zot antre dan pei, zot konpran ki sa i en nesesite pou protez lassante pep Seselwa kont *COVID-19*.

Mr Speaker, i nou loblasyon e devwar pou protez tou zabitan nou pei Sesel kont *COVID*. Mersi.

### **MR SPEAKER**

Mersi Minis. Nou ava pran kestyon siplemanter premye. Loter kestyon Onorab Pillay.

### **HON SEBASTIEN PILLAY**

Mersi Mr Speaker. Mr Speaker premyerman Minis ou'n dir avek nou ki zis ler sa lakonpanyen i *submit* son *annual financial return* ki ou pou konnen konbyen in kontribye an relasyon avek reveni pou pei. Akoz ou'n koz zis lo sa en milyon Ero ki sipoze donnen dan *Environmental Trust Fund*.

E osi mansyonnen ki sa konpanyen i sipoze pey *business tax*. So mon ti ava espekte ki ou ti ava annan lenformasyon lo ki kantite *business tax* ki sa lakonpanyen in peye ziska la, dan an term reveni pou Sesel ki nou sipoze pe gannyen.

Dezyenmman Mr Speaker Minis ou'n koz lo *feedback* e ou'n koz lo relevans sa lakonpanyen. Mon pe ganny en kantite konplent *from* en kantite Seselwa, ki pe *raise* bann *issue regarding* lafason bann prosedir ki zot bezwen fer pou zot kapab retourn par egzant dan zot pei.

Par egzant i annan sa €6 ki'n vin en konsern pou dimoun. Dezyenmman sa size kot si ou napa *WiFi* i annan dimoun i dir ou si napa *WiFi* i dan en landrwa kot napa *WiFi* i fouti. I pou aktivman en posib pou li kapab fer sa bann

prosedir pou li kapab retourn dan son pei.

So mon vwar i drol Minis ki ou, ou pa'n ganny sa bann *feedback* akoz i pe sirkile partou dan piblik.

So prenon kont sa bann konsern ki piblik i annan. E eski Gouvernman pou koz avek *Travizory* vi ki ou'n dir poudir sa lagreman i reste relevan ; - savedir lentansyon Gouvernman se pou mentenir li, e ou'n menm koz lo anplifye li. Si oule i pe al lo, akoz tou keksoz la pou al *online*, tou bann form pou al *online*.

E eski zot in mazine difikilte ki sa i kapab poze dan serten sironstans kot i dimoun napa akse avek *WiFi* ouswa *internet* pou zot fer sa bann prosedir?

E dezyenman, an relasyon avek sa bann *fees* ki pe ganny peye, mon vwar i en pe drol Minis eski vremen ou pa kapab dir nou konbyen sa lakonpanyen in fer si in nobou kontribye €250mil parey ou'n dir dan Fon *Environment Trust Fund*, akoz sa ti ganny *sort of en levy*.

Eski vremen Minis ou pa kapab dir nou konbyen sa lakonpanyen in fer *grosso modo* depi konmansman sa lagreman ziska la ziska ler ou

Gouvernman in vin o pouvwar? Mersi Mr Speaker.

### **MR SPEAKER**

Mersi Onorab. Minis.

### **MINISTER ANTONY DERJAQUES**

Mersi Onorab *Leader of the Opposition* pou ou bann kestyon. Mr Speaker, Minister i annan sa lagreman depi le 31 Mars sa lannen avek *Travizory*. Oparavan ti annan en *memorandum of understanding* depi le 15 Septanm, 2020 ant Gouvernman oparavan avek *Travizory*.

Be *Travizory* li i bezwen fer son *annual return* avan le 31 Mars lannen prosenn, pou sa lannen 2021. Alor se anba Lalwa kot ou bezwen pey ou *tax* ek ou fer ou *returns* avan le 31 Mars. Set akoz sa ki mon pe dir i annan en lobligasyon legal pou li montre son *accounts* ki *audited* avek lakonpanyen avek *Registrar of Companies*.

E apre i pou bezwen pey son bann *business tax*. Akoz malgre i en lakonpanyen ki anrezistre an *Suisse* in osi anrezistre konman en *foreign owned incorporated company* anba *Companies Act 1972* e i pe pey *tax*, pansyon, *Social Security* parey en lakonpanyen ordiner ki *incorporated* isi Sesel.

Alor akoz sa lagreman konfidansyalite e menm nou Lalwa *Access to Information* i protez *third parties* parey *Travizory*, nou bezwen esper sa Lalwa ki la ki viz lo tou sa lakonpanyen ki zot *annual return* i bezwen ganny anrezistre.

E *annual returns* i *accessible* avek tou manm piblik, nenport dimoun le 31 Mars i kapab al regarde e pran tou son bann pran sa *audited accounts* e tou sa ki'n gannyen, tou son bann *assets* i la.

Savedir mon ti ava demann en pe pasyans. Pa demann mon pou al kas Lagreman e al kont Lalwa. Be annou esper Lalwa ganny met an aplikasyon dan 5 mwan. E dan 5 mwan ou pou ganny ou larepons.

Mon kapab dir ou lo *Environmental Trust Fund*, akoz sa in ganny peye avek Lanvironnman. Alor mon annan sa direktman e sa i Gouvernman ki'n resevwar.

E mon'n kapab dir ou lo sa €1.3milyon akoz Minister Finans in resevwar e sa i pa en *third party* - i Gouvernman. Alor kot mon kapab donn ou sif Onorab, mon kapab mon'n donn ou.

An sa ki konsern prosedir ek *WiFi*. Mr Speaker nenport

Seselwa par egzantp ki al *Dubai, Abu Dhabi* e prezan nou pou al *Maurice* akoz *Air Seychelles* pe al *Maurice*. Nou pou al *L'Europe* akoz nou'n sorti lo *red list* e lemonn pe ouver avek Sesel avek louvertir *Airport* le 25 Mars gras osi *Travizory*. Partou ou pou bezwen anmenn swa ou *vaccination card* ouswa ou *PCR*.

Ler ou antre dan bann pei parey *Dubai*, ler ou al Lopital pou ou pran ou *PCR*, zot pa donn ou sertifika *hard copy* zot anvoy ou atraver en *email* lo ou telefonn. Pou ou resevwar lo ou telefonn ou pou bezwen annan *WiFi*.

E dan tou bann lotel, *guest house* i annan *WiFi*. E nou, nou en Seselwa nou bann Seselwa ki fyer modern nou avanse, nou tou nou annan en *smartphone*.

Solman i annan ki napa, mete bann granmoun ouswa bann pti zanfan. Be zot, zot *travel* toultan avek en dimoun ki annan akse avek en *smartphone* ouswa en *computer*.

Sa dimoun *as long as* ki avek ou, ouswa ou *trust* li i *download* ou paspor i *download*, i tir portre ou *PCR* apre i al lo sa sistenm i ranpli pou ou.

Savedir en granmanman, en granpapa ki pa konn *download* ek *upload* lo en



*smartphone* ouswa lo en *computer*, i kapab demann led avek so pti zanfan, ouswa son *partner*.

Ler ou al group i pa nesese ki tou dimoun i *upload*. En sel dimoun i kapab fer pou tou dimoun. Sa dimoun ki *upload* i kapab isi Sesel li. Ou mete ou *Dubai* zis ou tir portre ou *PCR* ki'n fini antre lo ou *smartphone*, akoz ou'n al Lopital ou'n al tir ou *PCR* ou'n al teste. Prezan sa lopital *Dubai* i anvoy kot ou. E i bezwen *email*.

Sa dimoun i annan akse ou *email* zis *download* i anvoy kot *Travizory* pou ou. Savedir ou menm ou kapab *rely* lo en dimoun pou fer pou ou si ou napa sa konesans ki mannyer pou ou ranpli en form lo en *computer*, ouswa lo en telefonn.

An sa ki konsern sa €5.4 mon bezwen fer zot mazine ki aswar 24 lo 7 a nenport moman i annan Seselwa sa 33 Seselwa pe travay zot, akoz ler ou, ou pe *travel* 2er bomaten, 3er bomaten ouswa minwi, zot, zot la zot e zot pe travay pou resevwar ou *phone call*, ou *email* pou *chat* avek ou, pou *text* ou pou ou kapab *facilitate* ou *travel*.

Mete ou ranpli en form pou *Australie*, e ou bezwen pa slo de *Airport*. E ou pe demann

*entry* ou pe demann *PCR*, zot kapab donn ou lenformasyon ler ou pas dan bann lot *Airport* par egzanp ou pas *Singapore*, ou pase ou pas lo *Dubai* pou vin Sesel ou pase.

E ler ou ariv Sesel ou'n fini ranpli tou bann lenformasyon i la. Prezan ki nou, nou pe ale nou pe al en *step further* nou. Akoz ler ou ariv Sesel nou'n fini annan en sistenm i pa ankor ganny met an plas, solman in fini devlope ki avek bann nouvo paspor ki'n fini met *on order* par Imigrasyon, i pou zis elektronik zis pou ou *walk through*.

Tou lenformasyon in fini ganny abzorb e tou lenformasyon in fini antre dan sistenm. Menm si ou dan mas sa teknolozi isi Sesel in fini devlope i rekonnnet ou.

Alors sa i nou *next stage*, kot zis ou Onorab ou desann ou annan ou sistenm lo ou *smartphone* avek ou fanmir, i kapab 4, 5 ou zis ou pas dan sa koridor lo *Airport* e ou ale ou anmas ou bagaz ou al kot ou. Ou pa bezwen ranpli okenn lot form, ni *Customs*, ni Imigrasyon ni *Biosecurity*, ni *Public Health*.

E ou *PCR* in fini ganny rekonnnet. Sa i lavenir *travel*. E mon pe sey fer zot mon pe anmenn a zot latansyon ki se an Novanm ki *L'Amerique* pe al

entrodwir en *Electronic Travel Authorisation System*.

E *L'Europe* in seye ek sa sistenm *ETIAS* i pa kapab i pe al entrodwir *hopefully* 2022. Nou nou'n kit zot deryer aköz nou'n annan sa korporasyon avek sa lakonpanyen. E nou premye an *L'Afrique*. Napa en pei lo kontinan ki annan sa sistenm.

Alor Mr Speaker mon vwar ki Sesel ankor enn fwa, in premye dan devlopman en proze ki'n nobou ouver *Airport*; ki nobou pran nou bann viziter sorti lo preski zero pou anmenn nou ozordi par lao 70poursan viziter konpare avek 2019. Mersi Mr Speaker.

### **MR SPEAKER**

Mersi. Onorab Pillay si ou kapab rod en klarifikasyon lo ou keston, permet en pe letan pou mon kapab pas en pe siplemanter lezot Manm. *Go ahead please*.

### **HON SEBASTIEN PILLAY**

Mersi Mr Speaker. 2 klarifikasyon senp. Premyerman, antretan ki ou pe koze la, i annan dimoun ki pe, ki pe *WhatsApp pe text* mwan, pe dir mwan, i annan sityasyon kot zot ti bezwen *call* kot Lopital pou zot kapab antre dan pei.

Sa in arive avek plizyer dimoun. So, eski ou pe dir ek

nou poudir Gouvernman pa kapab koz ek sa lakonpanyen pou *sort out* sa bann *Kings* ki sipoze annan dan sa sistenm, pou fer ki Seselwa pa pas atraver sa bann difikilte ki zot pas ladan.

Dezyenmman an relasyon avek sa size *biometric passport* ki ou pe nonmen, nou, nou konpran poudir anba koupir Bidze ki'n ganny fer, sa larzan in ganny retire.

E ou, ou dir nou poudir sa bann paspor, Departman Imigrasyon in fini *order*. So kan egzaktaman ki sa bann paspor pou ganny *rollout*?

Lefe ki ozordi Departman Imigrasyon napa sa larzan, aköz sa larzan in ganny retire anba Bidze Siplemanter, ki ti vin devan Lasanble. Mersi Mr Speaker.

### **MR SPEAKER**

Mersi Onorab. Minis.

### **MINISTER**

### **ANTONY**

### **DERJAQUES**

Mersi Mr Speaker. Bidze pou lannen 2022 pa ankor pas devan Lasanble. E ler Minis Finans i vin devan, sa i ava en pwen pou Lasanble demann li.

Solman mon lenformasyon e mon ankor mon annan en lot *meeting* avek Imigrasyon lo sa size le 28

Oktob, ki *PS* pe *attend* avek *PS* Volcere e sa pe ganny *chaired* par *VP*.

Tou sa bann size lo ki mannyer *DICT*, Imigrasyon avek sistenm elektronik ki nou pe koz lo la, i kapab may ansanm. E sa i osi enkli sa *biometric passport system*.

Akoz si nou pe al avans bokou pli vit dan sa *IT system*, e Onorab tou nou lekonomi 60 pousan i depan lo viziter ki enkli touris. Nou bezwen fer sa sistenm marse bokou pli vit, *seamlessly* parey mon pe dir.

E sa i nou vizyon dan Minister Transpor, pou fer *seamless travel*. An sa ki konsern, sa ki'n bezwen *call* kot Lopital, wi i kapab annan ki annan par egzantp ki mon konnen personnelman ti annan 2 dokter ki ti anvi antre dan pei sorti *Cuba* e zot ti pri *Ethiopia*.

Akoz zot sertifika, ti annan en kestyon, e kot Lasante ti pe verifye ki laboratwar an *Cuba*, lekel ki'n *issue* sa bann *PCR test certificate*? E ler mon ti *call* mon zofisye, zot ti koz avek Minister Lasante e nou ti rekonnèt sa bann sertifika.

Sanmenm sa sistenm i ede, ki si ou kapab dan ou salon ler ou'n sorti kot en klinik, ou kapab Lanmerik, ou kapab *Cuba*, ou kapab *Australia*, ou

kapab Kenya, ou fer, ou al *online* e ou *upload* ou *PCR*, bann dokter avek *staff Travizory* i kapab verifye. E i pa pou esper ou ler ou vin lo *Airport*.

Akoz konmela Onorab, bann avyon i vin tou le 45 a 1 erdtan, tou le 45 minit a 1 erdtan, Vandredi, Sanmdi, Dimans bomaten.

E parfwa ler en avyon i ariv pli boner, i annan ki bezwen reste lo avyon. E dan nou pti lasal *Arrival Lounge* zot pe *processes* sa *plain load*, sa avyon ki'n ariv 20 minit avan.

Be avek sistenm *Travizory*, sa tyek medikal i 30 segonn la. Zis pou met ou *mobile*, ou *scan*, ou pase. E si ou bezwen verifye fizikman, parey oparavan, i kapab pran pou en *plain load*, 3 erdtan parey oparavan.

E ou bezwen met sa bann dokter, sa bann *nurse* kot *Airport*. Alor toultan pou annan bann *backup* e pou annan *chaos* lo *Airport*. Akoz avyon pou arive, 5 avyon enn deryer lot, tou le 45 minit.

E a en moman pou annan 12 san dimoun pou ganny *process* dan nou pti lasal. E avek *COVID* sa i danzere. Alors zot pou bezwen reste lo zot avyon 3erdtan, 4erdtan, 5

erdtan, pe esper sa *process* mannyel lo *Airport*.

E sa pou fer ki zot pa pou vin Sesel. E si zot pa vin Sesel, lekonomi i *collapse*. Alor sa sistenm in ganny devlope, i pe dil avek sa bann problemn pratik. Alor mon rekonnet ki i annan bann pti problemn ki nou pe amelyore.

E Minister Transpor pe koz ek tou bann Lotorite, enkli *Customs*, Imigrasyon avek *Health* parey mon'n dir ou, pou anpes ki i annan okenn problemn avek okenn viziter ek Seselwa.

E alor mon repete Onorab *Leader of the Opposition*, ki ler ou *upload* e ou montre ou *PCR* avek dokter ek *nurse* isi Sesel, zot pe zis verifye ki ou annan en *PCR test* ki ou'n fer *within 72 hours*, i sorti dan en klinik ki ganny rekonnet ouswa dan en laboratwar e ou pa pe anmenn *COVID* Sesel.

E nou, nou bezwen protez pep Seselwa. Ou pa pe demann permisyon pou antre dan ou pei. Nou pe senpleman verifye ou bann dokiman *Public Health*. Mersi Mr Speaker.

### **MR SPEAKER**

Mersi Minis. Mon pou pran kestasyon siplemanter bann Manm, me mon pou pran sa

ziskan 9er 55. E i pou dan lord ki zot in lev lanmen.

Mon regrete si mon pa pou kapab pran tou, zot a konpran mon. Premye i ava Onorab Sandy Arissol e i a swiv par Onorab Waven William, si ou kapab met ou pare. Onorab Arissol.

### **HON SANDY ARISSOL**

Mersi Mr Speaker. Bonzour Minis avek ou delegasyon. Bonzour tou Manm a lekout e tou dimoun ki a lekout. Mr Speaker, mon ti a kontan remerisi Minis pou bann larepons ki ou'n donner.

Teknolozi ozordi i en lavi toulezour, e dousman, dousman i annan son bann difikilte ki i vin avek, parey nou'n tande e nou swete Gouvernman i ava aranze.

Be selman sa ki trakas mwan Minis, se lefe ki ladministrasyon avan ki ti entrodwir sa programm avek, parey ou'n eksplike zisteman pou *COVID*, mon en pe trakase.

Parske ou'n dir ek nou poudir Sesel pa pe ganny nanryen, me sa lakonpanyen ki pe gannyen.

Me mwan mon annan en dout, anvi ki ladministrasyon avan, mon pa tro krwar poudir, i bezwen annan en dimoun ki pe ganny en keksoz dan sa dil,

si in ganny fer par ladministrasyon avan.

Alor mon kestyon i vin, an vi ki Gouvernman, nou Gouvernman in fer redwir bann kou, mon ti a kontan demann ou si dan bann rev i ki zot pe fer koman Gouvernman, zisteman parey ou'n koz lo la.

Pou zot revwar en pe sa kou ki Seselwa i peye pou li rantre dan son pei. Nou pa ankor ganny en konpran, akoz mon bezwen peye pou antre dan mon pei e de plis mon Gouvernman pa ganny nanryen ladan, me en lakonpanyen prive, avek mon pa konnen lekel ki pe gannnen.

Mwan mon sel kestyon i sa, kan zot pou reviz sa, pou Seselwa kapab rantre dan son pei letan i *format* son bann zafer e san pey nanryen. Mersi bokou Mr Speaker.

### **MR SPEAKER**

Mersi Onorab. Minis.

### **MINISTER ANTONY DERJAQUES**

Mersi Mr Speaker. Mr Speaker ler nou pe reviz bann *fees* ki nou ti rev i an Me, par egzant pou sorti €45 pou tou viziter avek touris pou anmenn li 10, nou ti *revise* li, nou ti rev i li avek en bi pou ankouraz dimoun vin koman touris Sesel

e pou *lower the cost of travel*. Pou Seselwa, sa ki zot pe peye ki €5.4, i pou kouver fre *Travizory*.

Mon pe koz avek Minister *Tourism*, avek *Health* e avek *Travizory*. E si nou fer desann, mete par €3, pou fer li vin €3 dan plas €50, nou pou bezwen ogmant pou bann viziter par €3, fer li vin ar egzant €15 dan plas €10.

Sa i pou kouver bann fre Seselwa. E Seselwa i a pey, mete €2 ouswa €3. Be fodre ki Minister *Tourism* osi avek Gouvernman i satisf e ki sa pa pou dekouraz viziter.

Akoz osi viziter pa oule pey plis, par egzant pou antre Lanmerik, ou *travel*, ou *e-visa* i €7. *Canada* osi €7. I annan bann lot pei i plis.

Ki pe arive, partou dan lemonn, avek sa bann (*ETA*), *Entry Travel Authorization*, sakenn pe met bann pri. Kot i annan en gran popilasyon, zot kapab desann ba parey Sesel. Kot i annan pti popilasyon i menm ariv ziskan €50.

Alor ou pou war dan tou sa bann pei ki i pou annan sa dousman, dousman, selman Sesel, nou'n devlop parey mon'n dir, bokou pli vit. Alor, Onorab, *Chief Whip*, mon kapab sizer avek *Cabinet* ki nou fer tire

a pepre €2.5, fer li €3 pou Seselwa.

Selman mon pou bezwen azout sa 3 ouswa €4 lo tou bann viziter. E mon bezwen, espesyalman koz avek Minister *Tourism* pou gete si sa pou dekouraz viziter.

Akoz i dan lentere piblik e nou Nasyon, ki sa sif touris ki'n ariv par lao 70 pousan konpare avek 2019 i kontinyen. Alor mon pa oule kas sa stabilite e sa *increase* ki pe arive dan *tourism arrivals*.

Mon pou bezwen, *very, very cautious*. E mon a bezwen osi anmenn sa lo *Cabinet*. Akoz i telman enportan, i enkli Finans, Lekonomi, Lasante avek *Tourism*. Mersi Onorab Arissol.

**MR SPEAKER**

Mersi Minis, Onorab William.

**HON WAVEN WILLIAM**

Mersi Mr Speaker. Bonzour Minis avek ou lekip, bonzour tou dimoun ki a lekout. Mr Speaker mon kestyon i *comme swivan* ; - Minis ou'n dir poudir oparavan ti annan en *MOU* ti ganny sinyen.

E la ozordi nou annan en lagreman. E ou'n dir ki i annan €250mil ki ganny kontribye dan en *Trust Fund*. Mon anv i ki ou

eksplike si sa €250 i en, zis en donasyon, ouswa i dan sa lagreman ki pe ganny fer toulezan, ouswa i en *one-off*?

Akoz parey ou pe dir, se ki nou pa pe ganny preski tro bokou avek €10. So eski sa i annan en lobligrasyon pou pey sa €250 mil? Mersi.

**MR SPEAKER**

Mersi Onorab. Minis.

**MINISTER ANTONY DERJAQUES**

Mersi Mr Speaker. Eski mon kapab donn sans mon *PS Renaud* pou reponn sa kestyon.

**MR SPEAKER**

Wi, *PS* i kapab reponn, wi.

**PS ALAIN RENAUD**

Mersi Onorab pou sa kestyon. *No, the donations are voluntarily, it continues. And each month we get about €30 thousand from donations, and it's very fixed. We have tourist who pays €10, €20, €50, and about every other month, we have a few tourist who pays €500 in voluntarily donations.*

*So it continues. And the €250 thousand Minister told the Assembly is the cumulative total that we've had since September.*

**HON SEBASTIEN PILLAY**

(Off-Mic)  
Mr Speaker.

**MR SPEAKER**

Yes?

**HON SEBASTIEN PILLAY**

(Off-Mic)

**MR SPEAKER**

Yes thank you. Thank you PS.

**MINISTER ANTONY  
DERJAQUES**

Mr Speaker eski mon lot zofisyé Mrs Isaac osi i kapab kontinyen lo menm laliny e reponn en pe sa kestyon?

**MR SPEAKER**

Mrs Isaac ou annan keksoz pou azoute?

**DIRECTOR POLICY AND  
STRATEGY MAGALIE ISAAC**

Bonzour Mr Speaker. Bonzour tou Manm Onorab. Parey PS Renaud in eksplike, sa sonm €250mil i vin par bann baz volonter, ki i pa zis touris ki'n kontribye, me i annan Seselwa.

Mon krwar pli gro sonm ki'n ganyen dan sa donasyon i €500, ki mon krwar i annan apepre 8 dimoun in fer sa kontribisyon. E an plis osi nou vwar poudir ki i annan Seselwa

osi pe fer sa kontribisyon volonter.

E sa 1.3milyon ki Gouvernman ti resevwar oparavan, li i sa larzan ki *well* sa kou ki ou peye, sa fre ki ou peye, ki sa larzan in *amount to* sa. Sa €250 i zis pou sa kontribisyon volonter. Mersi.

**MR SPEAKER**

Mersi Mrs Isaac. Onorab Gill.

**HON CHURCHILL GILL**

Mersi Mr Speaker. Bonzour Minis ek ou delegasyon. Bonzour tou Manm.

Minis mon premye kestyon, vi ki i annan rediksyon dan bann ka *COVID worldwide*, eski ou kapab dir nou ki dirasyon sa lagreman silvouple?

Mon dezyenm kestyon, vi ki nou konnen kan ki nou ti antre dan *MOU* avek lagreman, eski nou konnen depi ler nou'n antre dan sa *MOU* ek lagreman, ki kantite *arrival* ki'n antre dan pei? Mon dezyenm.

Aprè mon dernyen, vi ki parti kestyon i koz lo reveni ki *Trip Advisory* in anmase e ki Lasanble pa'n kapab ganny sa larepons. Mon krwar si nou fer en legzersis kot nou deza annan sa larepons, aköz nou konnen kan nou ti antre dan lagreman.

E si ou kapab reponn mon dezyenm kestyon, kot ki kantite *arrival* nou'n gannyen depi nou'n antre dan lagreman ek *Trip Advisory*. Otomatikman nou pou kapab konnen konbyen sa konpanyen in kapab anmase.

Nou'n ganny en lesplikasyon. (Mon dernyen Mr Speaker) nou'n ganny en lesplikasyon ...

**MR SPEAKER**

Tro bokou kestyon Onorab, les en pe kestyon pou lezot. Mersi kontinyen, fini.

**HON CHURCHILL GILL**

*Yah*, mon dernyen kestyon, se vi ki nou pa konnen dapre lesplikasyon, nou pa konnen kantite *Trip Advisory* in anmase, ki mannyer nou pou kapab konnen sa R1.3milyon ki nou'n gannyen i ti egzakteman sa ki nou devret gannyen pou pei? Mersi.

**MR SPEAKER**

Mersi Onorab. Minis ou a kapab adres sa bann kestyon.

**MINISTER ANTONY DERJAQUES**

Mersi Mr Speaker. Mr Speaker mon a komans sa larepons avek limero 3. Parey mon'n dir dan mon

lentrodiksyon, sa kont, tou lede *Travizory* avek Gouvernman Sesel i annan akse *day-to-day* lo nou *computer*.

Par egzanp *PS* Renaud i annan akse imedyat, zis i met son *code* e i regarde toulezour kwa ki pe antre. Toulezour, i war sa *live* lo son *computer*. Kot Finans i annan son Minis e i annan son *SS* Payet.

Alor i annan 3. Mwan osi mon annan *code*, selman mon pa al gete mwan. Mwan mon Avoka mon pa tro get finans. Ki i arive alor, i annan sa sif ki toulezour nou kapab gete. E nou konnen egzakteman lekel ki'n pey kwa.

Parey *Travizory* i annan akse, nou, nou annan akse. E sa akse i *day-to-day*. Parey ozordi si sa 3 zofisye i anvi gete, zot kapab konn egzakteman. Parey mon dir, sa *account* i *accessible*. Tousala i *computerize* e nou pe servi teknolozi.

An sa ki konsern viziter ki'n antre dan pei, ki'n pas atraver *Travizory*, mon kapab dir wi, 2020 ti annan 114 mil viziter ki ti vin Sesel pou lannen antye.

Be ant Septanm 15 ziskan le 31 Desanm, mon pa konn egzakteman, e mon pa kapab dir ou konbyen ti Seselwa, ki ti pey, alors €5 e viziter ki ti pe sa



€45. Mon pa pou kapab dir ou, akoz mon pa'n vin pare pou mwan dir ou.

An 2021 sa lannen, 2 semenn pase nou'n fini sot 115 mil viziter ki'n antre dan pei. E tousala in bezwen pas atraver *Travizory*.

An sa ki konsern *Travizory* an plis ki bann ki antre, i annan bann osi ki sorti. Alor i en *formula complex*. Sa i ganny kalkile par bann *auditors* ek bann *accountants*. E sa enn se Minister Finans ki annan akse.

Nou, nou annan akse akoz nou the *parent company* e nou ki'n siny kontra. Selman se Finans avek *Travizory* ki zour an zour, ki regard sa bann kont. E sa larzan i ganny peye kot Minister Finans, pa kot Minister Transpor.

Alor mon demann zot pou annan en pasyans osi dan lafen Mars, le 31 Mars, i sipoze annan sa bann *annual accounts*, ki pou dir zot egzaktaman ki *profit and loss Travizory*. Mersi Mr Speaker.

### **MR SPEAKER**

Mersi.

### **HON CHURCHILL GILL**

*(Off-Mic)*

**MINISTER** **ANTONY**  
**DERJAQUES**

Mr Speaker anba sa lagreman, lagreman i pou 10an, selman nou'n met en *termination notice* 6 mwan avek *no fault basis*.

Savedir menm si napa okenn fot, okenn *breach*, avek 6 *months' notice*, nou zis ekrire, nou kapab *terminate* sa lagreman. Solman lagreman pou donn stabilite i pou 10an.

Ou'n dir Onorab, ki *COVID* pe redwir dan lemond. Be 2 zour pase *Russia* in ganny plis ki mil dimoun ki'n mor e plis ki 34 mil dimoun ki'n ganny enfekte. E sa 2 *chiffres* i pli o depi ki *COVID* in frap lemond, boner 2020.

Avek bann varyan, ou pa konnen ki pei pou ganny atake, ler i reouver si *COVID* pou re antre. E lemond antye, par egzanz bann pei ki pe devlope, zot estimen zis ant 2 a 3 poursan popilasyon in ganny *vaccinate*.

I annan bann pei parey *Rumania*, semenn pase, e li i Lerop li, *Rumania*, zis 33 poursan son popilasyon in *vaccinate*.

Alor pti pei Sesel ki depan lo viziter ek lo touris sorti partou dan lemond, enkli *Russia* ki dan en kriz *COVID*, nou bezwen en sistenm kot avan zot pran sa avyon, avan zot anbarke, nou verifie zot

*health status* atraver zot *COVID vaccination card* e osi zot *PCR*.

Pou fer sir ki personn pa anmenn okenn nouvo varyan ouswa *COVID* pou enfekte nou popilasyon. Ou dezyenm keston Onorab, se ankor enn fwa ou'n demann konbyen viziter, e mon krwar mon'n reponn. Mersi Onorab.

**MR SPEAKER**

Mersi Minis. Mon regrete, mon pou termin sa sesyon keston la pou nou pas lo lezot Biznes. Mon remersye Minis avek son delegasyon pou zot partisipasyon e mersi.

***(MINISTER DERJAQUES AND HIS DELEGATION WAS EXCUSED FROM THE HOUSE)***

**HON WALLACE COSGROW**

*(Off-Mic)*

**MR SPEAKER**

Onorab Cosgrow mon sipoze nou a permet Minis avek delegasyon sorti silvouple.

**HON WALLACE COSGROW**

*(Off-Mic)*

**MR SPEAKER**

Wi Onorab, be ou pa le sel, mersi.

**HON WALLACE COSGROW**

*(Off-Mic)*

**MR SPEAKER**

Wi Onorab, be ou pa le sel, e permet mwan eksplike, ki nou fer *Order Paper* ansanm avek bann *Leaders* Lasanble, e nou dakor ki kantite letan pou donner pou sak sesyon.

E rezon letan, malerezman i an deor mon lanmen, mon pa kapab fer li en lastik ki mon redi. Mersi. Si nou bezwen reviz sa prosedir, silvouple apros *Leader* ou *Caucus* e nou a regarde ki mannyer nou pou fer. Nou pou pas –

**HON SEBASTIEN PILLAY**

*(Off-Mic)*

**MR SPEAKER**

Wi Onorab Pillay mon'n ...

**HON SEBASTIEN PILLAY**

Wi Mr Speaker, be selman ler ou dir ou'n diskit ek bann *Leaders*, nou ti'n agree ki ou pou al ziskan 10er nou. Ou ki'n deside bomaten 9.55 ...

**MR SPEAKER**

... non-non-non-non-non, nou ti dir nou pou diviz sa sesyon ant sa 2 *item* ...

**HON SEBASTIEN PILLAY**

... *ok* ? *Alright*, koumsa i ete li. Akoz i paret mwan poudir sak fwa nou'n agree en keksoz, apre ou vin dan Lasanble nou dir en lot keksoz ...

*(Interruption)*

**HON SEBASTIEN PILLAY**

... *ok* ? Annou arete sa en?

*(Interruption)*

**MR SPEAKER**

Non.

**HON SEBASTIEN PILLAY**

Mon pa kontan ditou sa!

**MR SPEAKER**

*Out of order* Onorab Pillay. Pa vre! *Ok*, nou pou pas lo prosen *item* e sa,

*(Interruption)*

**MR SPEAKER**

Mersi, mon a ganny silans silvouple.

Nou pou pas lo prosen *item* e sa se Mosyon prezante par Onorab Esparon, ki i en Mosyon ki'n prepare par group Madanm dan Lasanble lo tou lede kote.

E sa, sa Mosyon i an relasyon, i ale avek en lazournen ki pe ganny selebre ozordi, e sa se Lazournen pou

*Breast Cancer*. Onorab Esparon, mon a envit ou pou prezant ou Mosyon.

**HON REGINA ESPARON**

Mersi Mr Speaker. Bonzour tou dimoun a lekout. Mosyon ki mon pe met devan sa Lasanble pou aprouvasyon i lir koumsa.

An vi sa gran logmantasyon dan lakantite ka kanser ki pe ganny detekte lo trwazyenm staz, sirtou kanser tete ki pe afekte bann madanm, sa Lasanble pe demann Gouvernman, atraver Minister Lasante pou anbark lo en programm agresiv pou detekte bann ka boner ki ava sov lavi.

Mr Speaker sak lannen, mwan Oktob i ganny dedye koman *Breast Cancer Month*. Sa ki bokou lorganizasyon i apel *Pink October*. E Oktob i sa mwan ki ganny servi pou fer konsyantizasyon e sansibilizasyon lo kanser tete.

I annan en lot mwan ki Zanyve, ki li in war sansibilizasyon pou lezot ka kanser. E lefe ki kanser i en size ki konsern tou Seselwa, mon santi ki nou rol koman Manm Lasanble pou diskite sa size ki pe afekte tou kours nou popilasyon e pe vin en konsern nasyonal.

Mr Speaker, mersi pou donn nou sa loportinite pou anmenn sa Mosyon e sezi sa lokazyon pou nou raport nou sipor pou travay ki Minister Lasante sirtou *Oncology Unit* ek *Cancer Concern Association* pe fer an sa ki konsern kanser.

E pou nou osi montre nou solidarite anver tou dimoun ki pe soufer ek sa maladi, sirtou bann madanm ki pe erite ek kanser tete.

I kler ki ozordi, plis ki oparavan, bokou nou bann madanm Seselwa, i vwar zot fas a sa maladi. E dan bokou ka ler ki sa maladi i ganny detekte, i lo staz avanse, e sa dan li menm i port en menas lo lasante sa dimoun.

Fodre osi note Mr Speaker, ki in annan anviron 208 ka kanser tete dan Sesel an se moman. E bann dernyen statistik i prouve ki kanser pe kontinyelman afekte bann madanm, dan tou kategori laz.

Sirtou dan bann laz reproduksyon e osi par lao 75an. Zis pou war enn de. Ant 30 a 34an bann dernyen lannen, in annan 9 ka.

35 a 39an - 15 ka.

40 a 44an - 16 ka.

50 a 54 - 34 ka.

55 a 59 - 30.

60 a 65 - 20.

70 a 74 -10 ka e par lao 75an - 31 ka.

E sa dernyen 4an, 4 a 5an in annan an tou parey mon'n dir 208 ka. E dapre statistik en gran mazorite sa bann madanm i dan laz 30 a 50an. E sa group madanm i osi bann ki dan laz lanplwa.

I annan ki en manman tousel ek detrwa zanfan, kot i war li pa kapab kontinyen debourye e pe bezwen viv lo lasistans medikal ki pa ase pou fer 2 bout zwenn.

Petet la osi nou bezwen regarde, dan bann ka koumsa, e gete kwa ki kapab ganny fer pou soulaz zot sityasyon. E par konsekans sa maladi, kot i bezwen fer *chemo*.

Sa prosedir tretman li menm i long, e kot sa pasyan i vwar li bezwen ale vini kot dokter, oubyen pran en gran konze dokter.

E sa i afekte son prodiktivite dan travay e annan de ka kot i kapab anmenn bokou defi pou li lo nivo familyal, sirtou dan bann ka kot i pa pe ganny sa sipor kot lakour.

Swa si i annan en manman ki dan son zennaz e zanfan i ankor pti. Parey sa madanm Praslin ki koz ek mwan tanzantan. Mon konpran ki ou pe pas ladan. Mr

Speaker, fodre nou osi note ki i annan sa problemn stigmatizasyon ki zis madanm ki ganny kanser tete.

Me sa i pa le ka. Isi Sesel an se moman, statistik i prouve ki i annan 4 msye ki'n ganny *diagnose* ek kanser tete. Se pou sa ki sak Seselwa i devret santi li konsernen par sa maladi, e konsyantizasyon i devret ganny fer lo tou nivo.

Si ozordi ou pa pe ganny afekte, demen i kapab enn ou zanmi pros ou en Manm fanmir. Mr Speaker ozordi nou annan *Cancer Concern Association* ki en lorganizasyon non-gouvernmental ki pe fer son mye pou ed bann pasyan ki ganny kanser.

E fer enn de program sansibilizasyon lo demann. E kot zot osi annan en program *counselling* e ede soutenir bann viktim tel koman ek en fos tete, pou re aranz zot laparans e menm fos seve pou bann ki napa mwayen pou aste.

Parski *side effect chemotherapy* i fer ki zot perdi zot seve. Me ek sa sityasyon *COVID* nou'n vwar kot zot aktivite in *slow down*. E nou espere ki sa *downward curve* dan kantite ka *COVID* zot a kapab rebran dousman, dousman.

Me mon santi ki i annan demann pou plis sa bann kalite lorganizasyon, pou donn sipor bann madanm ki pe ganny afekte ek kanser tete.

E malgre sa, bokou pasyan i dir ou ki lasosyasyon i parfwa anmenn serten soulazman pou zot.

Me osi bezwen admet ki i annan ki dir ou, zot pa konnen ki mannyer pou ganny kontak, oubyen pa konnen lekel ki sipoze pe met zot an kontak avek *Cancer Concern Association*.

Mr Speaker atraver sa Mosyon, mon pe osi lans en lapel ek Minister Lasante, pou anbark li lo en program sansibilizasyon pli agresiv, pou ankouraz plis madanm pou vin devan.

I enportan pou ranforsi bann program sansibilizasyon ki deza la pou tous tou kours nou popilasyon e komans a en pli ba laz. Parski statistik i osi endike ki madanm ant 25 a 29 an i osi ganny afekte ek kanser tete.

Fodre plis lanfaz i ganny mete lo prevansyon, e regard bann *risk factors*. Tel koman ladyet ki nou konsonmen. Bann prodwir ki ganny modifye e stil lavi eksetera.

Mr Speaker in ler pou nou osi koman en pei pran bann

desizyon ki brav e komans mazin dan bann demars pou ban serten prodwir tel ki bann prodwir ki annan *trans-fat* ladan.

Akoz resers in montre ki *trans-fat* i enn bann lakoz kanser ki pli mazer atraver lemonn. Ozordi i annan pei parey *Bulgaria*, *Federal La Russie*, Larnemi ki'n komans bann *ban* sa bann prodwir.

E nou osi koman en pei nou devret pe fer refleksyon dan sa direksyon e ankouraz bann enportater, pou rod sa bann prodwir ki annan mwens sa kalite lagres.

Standar i dir ki i tonm par anba 2 poursan. E pou sa arive i enportan ki i enportan ki i annan sa kolaborasyon ek Seksyon Nitrisyon kot Minister Lasante ansanm avek lezot partner e sekter konsernen parey *SBS*, pou fer sir ki bann prodwir ki antre dan pei, ki poz en risk pou lasante popilasyon an zeneral pa antre.

Mr Speaker i enportan ki i annan program ki byen ankadre, pou ede dan sa lalit kont kanser tete. Alor mon sizere ki Gouvernman, Sosyete Sivil, Lasosyasyon ek bann lezot *partner* i antre an partenarya ek bann lakonpanyen tel konman telekominikasyon ki ofer bann servis nimerik ek medya sosyal,

pou ede propaz bann mesaz sansibilizasyon atraver nou popilasyon.

E atraver Minister Ledikasyon, nou osi kapab inisye bann program *screening* mandatwar dan pos-segonder, pou ki i ava annan evalyasyon kontinyel, konmansman dan lekol, depi ki zot komans devlope pou vin en adilt pou detekte kanser.

Petet toulezan atraver en program entegre avek Minister Lasante, espesyalman bann zanfan ou zenn adilt ki sirtou ler zot fanmir i annan en listwar kanser, bann ki montre bann pli *exposing factor*, tel koman lobežite.

Met lanfaz ki mannyer pou servi bann tel platform. Tel koman tele *medicine*, medya sosyal, pou ganny bann lenformasyon ek konsey pozitiv e sa ki a ot risk i ava ganny en sans ek loportinite, pou ganny swiv par bann eksper dan sa domenn.

Ganny tretman boner, e sa a ede inisye tretman boner e anpes perdi lavi. Mr Speaker *X-ray* se pou osi war ki pli tar *Clinic Oncology* i ava annan son prop laboratwar ki ava atase avek sa *unit*.

Akoz ler nou ti vizit laba detrwa letan pase, nou ti vwar ki bokou tes i bezwen al ganny

fer dan *main* laboratwar e i pran bokou letan.

E la ek sa sityasyon *COVID*, mon mazine ki presyon in double par annan zot prop laboratwar kot *Oncology Unit*. Sa i ava osi redwir presyon lo laboratwar santral e rezilta a vin pli vit.

Mr Speaker nou bezwen donn plis lankourazman *staff* ki travay kot *Oncology* e *train* plis ners pou travay ek sa *unit*. Ozordi pli gro konplent se ki i mank profesyonnel kalifye pou ede dan sa *unit*.

Annou ofer en bon *retirement package* ki pou ankourazan pou ki plis dimoun i vin travay ek sa *unit*. Akoz plis ki i annan pasyan ki pe ganny *diagnose* e ki bezwen tretman, plis i pou annan demann pou mendev kalifye.

E koman en Lasanble, annou salye sa gran zefor ki bann ners ek lezot sipor *staff*, *support staff* kot *Oncology* pe fer, par donn zot en gro lanmen. Mr Speaker sa ki bokou dimoun pe demande ozordi, se akoz ki nonm kanser i ogmante?

Eski Minister Lasante in fer en letid a profon pou rode ki bann keksoz ki *trigger* kanser dan imen. I annan ki dir delo ek sa zafer klorin ladan i kapab en lakoz.

I annan ki dir bann keksoz parey desalinasyon, asbestos si i ganny brile, *mosquito coil*, *insecticide*, sigaret, bann lavyann enporte ki kontinyen, antibyotik.

Legim ki'n ganny *spray* ek *insecticide*, *wielding*, karbonn sorti dan transpor ki servi *inedible fuel*, ki zot prezimen ki ler i brile i vin *cancerous*. Delwil rafinen ki si ou fri pwason ladan detrwa fwa, i prodwir en kemikal ki *cancerous*.

Sa bann keksoz ki dimoun i spekile. E napa en letid profon ki'n ganny fer pou prouve. Mon ti a swete ki Minister Lasante i anbank lo en program resers e fer en letid pou konfirman, si vreman sa ki pe ganny spekile, si vreman sa ki pe ganny spekile i vre.

E koumsa si i vre, nou ava kapab anbank nou lo en program prevansyon e konsyantizasyon. Mr Speaker par kont i annan en resers ki ti ganny fer par Dr Emilie Stroff detrwa lannen pase. Ki'n arive avek?

Ki'n arive ek sa rezilta ki'n ganny prodwir? Eski Minister Lasante in *follow-up* lo la? Me levidans i annan ki bokou ka kanser i osi erediter. Mon konn omwen fanmir kot papa in mor ek kanser prostat.

Sa in swiv 2an apre, par garson avek kanser *trip*. En fiy ek kanser poumon, manman in mor avek kanser kolmatris. En lot garson lannen pase in fek ganny *diagnose* avek kanser, detrwa mwan pase. Malerezman in kit nou.

Eski dan bann ka parey, lezot manm fanmir pa devret pe ganny en *screen* e anbark lo en program swivi regilye. Akoz zot *medical history* pe deza montre ou ki kanser i kapab erediter.

Alor nou bezwen protez sa zenerasyon ki reste. Kestyon, ki kalite program *screening* ki Minister Lasante pe fer dan bann ka parey? Pou lezot manm sa fanmir, pou detekte si dan zot lekòr napa sa selil ki komans devlope, devlop an kanser e ofer zot tretman boner?

E pou bann ki lo *border line*, ofer zot swivi regilye. Mr Speaker ti pou osi bon si Minister Lasante ti osi kapab ofer bann program *screening* parey *Euro Medical* pe fer dan bann program ki zot apel *A to Z* an kolaborasyon avek Lopital *MIOT*.

Ki li osi Minister Lasante ti a kapab anbark lo enn sa program parey kot i ti a ofer sa *screening* kot Minister Lasante, kantmenm 2 ou 3 fwa par

lannen. Ozordi i osi annan sa tes ki apel *tumor marker*.

Kot en santiyon disan i kapab ganny pran pou teste pou *trace of cancer cells* oubyen *tumor cells* dan ou disan. E apre *follow-up* i ganny fer lo baz ki, lo bann ki nesese.

Petet sa osi ti a kapab ganny fer pli regilye lo bann dimoun ki annan *family history*. Ek sa detrwa mo Mr Speaker, mon remet sa Mosyon devan Lasanble pou aprouvasyon. Mersi.

### **MR SPEAKER**

Mersi. Mersi Onorab Esparon. Onorab Vidot pou segonn Mosyon.

### **HON AUDREY VIDOT**

Mersi Mr Speaker. Mon segonn Mosyon, avek ou permisyon si mon kapab ganny laparol.

### **MR SPEAKER**

Mersi. Onorab Vidot, lalis enterven an lo sa Mosyon in ganny programmen par Komite group ki'n prepar sa Mosyon. E zot in donn mwan en lalis. E zot in program 3 minit par enterven an.

Fotespere zot kalkilasyon i byen. Mon pou swiv lalis ki zot in donn mwan. Onorab Vidot eski ou pou adres Mosyon la?



**HON AUDREY VIDOT**

Yes.

**MR SPEAKER**

Ok, adrese silvouple.

**HON AUDREY VIDOT**

Mersi Mr Speaker. Mr Speaker, tou koleg Onorab, zabitan Roche Caiman e tou manm piblik ki a lekout bonzour.

Mr Speaker Leta i rekonnet drwa sak sitwayen pou ganny proteksyon pou son lasante e pou zourir en pli o nivo standar lasante fizik mantal ki posib.

Gouvernman presedan, *United Seychelles* pou plizyer lannen, in rod e met resours neserer dan nou sistenm swen lasante pou ki tou dimoun dan Sesel i ganny menm loportinite pou *attend* en o nivo lasante fizik, sosyal, mantal e spirityel.

Enn bann lakonplisman Sesel anba Gouvernman presedan dan nou sistenm swen lasante, se devlopman imen. Kot Sesel in form bann profesyonnel lasante kalifye e spesyalize.

Menm si Lartik 29 Konstitisyon Sesel i donn responsabilite Leta pou pran mezir, pou donn tou son sitwayen lasante primer gratwit dan bann lenstitisyon Leta.

E pran bann mezir apropiye, pou anpes tret e kontrol bann lepidemi e lezot maladi ki met a risk lasante nou pep.

I responsabilite Gouvernman dizour pou kontinyen batir, lo sa ki nou sistenm Swen Lasante in akonplir pou plizyer lannen e amelyor lo nivo lasante la popilasyon Seselwa par bann aksyon Polisi. E atraver bann stratezi pli ekspansif dan bann program prevansyon, kiratif, soulazman e abilitasyon.

Ozordi setyenm Lasanble pe anmenn en deba enportan pou kontinyen promouvwar e kiltir konpasyon ek swen, e met lanfaz lo responsabilite endividyel kot i konsern size lasante pou ankouraz bann bon latitud, pou viv a pli bonn sante e pou anpes maladi ki kapab ganny evite.

E an menm tan demann Gouvernman dizour atraver Minister Lasante, pou anbark lo en program agresiv, kot i konsern detekte ka kanser boner ki ava sov lavi e met lanfaz lo kanser tete, ki statistik in montre i tre alarman.

Mr Speaker i enportan ki Minister Lasante i sorti e fer piblik konnen akoz ki i annan sa gran logmantasyon dan kantite ka kanser ki pe ganny

detekte lo trwazyenm staz, sirtou kanser tete ki pe afekte plis nou bann madanm.

Eski bann servis ki'n ganny resevwar dan bann letan mezir pou adres COVID-19 in vin an plas, ki'n fer ki bann pasyan avek kanser pa pe ganny sa swen e sipor esansyel pou evite ki zot ka i vin agrave.

Eski bann lekipman pou tret bann pasyan kanser ankor pe an bonn eta? Eski Servis Lasante i annan lezot lekipman adisyonnèl, an ka enn bann lekipman i aret marse?

Ki plan Gouvernman pou revwar zot servis ki plis tes i ganny fer, pou sansibiliz popilasyon lo maladi kanser tete, e ki bann zonnm osi i pran sa size o serye, menm son statistik i bokou pli ba ki bann madanm?

Sa i parmi bann kestyon, ki mwan koman Vis-Chairman caucus nou bann madanm dan Lasanble ti pou demann Minis pou Lasante si i ti'n servi petet loportinite dan sa mwan Oktob pou vin elev konpanyi dan sa lalit pou detekte kanser boner. E pou eklersi konsern ki i annan lo bann lekipman ki swadizan pa marse.

Toudmenm nou bann Manm Lasanble, nou pou raport nou sipor pou bann profesyonnel Lasante dan sa

lalit, pou ankouraz popilasyon espesyalman bann madanm, pou fer zot tes boner, pou ki zot kapab ganny tretman boner e viv pli lontan.

Mr Speaker, souvandfwa ler nou al dan bann klinik, nou pa sezi loportinite pou pran bann kart lenformasyon ki donn bann gidans, bann bon gidans e proteksyon ki nou sitwayen i merit pran pou edik nou lekor lo bann diferan maladi e parmi se kanser tete.

Mon rapel dan sizyenm lasanble, dan bann aktivite pou siport konpanyi lo kanser tete. Mon ti ganny loportinite pou konn en pe bann senp prekosyon e gidans ki kapab ede amelyor stil lavi, prevansyon e detekte maladi kanser tete.

Souvandfwa nou pran li a la lezer pou bann aktivite fizik. Tel parey legzersis, 3 ou 5 fwa par semenn pou omwen 30 minit, ki ede redwir obezite. evite servi bann sibstans parey lalkol, sigaret e drog, regilyerman annan konsiltasyon avek dokter dan nou klinik, espesyalman si ou fanmir, i annan ki'n deza ganny kanser oubyen pe trete avek kanser tete.

Tou sa i trouve lo en senp pti papye, byen enformatif, pou nou kapab lir pou edik nou

lekor. Mr Speaker kanser tete i en maladi ki touye si ou pa detekte li boner e ganny swen neser pou trete.

Alor i responsabilite sakenn de nou, zonn ek fanm pou pran swen avek nou lasante atraver nou stil lavi e fer nou tes e swiv bann konsey e gidans profesyonnel Lasante.

Pou ki nou ganny swen boner e sov nou prop lavi. Me i responsabilite Gouvernman pou kontinyen ankadre nou bann Seselwa, ki montre lentere dan nou sistenn swen Lasante e ki servis Lasante i resevwar bann profesyonnel spesyalize.

Pa zis pou tret nou bann pasyan, me ki kapab mannye bann lekiman ki ganny servi dan tretman nou bann pasyan kanser tete.

Gouvernman i bezwen asir nou pep ki *screening test* pe ganny fer frekan pou dekouver, pou detekte boner si en pasyan pe devlop kanser tete.

Met lanfaz lo bann klinik ki pasyan, pe enport son maladi ki i vin avek, i ganny ankouraze pou fer bann *self-examination* koman en metod sansibilizasyon avek nou bann pasyan.

Met lanfaz lo psikolog pou donn sipor bann pasyan e menm bann fanmir pros ki pe pas dan leksperyans kanser

tete. Mr Speaker, mon oule sezi sa loportinite ozordi pou zwenn mon koleg Onorab Esparon pou felisit bann profesyonnel Lasante.

Sekter prive e bann Lorganizasyon Sosyete Sivil, ki ed Servis Lasante Piblik pou siport bann pasyan kanser e donn zot sa lespwar ki zot pa tousel.

Zot pa tousel dan sa lalit e pa zanmen per pou vin devan, pou rod sipor moral, dan sa letan ki zot pe fer fas avek en tel nouvel ki dokter i dir zot.

Akoz nou ki konn en manm fanmir ou ki konn sa zanmi ki'n pas dan sa move leksperyans i konpran sa traze. Mon koleg Onorab Esparon in tous en pe lo la. Lo sa not mon pou raport mon *full* sipor pou sa Mosyon. Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Desheila Bastienne.

**HON DESHEILA BASTIENNE**

Mersi Mr Speaker. Bonzour tou Manm Onorab e mersi tou Manm Onorab e osi tou bann madanm ki a lekout e ki pe viv avek sa sityasyon kanser, sirtou kanser tete.

Mr Speaker mon lentervansyon pou vin plizoumwèn dan en laform temwannayaz. Mwan Oktob sak lannen, i ganny dedye pou konsyantiz nou popilasyon lo danze kanser tete e lenportans al fer nou tes boner.

Ozordi Mr Speaker, koman en Madanm Lasanble, Komite Bann Manm, in donn mwan sa privez pou koz lo sa size kanser tete akoz mwan mon enn sa madanm ki'n pas atraver sa maladi e ki pe viv avek.

Atraver mon lentervansyon, ozordi mon oule partaz mon santiman ek mon senpati ek lezot madanm ki pe viv avek sa maladi.

Mon santi ki sa i ava donn bokou zenn fiy e madanm nenport laz e osi bann zenn garson ek msye, konfidans dan zot prop lekor pou zot konnen ki zot pa tousel.

Mon pe nonm tou sa bann diferan dimoun, akoz pandan letan ki mon ti pe fer mon bann tretman *chemo*, mon'n zwenn plizyer dimoun a diferan laz ki'n ganny *diagnose* ek diferan ka kanser.

E sa in fer mon realize ki sa maladi napa balizaz, e i pa swazir laz, ni ler, pti baba koman adilt i sibir son konsekans. Mr Speaker,

kanser pa en nouvel ki gou tande.

E mon panse ki i osi pa gou pou dokter anons sa nouvel ek son pasyan, e pli difisil i pa sitan fasil pou aksepte. E se pou sa ou war ki bokou dimoun i refize krwar la realite e viv dan *denial*.

Le moman ki dokter i dir ou tel nouvel, premye keksoz ki vin dan ou lespri, ou zis anvi dir li, non dokter, pa li sa, ou'n tronpe, fodre nou fer en lot tes. Oubyen ou mazin lanmor.

Sa bann tel reaksyon i normal, akoz sa mo 'kanser' li menm se en mo ki fer per, ki ou pa konnen son gravite e ou staz parfwa.

Mr Speaker depi mon lanfans ziska mon laz 58an, mon en dimoun ki pa'n fer okenn gran malad e mon'n toultan konsider mwan koman en dimoun ki en dimoun aktiv, an bonn sante.

Akoz mwan mon en dimoun ki kontan marse, fer legzersis, danse, frekante e sosyalize. E osi mon'n touzour annan sa zwa de viv e mon'n toultan pe ankouraz mon bann zanmi, zonn koman fanm pou toultan pran lavi pozitiv.

Mon pa ti pou zanmen krwar ki en zour sa maladi ti pou tap mwan. E ler dokter ti dir mwan ki mon ganny kanser,

sa ti sok mwan. E zis mon larm ki ti koule.

Ozordi mon temwannayaz se lafason ki mon'n sirmont sa maladi e pou mon raport mon sipor a tou bann dimoun ki pe viv avek kanser la deor. Mon parkour i konmans koumsa.

Mon ti al fer en *scan* pou en problem ki ti napa nanryen pou fer avek problem tete. Me malerezman ler rezilta ti sorti ti viz ver en siny dan mon tete e la dokter ti rekomande ki mon fer en *biopsy* pou konfirm sa rezilta.

I pa ni ti en boul, me i ti zis en *shadow*. Apre sa *biopsy*, la mon ti ganny sa move nouvel ki mon pa ti pe zanmen ekspekte. E dokter ti dir mwan ki mon bezwen fer loperasyon. Dan mon lespri pa sa ki mon ti anvi tande.

Apre en dezyenm tes ti ankor ki ti sorti pozitiv, la mon ti war mon dan en sityasyon difisil pou mwan al koz avek mon bann zanfan, mon fanmir, me mon ti napa swa. Akoz zot ti pe esper en rezilta avek pasyans, e sa rezilta sete pa kanser.

Mr Speaker mon remersye Bondye ki ti donn mwan lafors ek kouraz pou mwan asize e fer mon bann zanfan, mon msye, mon fanmir aksepte ki i enportan mon fer sa

loperasyon, pou mon prop byen.

E ki mon pou bezwen tou zot sipor pou mwan kapab fer fas avek larealite. Mon ti met pare pou admit Lopital avek sipor mon fanmir, mon ser, mon frer ek mon manman e osi mon bann pros.

Zour loperasyon, letan mon ti ouver mon lizye, mon ti mon tousel dan en lasanm. Mon ti santi mon normal, mon ti aksepte e mon ti met dan mon lespri ki tou in fini.

Alor prezan mon a swiv bann lezot tretman, tel ki *chemo therapy*, e radyasyon ki dokter ti'n fini koz avek mwan lo la. Malerezman sa premye loperasyon pa ti *successful*.

E apre ki dokter ti rekomande ki mon re-admit dan lesplas 8 zour e refer en lot loperasyon dan menm landrwa, alor mon ti dir li, mon pou bouze e mon pou al rod en lot lopinyon.

Dokter pa ti obzekte, i ti respekte mon desizyon. I ti siport mon, i ti pare pou donn mwan mon bann *notes*, mon ti fer tou mon demars e mon ti al *Chennai*.

Apre ankor plis tes entans *Chennai*, mon ti ganny apele lo *panel 15 surgeon* e tou dilon mon'n reste pozitiv. Akoz, mon

ti'n pare pou nenport kwa ki zot ti pe al dir mwan.

Aprè ki bann *surgeon* ti koz avek mwan e montre mon rezilta mon bann tes, Lopital *MIOT*, zot ti eksplik mwan ki mon pou napa swa, me perform en dezyenm loperasyon ki personn, okenn zenn fiy, okenn madanm pe ti pou *look forward* pou fer.

E mon ti ekspekte ankor, mon ti aksepte, mon ti met pare pou son lannmen bomaten.

Aprè mon loperasyon mon'n fer mon bann sesyon *chemo therapy*, e ant bann zour ki mon ti santi mon *ok*, mon ti vin travay isi dan Lasanble, akòz mon ti en dimoun ki pa ti krwar dan reste dan lakaz, reste lo lili e konsider mwan koman en dimoun malad.

Pandan mon bann tretman wi, mon'n ganny diferan sentonm, i pa'n fasil. Me se nou ki bezwen pran kontrol e met li ater.

Aprè ki mon'n fini mon *chemo*, mon'n retourn *Chennai* pou mon fer radyasyon e ozordi, mon ankor pe viv avek bann regilasyon Lasante. Mon bezwen swiv e kontinyen pran serten latizann e la mon'n fini pare pou mwan pran mon lavi normal.

Mr Speaker, ozordi nou pe komemor *Breast Cancer Day*,

en zour kot lemonn i konsyantiz popilasyon lo danze, lenportans detekte kanser boner, pou inisye tretman e sov lavi.

Mon'n tann bokou koze par bann *therapist*, bann psikolog lo lafason ki zot sipor pasyan avek kanser. Mon'n ekout psikolog koze pandan sa mwan.

Ners, dokter e osi annan en group apele *Cancer Concern*, parey loter Mosyon in mansyonnen pli boner, ki donn bokou sipor. Malerezman, mon pa'n zanmen ganny entrodwir avek sa group.

Mon pa'n zanmen ganny refer avek okenn *therapist*, ni psikolog. Pandan mon parkour, mon'n ganny en koze avek mon dokter ki ti swiv mon depi komansman, oper lo mwan, e sa se Dr Telemaque ki mon pou remersi li ozordi.

Apard mon fanmir, mon ser, enn de zanmi, enkli zanmi dan Perseverance mon distrik, Prezidan Larepublik ek mon bann koleg Onorab isi dan Lasanble tou lede kote, mon pa'n war personn ankor, ni okenn group.

Mon kestyon ozordi se lekel ki entrodwir en pasyan kanser avek psikolog e osi en terapis? Dan ki lenstans ki nou war en psikolog ouswa en *therapist*?

Kote sa group *Cancer Concern* i baze? E ki mannyer ki zot ganny kontak avek pasyan ki annan kanser? Eski se sa pasyan ki bezwen al rod oli sa group dan sa letan sok e osi tromatize?

Ki mannyer mon ganny konekte avek sa group? Mon tann nonmen, me mon napa okenn lenformasyon lo la.

Eski napa en fason kominike ant dokter avek sa bann group, ouswa group *Cancer Concern* pou enform zot ki i annan pasyan kanser ki pe antre Lopital pou loperasyon, ki zot prezans i rekomande pou koz avek sa bann pasyan, avan ki zot antre dan *theatre* ouswa apre ki zot in fini fer sa loperasyon?

Omwen nou a war en dimoun la o bor nou lili letan nou ouver nou lizye, i pe atrap nou lanmen, i pe donn nou sa sipor. Pou mwan dan tou lede ka i nesese annan zot prezans.

Akoz sak dimoun i annan son fason pou dil avek sa maladi. Mon pe demann sa bann kestyon, pou ki sa bann lenformasyon ava vin dan lentere lezot dimoun, lezot frer ek ser ki ava vwar zot dan sityasyon kanser a lavenir.

Mr Speaker i malere, par ler i annan dimoun osi ki menm pran plezir lo ou maladi, met ou

lo *Facebook* avek tou bann sort fo lenformasyon san konnen ou vre sityasyon.

Annou serye nou ! Annou montre respe pou nenport ki maladi. Napa personn ki ti pou swete annan kanser.

Mon konsey pou tou dimoun, nenport ki laz, ki ganny dir zot annan kanser, ki letan ou pran keksoz pozitiv, ou pare pou aksepte e fer tou dan ou kapasite, ou pou geri e met sa maladi anba kontrol. Ou pou arive fer li.

Fodre ou pa perdi lespwar. Ou pa les nanryen trenn ou ater. Ou reste touzour for e konfidan e ou leve. Ou pran ou lavi normal, parey ou abitye viv. E fodre ki ou aksepte ki ou nepli annan sa maladi dan ou lekor.

Se nou *will power* ki pou ed nou detri li. Mon fyer ozordi pou dir ki mon'n fer tou mon tretman avek *positivité*. Mon'n toultan krwar dan mon tretman e ki mon pou sirmont sa maladi.

Mon krwar dan mon lekor, e dan tou sa ki mon fer mon demann Bondye pou mars devan mwan. Akoz li i konnen kwa ki bon e kwa ki pa bon pou nou.

Mr Speaker mon ti a osi kontan azoute ki dan Mosyon pe rekomande ki en program swivi dan lafanmir i ganny fer. Mon war sa i enportan. Fodre

pa nou gete poudir sa zanfan i ankor zenn, i pa pou ganny kanser. Pti baba ozordi pe trete avek kanser.

In osi rekomande ki nou al fer nou tes pli souvan e gard nou bann randevou spesyalis.

Mr Speaker mon siport sa bann legzersis 100 poursan, me nou bann spesyalis i bezwen osi pran kont ki *COVID* in fini vin par nou lavi. Zot osi zot bezwen fer li zot devwar, pou zot vwar zot pasyan pli regilyerman, pou ede sov lavi, e aret anvoy bann apwentman parti anvoye.

Annou aret dir avek en dimoun ki vin Lopital avek en pti bos, en sikatris lo son lekor, pou pas sa koman i normal, i zis en pti bout lagres, i pa en keksoz danzere. Annou fer bann *scan* pli regilyerman.

Annou fer bann tes pli regilyerman, aköz kanser i pe vin pli souvan pe preokip nou lavi. Mr Speaker mon pou osi profite pou remersye tou dokter ek ners ki mon'n pas dan zot lanmen.

Tou ners kot *Oncology Unit* ki'n donn mwan sa bon swen. Tou Manm mon fanmir, mon zanfan, mon ser, bann koleg Onorab e osi bann zanmi pros e tou bann lezot *sponsors* ki'n raport zot sipor pandan letan ki mon ti dan sa sityasyon. Mersi.

**(APPLAUSE)**

**MR SPEAKER**

Mersi Onorab. An vi ki i annan en seremoni ki'n ganny prevwar pou sa peryod, nou a pran *pause* lo deba la. Nou a nobou rasanble bann ki pe partisip dan seremoni.

E zis pou donn en pti pe plis letan, nou a rebran travay, nou a rebran travay 11er 10. Mersi nou a pran *pause* la.

**(BREAK)**

**MR SPEAKER**

Byen nou a rebran deba lo sa Mosyon, mon pou envit bann entervenans ki ankor anvi koze pou relev lanmen e mon a osi envit zot pou obzerv limit letan ki'n programen pou sa.

Onorab Lemiel avek Onorab Arissol zot ti lo sa, si zot dakor mon a donn zot, mon a rezerv 5 minit a lafen pou zot donn *closing remarks*, mon a pran lezot Manm.

Onorab Bistoquet ou kapab met ou pare pou komanse. Tre byen mersi. Onorab Bistoquet.

**HON ROSIE BISTOQUET**

Mersi Mr Speaker. Bonzour Mr Speaker. Bonzour tou Manm e bonzour tou



dimoun ki pe ekoute dan lakour.

Mwan Oktob tou le lannen i ganny dedye koman mwan pou kree latansyon pou sa maladi kanser tete.

En maladi reprodiktiv, lasante reprodiktiv. Son bi se pou ganny plis dimoun ki posib pou angaze dan kreasyon sipor o fon pou sipor en fason pou sov lavi imen e osi sanz lavi imen atraver kanser.

Kanser tete i enn parmi bann maladi parmi bann kanser ki i annan plis konplikasyon lasante, e osi kanser i pli, son kanser i pli fatal parmi tou dan bann kanser, ki i annan dan bann maladi dan lemonn.

Isi Sesel nou annan nou bann ser ki pli zenn, 30an, ki kanser in pran zot lavi. Mon ti a osi mazin tou bann fanmir ki'n perdi enn zot pros.

Mr Speaker mon pou lans en mesaz, avek tou bann madanm, zonm, ek zonm, si bann ki'n ganny enfekte ou afekte par kanser tete.

Nou pou touzour la pou zot, aköz maladi kanser tete, sirtou avek douler, lenkyetid, sirtou depresyon, dekourazman e konplikasyon asosye avek tretman, sanzman moral, fizik, napa sipor fanmir, sa i bann sityasyon ki person pa ti a

kontan pas ladan, sirtou en fanm, zonm ou en fanmir.

Sa i fer mon mazin Elfreda, en manman tousel, aze 36an ki reste Beau Vallon. I en travayer kot en lotel dan son rezyon. I annan 2 zanfan aze 10an a 5an.

Li menm li zonm, li menm li fanm san kontribisyon papa sa 2 zanfan. I ti ganny detekte avek kanser tete 2an pase, in ale vini dan diferan klinik pou e menm vwar dokter prive avek son problem, pandan lan, avek bann douler dan ledò.

Sa douler in toultan reste la. Aköz son travay ek son zanfan ki son preokipasyon, Elfreda ti met sa problem fermal de kote e kontinyen son lavi toulezour.

Malgre douler ki ti anpes li parfwa lev son lebra pou penny on seve dan bomaten ou menm frot son bann paye lo ros deo. Me en zour ler i ti pe pran son ben, i ti remark en serten groser dan son tete drwat ki red.

Ler i ti peze i ti parey en lapo zoranz e menm en pti desarz ti koule dan son tete. Son lannmen bomaten i ti raport kot son klinik, ners ki ti egzamin li e i ti refer i avek dokter toudswit.

Aprè dokter ti refer li avek spesyalis. Aprè ki spesyalis ti'n fini fer *diagnose* preliminar,

Elfreda ti bezwen esper ankor 2 semenn pou li ganny en *diagnose* final.

Akoz i ti pou bezwen fer en *biopsy* ouswa en *mammography*. Me premye tes pa ti kapab lokaliz definisyon son kanser, pou kapab decide ki mannyer pou zer son tretman. I ti esper en pe letan pou ganny en lapwentman pou fer en *mammogram* e osi en *biopsy*.

Mr Speaker, malgre tou, apre 2 semenn, i ti ganny son rezilta pou ki son tes i pou al fer *overseas treatment*, i ti pas lo *Overseas Treatment Board* pou li al fer son tretman aletranze. I pa ti fasil pou Elfreda.

Akoz son traka apard ki son kanser tete e osi al trete aletranze i ti dan en depresyon tropikal, ki son 2 zanfan i dan lakour tousel san sipervizyon. Koman en fanm tousel i pas dan en tranzisyon san sipor, aköz son manman ek son papa ti'n deza mor avek kanser e son sel frer ki i annan i dan drog.

An se moman i ti pe trakase ki son anplwayer pa pou met li deor. Apre tou *diagnose*, dyagnostik ti'n ganny fer, Elfreda ti bezwen fer loperasyon pou koup enn son tete e apre dokter ti anvoy li dan Lenn pou al fer plis sa

radlyografi, aköz sa *management* napa isi Sesel.

Vi ki nou e pti pei e nou napa posibilite pou *manage* bann sistenm radyoaktiv. Laba i ti fer 8 semenn pou aret sa kanser parwaze par radyo terapi, pou anpes sa selil kanser sirkile, pangar i a detri son bann *DNA*.

E osi ti fer *chemo* pou detri sa bann selil kanser dan son lekor. Apar sa bann tretman entansif Elfreda ti retourn Sesel kot i ti kontinyen fer son evalyasyon e *chemo* Lopital Victoria.

Son 2 zanfan ti reste avek son granmanman, malgre ki aze ayo, ayo, i ti reste Anse Boileau. Sa 2 zanfan ti bezwen lev granmaten toulezour, pran bis tata bomaten pou al leköl e retourn dan lakour ziska ki Elfreda ti retournen.

I pa ti fasil pou sa fanmir, menm si Elfreda ti dan douler, i ti bezwen okip son 2 zanfan apre son retour, me Elfreda ti dir mersi ki i ankor kapab debout pou fer sir ki son lasante i kapab ganny amelyore en zour kot son *at least* son 2 zanfan in tourn dan lakour.

Konbyen fanm ek zonm Seselwa ki'n mars dan soulye Elfreda, e konbyen ki ankor pe mars ladan?

Elfreda osi i remersi *Cancer Concern Association* pou sa sipor psikolojik ki in gannyan, e osi son *MNA* avek son *DA* dan son distrik, menm si i ti pa konnen kan sa kanser pou releve, me pli enportan i ganny gidans spirityel nou kreater Bondye li menm.

I osi remersi Minister Lasante spesyalman e tou travayer *Oncology Overseas Treatment* pou zot sipor e gidans, swen e konsey.

Me Elfreda ti a kontan met sa bann rekomandasyon swivan pou ede soulaz bann fanm osi ki'n pas dan son sityasyon, avek sa bann difikilte pou asire ki deteksyon kanser i vin pli efikas, sipor fanmir i amelyore e bann madanm ki a risk i ganny detekte pli boner.

Alors i ti demande, ki

1) Minister Lasante i annan en deteksyon ki pli modern dan sistenm radyo, mamografi, pou kapab plis kapab lokaliz deteksyon kanser ki a ede pou konnen spesifikman.

E kote ki rezyon sa kanser i ete dan son lekor, sirtou sa selil, pou asir bon *management*. Sirtou moderniz sa sistenm *mammogram*, annan en sistenm *3D*, aköz konmela nou annan enn *2D*. E avek en opsyon ki pou ganny servi dan

lekip, e en opsyon ki deza pe ganny servi dan lemond. Sa i a osi ede spesyalman pou bann tete ki en pti pe pli gro.

Dezyenman, Elfreda i dir met a dispozisyon bann travayer spesyalize pou ede ogmant lefikasite dan deteksyon kanser tete. Aköz konmela ki mannyer sityasyon i ete, i annan en bon pe travayer *well* travayer Lasante ki pa'n *train*, ouswa bann ki'n kite pou fer deteksyon.

Elfreda osi ti dir, enn bann konsern se Minister Lasante i kapab entrodwir en sistenm efikas ou en program *screening* dan Lasante primer ouswa dan Lasante kominoter, par egzanp tou bann madanm 25an a 65an fodre zot fer en *pap smear*, ki fodre zot fer sa tou le lannen.

I ti dir osi madanm ant 40 a 44an pou annan sa opsyon pou *screen* avek *mammogram* tou le lannen.

Bann madanm ant 45 a 55, fodre zot fer *mammogram* tou le lannen.

Pou tou bann madanm aze 55 an montan ou plis, fodre ganny *screening*, fer par en *mammogram*, tou le 1an, tou le lannen pou 10an.

E lo kote Minister Lafanmir, Elfreda ti a kontan remersi Minister Lafanmir avek

Sosyal, Minister Ledikasyon e lezot Minister e osi bann lorganizasyon prive ou parastatal, ki'n ede pandan sa bann letan ki ti, ki pa ti byen.

E an menm tan Mr Speaker, nou trouve ki nou bann Manm Lasanble, nou lans sa lapel koman en Anbasader kont kanser isi Sesel, sirtou kanser tete.

Annou nou tou met lanmen ansanm pou dedye sa parey loter Mosyon in dir, met nou lanmen ansanm pou ki nou dedye mwan Oktob koman en lannen pou kanser tete.

Sirtou pou bann ki'n perdi zot lavi, enfekte ou afekte par kanser, zanfan ki'n perdi zot paran, paran ki'n perdi zot zanfan, msye ki'n perdi zot manman, zanmi ki'n perdi zot kanmarad, lorganizasyon ki'n perdi zot bon travayer e sosyete ki'n perdi en fanm for ki pli ankore kapab kontribye pou nou pei.

Pep Seselwa annou zwenn ansanm pou soulaz soufrans e lev moral nou bann fanm ek fanmir, sirtou Elfreda ek son fanmir ki bezwen nou dan sa moman difisil.

Akoz kanser i pa swazir ni ras, ni kouler, ni larelizyon, ni risar, ni mizerab, ni politik e ni ler osi. Ansanm nou pou

bezwen reste ansanm e konsernen. Mersi Mr Speaker.

### **MR SPEAKER**

Mersi Onorab Bistoquet. Onorab Sophola.

### **HON NOLINE SOPHOLA**

Mersi Mr Speaker. Mr Speaker atraver ou mon oule felisit Onorab Desheila, ou en fanm for, brav e determinen. Mon salye ou pou sa. Pa dekouraze, reste pozitiv, met tou keksoz dan lanmen Gran Met.

Mr Speaker ozordi le 19 Oktob, preske tou pei pe komemor Lazournen Kanser Tete.

Alor Sesel i pa eksepsyon. Se pou sa rezon ki nou *Caucus* Madanm dan Lasanble Nasyonal, nou pe demann Minister Lasante pou anbark lo en program agresiv pou detekte bann ka boner ki ava sov lavi.

Dapre rikord dan Sesel, tip kanser tete pe vin pli popiler parmi bann madanm, osi byen ki bann zonm. Dan en peryod 5an, vedir depi 2016 ziska 2020, in annan 2008 ka ki'n ganny detekte enkli 4 zonm.

Sa i koman depi laz 25an. Sa sityasyon i vremen enkyetan pou sa pti popilasyon. Mr Speaker, nou pep Seselwa nou

ankor sanse, akoz ki tretman medikal i ankor gratwit pou nou tou.

Me si ou anvi al fer ou tretman dan en klinik prive, i ou prop swa. Me sa ki enportan, i ki tou dimoun i annan akse avek tretman medikal.

Mr Speaker, meyer fason pou nou detekte e ed e redwir ogmantasyon ka kanser tete, ou nenport kanser, i senpleman par fer nou tes boner e regilyerman. E fodre note ki si sa ka kanser i ganny detekte boner, i annan gerizon.

Mr Speaker, mon toutafe dakor ki i vreman enkonfortab pou fer tes kanser. I demann bokou kouraz, bokou led moral pou nou avans devan pou fer sa premye pa.

Sirtou si nou'n komans santi serten sentonm e nou pe asosye avek enn nou pros ki'n desede. Me mazine ki 5 minit enkonfortab, ou pou kapab benefisye avek plizyer lannen ou lavi an bonn sante.

Mr Speaker ozordi mon enplor avek tou bann madanm, tou zonm pou al fer zot tes koman i ankor boner, pou konn zot stati. Met kanmi de kote. Apre tou dokter ek ners zot bann zonm ek fanm parey nou.

Ler nou dan sa bann sityasyon, esey rod led boner, rod en dimoun sarz otour nou

ki kapab ed nou. Koz avek, ki kapab ed nou osi. Apros bann lasosyasyon parey *Cancer Concern* e lezot ankor.

Pa bezwen reste tousel e soufer an silans. Mr Speaker nou bezwen rekonnèt bokou travay ki Minister Lasante dan Gouvernman presedan in fer dan sa domenn. Bokou lavi in ganny sove.

E de lot kote, nou osi rekonnèt ki i annan ki'n ganny perdi lavi pou plizyer rezon. Alor, avek sityasyon *COVID* ki person napa en larepons lo la, mon pe demann Minister Lasante pou kontinyen servi sa bann bon fason fer, me amelyor lo sa ki fodre e anmenn nouvo linisyativ.

Nou rekonnèt tou travay ki bann *staff* Lasante pe fer. Nou pa pou zanmen kapab aret dir zot mersi. Anliny avek sa program agresiv, nou pe demann Minister Lasante, pou fer en letid profon, pou konnen akoz ki ka kanser pe kontinyelman ogmante, sirtou dan serten distrik.

Eski lafason ki delo i ganny trete ou transportasyon manze konzele? Amelyor sa dyalog avek pasyan, pran letan pou ekout zot, montre en pe plis senpati.

Demars pou asiste pasyan, swa lokal ou aletranze i

devret fer pli vit. Fer plis swivi lo bann ka. Kriter pou tretman aletranze i devret kler e aplik pou nou tou.

Donn plis lasistans psikoloji pasyan ler zot ganny deteste, detekte. Amelyor sipor e konsey ki bann lafanmir i gannyen pou ed zot dan sa parkour difisil. E osi pou swivi a lavenir.

Asire ki tou lekipman medikal i touzour pe fonksyonnen, fer li koman en priyorite. Ledikasyon i devret tou dilon lannen pou konsyantiz plis dimoun lo sa size pou redwir bann ka kanser tete.

Mr Speaker ozordi ler nou regarde, tou dimoun pe ralye dan Sesel pou en menm koz, le 19 Oktob. Mon ti a kontan ki sa i kontinyen. Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Monthy.

**HON PHILIP MONTHY**

Mersi Mr Speaker. Bonzour a tous e bonzour tou bann pasyan ki pe soufer avek sa maladi kanser.

Mr Speaker ler mon'n ekout temwannayaz emosyonnel mon koleg Onorab Desheila

Bastienne, i montre nou ki menm si nou bann politisyen, kanser pa en size pou nou sey vin fer politik avek.

Mr Speaker mon santi ki i enportan pou mwan personnelman dir detrwa mo an sipor Mosyon anmennen par Onorab Esparon, an vi ki mwan osi mon fanmir pa'n ganny eparnye avek sa maladi.

E prenon kont osi lakantite ka kanser ki pe ganny detekte resaman parmi nou popilasyon.

Mr Speaker ler en manrmay 10an e 12an i perdi zot manman, i touzour en trazed i ki mark ou diran ou lavi antye. E se sa laz ki mwan ek mon pli zenn ser ti annan ler sa maladi ti tous nou fanmir.

I pou sa rezon ki sak fwa ki mon aprann ki enn nou ser oubyen frer Seselwa pe lite kont sa maladi ki apel kanser, mon dan en serten fason santi e konpran ki douler li ek son fanmir pe pas ladan.

E ki mannyer sa i kapab enpakte lo zot bann aktivite toulezour e zot lavi an zeneral. Mosyon anmennen par Onorab Esparon in en size konversasyon resaman ki mon'n fer avek serten endividi.

Akoz nou'n remarke ki sa size kanser, pli prezizeman kanser tete, pe deplizanpli

afekte plis nou bann madanm. E parey in ganny konfirmen par Onorab Esparon, sa maladi pe osi afekte bann msye.

Mon distrik parey lezot pa'n ganny eparnye. Mon konn omwen 8 mon zabitan ki'n swa fer fas oubyen e aktyelman lite kont kanser. E lanmwatye ladan se kanser tete.

Mon pou profite pou mwan akord zot mon sipor e demande ki zot reste pozitiv. E mon asir zot ki avek lagras Bondye zot pou raport laviktwar lo kanser e reganny zot lasante.

Mon pou profite Mr Speaker pou osi parey mon bann koleg ki'n koze avan mwan in fer, pou ankouraz nou pep pou al fer zot tes regilyerman. E la mon pa pe fer referans a zis bann madanm, me bann msye osi.

Akoz parey nou konnen, ler kanser i ganny depiste a en staz ase boner, sans ki sa pasyan i rekipere, i reganny son lasante i tre o.

Mon lankourazman pou tou *staff* Minister Lasante ki pe fer zot mye avek mwayen ki zot annan pou kapab detekte e ede ki bann pasyan kanser i ganny sa swen e sipor nesese pou zot kapab reganny zot lasante.

En pti mo osi pou Lasosyasyon *Cancer Concern*, ki mon'n lyez direktman avek

atraver enn zot Manm Minis Patricia Francourt, ki'n raport zot led e soutyen a enn mon zabitan ki pe soufer avek sa maladi.

Mon demann zot pou kontinyen sa bon travay e zis swete ki zot a kontinyen ganny sipor lotorite ek Sekter Prive. Pou asire ki zot annan sa mwayen e fasilite nesese pou kontinyen dan sa travay nob ki zot pe fer.

E kot i annan defayans parey Onorab Desheila Bastienne in fer resorti, zot a fer sir ki sa bann defi i ganny adrese. Ansanm nou kapab raport laviktwar lo kanser. Mersi Mr Speaker.

### **MR SPEAKER**

Mersi Onorab. Onorab Porice.

### **HON DOYACE PORICE**

Mersi Mr Speaker. Bonzour Mr Speaker, bonzour tou mon bann koleg *MNAs* e tou bann ki a lekout. Avan mon fer mon pti lentervansyon, mon ti a kontan salye mon koleg *MNA* Onorab Bastienne.

Mon santi ki ou en fanm for, byen brav e nou pou toultan deryer ou. Sa Mosyon lo kanser tete i vremen tousan, e mon asire ki i vremen fermal. Praslin pa'n ganny eparnye.

Me mwan mon konnen ki ners ansarz ansanm avek lezot ners lo Praslin pe ankouraz plis bann madanm pou fer zot *pap smear test*, toulezan ou tou le 2an. Akoz sa i ed madanm pou aprann fer zot egzaminasyon tete.

Zot ganny sa ledikasyon pou zot fer li enn fwa par mwan dan lakour. Sa i ede detekte sa kanser pli boner. E nou dir mersi nou bann ners ek dokter.

Alor Mr Speaker i devret annan plis ledikasyon ouver par Minister Lasante, sirtou atraver bann pti *slot* lo SBC oubyen lo medya sosyal. Sa ki mon konpran osi Mr Speaker, se nou bann madanm nou bezwen konn byen nou *family tree*.

E sa i ed nou pou kontinyen fer sa swivi. Akoz atraver en manm nou fanmir ki deza ganny kanser, i kapab osi lezot manm dan fanmir i swiv parey. Mwan mon pou donn mon sipor sa Mosyon, akoz mon annan fanmir e zanmi ki'n pas atraver sa sityasyon.

E mon ti par deryer zot pou donn zot sipor. E mon pou ankouraz bann madanm dan Sesel, espesyalman bann madanm lo Praslin, pou fer zot tes avan ki i tro tar.

E ler zot santi en keksoz drol avek zot tete, kontakte klinik pli boner pou zot ganny

sipor. E parey nou konnen, ki nou madanm Praslin, nou bezwen mont Mahé pou fer lezot tes parey *mammogram* e osi *biopsy*, pou kapab detekte kanser.

E sa i kout bokou. Alor nou tou annan pran nou responsabilite e fer nou tes boner. Mersi.

### **MR SPEAKER**

Mersi Onorab. Onorab Aglae.

### **HON EGBERT AGLAE**

Mersi Mr Speaker. Bonzour tou Manm Onorab e tou dimoun ki a lekout. E en bonzour spesyal osi i pou bann pasyan ki ozordi i pe viv avek en maladi ki apel kanser e ki nou pou mazin zot osi dan nou lapriyer dan zot parkour.

Mr Speaker, kanser i en maladi ki date de lannen e lannen. E sa ti ganny prouve par enn, en Grek ki 460 a 370 BC se Ipokrat, sa ki nou apel li sa dokter 'de lenvansyon.' Ki ti dekouver en maladi parey.

E sa letan parey bokou nou ti komans tann nonm li, se ki zot ti term li an term medikal, se sa ka sinoman.

E Mr Speaker, ozordi, malgre bokou lannen in pase, dan sityasyon medikal, kanser i reste enn bann maladi ki pe touy imen, in anras imen, pli vit



mon kapab dir, baze lo resers ki'n ganny fer, ki bokou bann maladi ki egziste ozordi.

E ozordi fas a en lepidemi, (sa mon pe koz *COVID*) Petet i pou annan son letan ki i pou ale osi. Ozordi sa maladi osi ki pe pran lavi bokou lo bann frer ek ser.

Me sa osi pe ganny an menm tan agrave atraver bann kondisyon, sirtou bann maladi parey kanser ki en dimoun i soufer avek. E si ou pe pas dan sa lepidemi, definitivman ou pe al pli vitman.

Mr Speaker mon'n fer en pti resers e mon'n vwar poudir lo kontinan Lanmerik par zour i annan apepre 960 dimoun ki pe mor avek kanser. Sa i tradwir ki tou le 3 minit i annan 2 dimoun pe mor.

E *Europe* osi son lekivalans statistik ki nou pe gannyen, se 450 dimoun par zour pe mor, sa i presizeman *L'Angleterre*. E pou nou Sesel Mr Speaker, malgre nou en pti pei ek en pti popilasyon, menm si nou napa en statistik similer, lefe i reste ki i annan nou frer ek ser ki pe mor avek sa maladi toulezan.

Mr Speaker, mon pou felisit bann koleg travay *Oncology* ki pe travay sanses pou kapab raport soutyen avek sa bann pasyan, ki parfwa i

vreman bezwen bann latansyon pou zot kapab sirmont en lefe psikolojik, ler zot in konnen poudir zot pe viv avek sa maladi.

Mr Speaker mon'n osi form parti sa seksyon ki apel *Oncology Unit*, dan mon letan, mon'n fer 4an laba depi ler mon ti travay koman en farmasi.

E laba Mr Speaker, ler ou get en figir en dimoun, en pasyan ki antre avek en *diagnosis* ki'n dir i ganny kanser, parfwa ou war poudir i pe panse ki son lavi pe al terminen.

Me i pa touzour le ka Mr Speaker. E sa i enportan, parey Onorab Bastienne ti'n fer resorti, sipor *psychosocial* i enportan pou sa bann pasyan.

E mon santi Mr Speaker kot mon pou focus lo 2 pwen la, se lavenir Minister Lasante li menm li fas a maladi kanser e osi fas a bann *care*, sa ki nou apel *palliative care* pou bann pasyan ki ganny *diagnose* avek kanser.

Akoz sa i tre enportan. Premyerman Mr Speaker, pou ou kapab detekte kanser boner, aköz kanser i annan diferan staz. Si ou vin lo staz 1, byensir ou annan sans ganny sove.

Me si ler ou pe vini ou lo ou trwazyenm e katriyenm staz, byensir la kot kanser i komans

anvair parti ou lekor, i fer li difisil pou ou kapab sirviv.

E dan premye staz, resers i prouve poudir ou annan ou plis ki 50poursan sans pou sirviv. E ler ou'n ariv lo sa bann staz dernyen, ou annan mwens ki 25poursan pou ou kapab sirviv.

E parfwa dokter menm i pe donn ou, ou dat, ou dat ouswa ou zour ki reste ou pou sirviv. E sa Mr Speaker, i bann evantyalite, ki koman en pasyan ki ek kanser ou vwar ou pe fer fas avek.

Mon rekonnèt ki Gouvernman in investir en kantite pou kapab etabli en *unit* ki pou pran swen avek bann pasyan. E menm kantite larzan in ganny investir dan tretman.

E nou tou nou konnen ki ozordi, avek bann lavansman teknolozi, bann tretman i varye e i kout en kantite larzan. Sa nou konnen. E bann form tretman, sirtou *radiotherapy*, bann tretman parey *stem cell*, bann tretman *hormone therapy* ouswa *immune* terapi, ki mon swete.

Se sa pledwari ki mon pe anmenn devan. Ki Minister Lasante i komans bann lenvestisman neser pou al ver sa bann kalite tretman. Akoz ozordi pou sitye nou, la realite

se ki pasyan i bezwen pe kit pei, akoz nou napa ase spesyalizasyon.

E sa i anmenn mwan lo lot pwen Mr Speaker, kan ki petet Sesel, nou a ganny nou, nou prop Seselwa koman en *oncologist*. Dan mon parkour ki mon'n travay Minister Lasante, tou bann *oncologist* i bann etranze.

Akoz nou napa Seselwa kalifye ki'n etidye dan sa domenn. E mon ti a swete ki bann aspiran dokter demen, sey konsider pran sa laliny pou zot kapab spesyaliz dan enn sa *field*.

Mon konnen i difisil, me selman nou ti a kontan ki zot ti a kapab raport soutyen e fer Sesel loner. Mon pa konnen si ozordi nou annan ki deza pe swiv sa. Me mon pou donn sipor sa Seselwa, ki pou antreprann dan sa tel karyer.

Lot eleman enportan Mr Speaker, dan sa laliny pou konbat sa maladi, se sa ledikasyon ki bezwen kontinyen ganny anmennen. Enn bann faktor se nou kalite lavi ki nou pe viv, ki mon santi i vre nou dan en *monde* modern, i vre ki keksoz i a laporte.

Me sa eleman nou sekirite li menm li pou nou lasante, mon krwar i enportan. E mon

siport lapel ki loter Mosyon Onorab in met devan.

Pou ki i annan plis demars pou bann prodwir ki ganny sansire e ganny konsidere koman bann proze *carcinogen*. E sa pou mwan Mr Speaker, malgre nou dan en *free market*, malgre nou form parti *WTO*, kot i annan mwens regilasyon, me selman kot i konsern lasante imen, mon krwar nou bezwen annan bann regilasyon an plas.

Pou fer sir ki nou sofgard lasante bann zenerasyon ki pe monte e ki nou pa ganny en pep ki kontinyen viv ek maladi e malad, ki a lavenir nou pou annan mwens prodiktivite.

Mr Speaker pou terminen, mon siport bann madanm dan zot bann demars ki zot pe fer e sirtou bann madanm dan Lasanble. Me osi annou pa bliy bann msye.

Menm si lakantite kanser ki afekte bann msye i minim konpare ek pou madanm ki i annan plis varyete kanser, i reste en *issue* pou bann msye kot i konsern dyagnostik kanser.

Akoz ler en msye in raporte, nou vwar souvandfwa in ariv lo en staz avanse. E sa mon pe koz parey bann kanser prostat, bann kanser lagorz, nou *lungs*.

Tousala ler in arive Mr Speaker in en staz ki'n fini konmans *spread* en pe partou. E pou mwan, fodre pa ki nou bann msye nou per.

Sirtou, i dir ou ler ou ariv 40an e plis, i bann laz probab kot ou kapab pe komans bann deteksyon, serten bann maladi ki kapab asosye avek kanser. E pou nou bann msye fodre pa krwar nou pou per.

Ler nou bezwen al fer nou tes, silvouple annou al fer li. E si fodre ganny sipor avek ou madanm, pran sa sipor ekoute al fer li. Akoz kanser li menm li i pa pe get ni ou ras, ni ou sex, nou ou larelizyon, si i pou arive, i pou arive.

E osi mon pou lans en lapel Mr Speaker avek bann fanmir, mon krwar nou tou la anndan, i kapab en Manm fanmir ki'n pas atraver en leprev parey.

Se si nou konnen dan nou lafanmir i annan bann posibilite, annou al fer sa tes pou nou al gete. Konmela nou annan klinik prive osi ki pe donn sa servis, pou al gete si mwan dan mon desandans, napa en sans ki petet mon osi mon kapab gannyen, akoz i kapab dan fanmir.

So Mr Speaker, lenportans ozordi ki nou bezwen met ladan, se *early diagnosis* e

lavansman tretman i bezwen ganny investir ladan pou kapab detekte bann ka tre boner.

So i annan bann lekipman enportan ki mon santi ki nou Minister, Gouvernman i bezwen investir ladan ankor pou kapab raport soutyen dan deteksyon.

Mon aprann ki ozordi i annan pa mal problemm avek serten masin, avek Minister Lasante. Ki mon santi sa i devret rezourd koman en priyorite pou Gouvernman fer atraver Minister Lasante.

E dezyenmman se annan bann profesyonnel ki'n byen *train*, ki ganny sans pou al *retrain*.

Akoz i annan bann devlopman modern dan *medicine*, pou zot osi kapab reste azour, pou zot kapab retournen apre, kontinyen donn sipor e tret nou bann pasyan.

E osi Mr Speaker pou terminen, *chapeau* avek bann dokter ki pe fer sa bon travay pou kapab ed bann pasyan, siport zot, donn zot bann lasistans *psychosocial* kot zot merite e osi bann ners osi ki pe devoue pou zot. Avek sa Mr Speaker, mon krwar i enportan pou donn sipor sa Mosyon. Mersi.

### **MR SPEAKER**

Mersi. Mersi Onorab. Onorab Samynadin.

### **HON KELLY SAMYNADIN**

Mersi Mr Speaker. Bonzour Mr Speaker e tou mon bann koleg Onorab e tou dimoun a lekout. Mr Speaker, kanser tete i enn bann maladi pli detrimental parmi popilasyon bann madanm Seselwa ozordi.

Apre ki in aprann ki i ganny sa maladi, en madanm i fer fas avek plizyer defi ki kapab annan bokou konsekans vreman grav lo son lavi, si i pa ganny reabilitasyon, led ek sipor nesaser.

Sa bann defi ki mon pou elabor lo la, ki mon pou elabor en pe lo la, i kapab pran plas dan diferan form, ki swa psikolojik, sosyal, fizik, ou menm finansyel. Kanser tete parey nenport ki kanser, pa swazir lekel ki i pou atake.

I parey en mons ki ron son *Croix* san pitye. Nou bezwen pran kont ki pa tou madanm ki parey e byensir son reaksyon emosyonnel e fizik, osi byen ki son sityasyon sosyal e finansyel, pa pou nesaserman parey pou en lot.

Annou vwar ansanm, serten bann defi ase sibstansyel, ki bann madanm

avek kanser tete i fer fas avek dan lakominote Seselwa.

Premyerman i annan sa laspe sipor emosyonnel, apre ki zot in dekouver ki zot in ganny sa maladi. Bokou i ganny sipor lafanmir, zanmi ek bann pros.

Me i osi annan bann, ki swa zot partner ou lezot manm fanmir i abandonn zot, akoz zot santi ki zot nepli vo nanryen e ki zot in vin zis en fardo adisyonnèl.

An rezilta sa, sa pasyan pa santi li annan lespwar pou li fer fas avek sa maladi li tousel, e i menm annan pasyan ki tonm dan en leta depresiv.

Lakour e zanfan ki pe grandi, i ganny negligè, e li sa pasyan i reste plonze dan son prop lemonn, anglouti dan son soufrans.

Dezyenmman, swivan lenpak *chemo therapy*, i annan serten pasyan kanser tete ki trouv li vreman difisil pou fer fas avek sa bann sanzman fizik. Dezyenmman Mr Speaker, swivan lenpak *chemo therapy*, i annan serten pasyan kanser tete ki trouv li vreman difisil pou fer fas avek sa bann sanzman fizik ki an rezilta sa prosedir.

I annan ki santi zot enferyer ou dezabil ek lezot, akoz sa tranzisyon fizik ki zot

pou dezormen bezwen pas atraver.

I enportan ki nou koman fanmir, zanmi e koleg, nou donn zot sifizaman sipor emosyonnel pou zot kapab *cope* avek sa bann sanzman. Zot ki mon pou fer?

Annou donn zot lanmour, annou fer zot *feel good about themselves*, pou ki zot ava annan sa *joie de vivre tout au long* zot tretman.

Mr Speaker, swivan laprantisaz ki zot in ganny kanser tete, bokou madanm i bezwen abandonn zot louvraz, pou ki zot kapab swiv tretman neserer, afen ki zot kapab rekipere.

Byensir pou bann manman ki tousel, oubyen ki napa sipor adisyonnèl, zot vwar zot dan en sityasyon kot zot napa le mwayen pou zot sipor zot fanmir, pey zot *bills* e fer lezot depans neserer parey avan.

Souvandfwa zot vwar zot pe tap laport biro *Welfare*, me pa toultan ki zot reisi ganny asiste.

Mr Speaker, Gouvernman i devret trouv bann alternativ pli konkret, pou asiste nou bann pasyan ki trouv zot dan bann sityasyon vilnerab, fas a sa maladi, swa atraver lasistans e benefis sosyal spesyal.

Oubyen annan en konversasyon avek bann diferan anplwayer pou ki bann pasyan ki'n devlop kanser tete ou lezot kanser, pa ava retrouv zot tousel finansyerman, tout an prenon kont ki zot annan fanmir ek lakour pou okipe. E byensir tousala i annan en kou atase avek.

Mon santi ki bann departman e antite konsernen ki travay direktman avek nou bann pasyan kanser tete, i devret zwenn ansanm e travay lo en plan pli konkret, an sa ki konsern ledikasyon e sansibilizasyon, parey plizyer Onorab in koz lo la oparavan.

Lo bann konsekans direk e endirek, ki sa bann pasyan i annan gran risk pas atraver, apre ki zot in devlop sa maladi. Osi byen ki bann sipor adisyonnèl ki zot pou bezwen, ki swa avek Minister Lasante, manm lafanmir, eksetera.

Pou i zot pa ava santi zot tousel dan sa lalit kont kanser tete. I pa en letap fasil dan zot lavi, me mon konvenki ki avek sipor e latansyon nesese e adekwat, zot ava annan ase lespwar e kouraz pou zot lager, tot an rekonesan ki zot pa tousel.

Mr Speaker mon osi mon pe demande ki nou anbank lo en

programm agresiv pou detekte bann ka boner, ki ava sov lavi.

Me mwan Mr Speaker, mon santi ki sa bann defi ki mon'n nonmen, ki souvandfwa bann pasyan kanser tete i pas atraver apre ki zot in ganny dyagnoze i osi enportan.

Akoz si zot ganny pran kont e solisyon konkret i ganny trouve pou lit kont sa bann defi, bokou lavi i ava kapab ganny sove, e bokou sityasyon sosyal, finansyel e emosyonnel relye a kanser tete, i ava kapab ganny remede ou ganny anpese.

Konman en madanm Parlmanter, mon pe ozordi angaz mon lekor pou ede trouv solisyon dan sa lalit. Akoz koman osi en madanm dan lakominote, mon pa zanmen konnen kan ki sa maladi i kapab tap mon laport, oubyen enn Manm mon fanmir.

Pou konklir Mr Speaker, mon anvi koz lo sa eleman lafreyer. Kot bokou madanm pe al Lopital e ganny *diagnose* a en staz tre avanse.

Sa se enn bann pli gran defi ki bann madanm i fer fas avek. Mon anvi dir avek bann madanm, pou vin devan, pa reste deryer. Si zot santi e annan doutans, vin devan.

Si zot santi i annan doutans ki i annan en keksoz ki abnormal avek zot tete oubyen

nenport parti zot lekor. Mazin zot lekor an premye, zot lavi, zot zanfan e zot bann pros ki dan en fason ou en lot pe depan lo zot.

Lafreyer pou toultan la. Me selman, avek sipor nou lantouzyazm, ansanm nou pou *overcome* bokou lenkonvenyans. Le *depistage du cancer*, se la vie. Avek sa Mr Speaker, mon oule konfirm mon lekor ver sa Mosyon. Mersi.

### **MR SPEAKER**

Mersi, Ale Onorab Letourdie ou kapab pran laparol.

### **HON JANY LETOURDIE**

Mersi bokou Mr Speaker, bonzour Mr Speaker, bonzour tou dimoun. Mr Speaker stratezi pli enportan pou anpes lanmor relye avek kanser tete e byensir lezot kanser osi, se pou detekte li pli boner posibil, e alors pou kapab komans tretman pli boner posibil.

Akoz, ki lefe ki i ankor ptipti e i pa ankor ganny propaze, alors i pli fasil pou ganny en tretman efikas, e ki ou kapab ganny plis sikse.

Bann madanm avek bann zenn fiy, nou ganny ankouraze pou nou konmans par nou menm, pou nou fer sa premye

swen lasante personnel pou nou konpran nou lekor. E donk nou tete osi i form parti nou lekor, pou nou egzamin li, pou nou konn son groser.

E alors letan nou vwar poudir i annan bann groser ki nou ti war li i pa ti la, alors i donn en lendikasyon avek nou, ki poudir i annan en keksoz ki abnormal. Alors pou nou fer sa premye pa.

Me selman Mr Speaker, pou kapab detekte kanser tete a en moman byen boner, nou osi bezwen bann lekkipman sofistike ki kapab ede pou fer sa. Taler Onorab Bistoquet in nonm lo sa *digital breast tomosynthesis*. E mon'n al get en pti kou lo la. I dir sa i en nouvo teknolozi ki kapab ede avek abilite pou *diagnose* kanser tete.

E sa se sa *3D* mamografi ki i ti pe koz lo la. In dir poudir isi nou annan son *2D*. E alors mwan mon lapel se ki mon ti ava demann Gouvernman, menm si mon konnen i kout en pe pli ser, gouvernman, dan nou bann demars avek nou bann pei zanmi ki nou annan, e menm bann endividi ki ase, ki kontan pou *sponsor*.

Petet la i ti en demars pou nou al ver sa, pou nou kapab ganny sa morso teknolozi, ki si pou ede dan depistaz pli boner,

alors mon ti ava dir, annou al ver sa.

Mr Speaker mon ti a kontan ozordi met en sityasyon avek, parmi bann madanm ki pe soufer, deza mon konn 2 ; - ki ler zot ti pe pas atraver bann *chemo*, zot bann loperasyon, zot bann tretman nesese, e i arive parfwa ki zot, (ki mannyer mon dir sa) zot *medical leave* i fini, me selman zot santi zot ankor fay, zot pa ankor kapab ale pou zot komans travay.

Me mon konn 2 deza, i kapab annan plis osi, ki zot saler in ganny koupe, e apre zot in pran bokou letan pou zot kapab re aziste.

Alors mon ti ava demande, ki kefwaw si i annan bann nesese pou fer avek sa bann dimoun, ki en fason *fast tracking* ti ava arive pou zot. Akoz sa bann letan ki zot saler i ganny koupe, i vin dan en moman kot zot pli bezwen sa larzan.

Akoz zot ankor bezwen pey zot bil, pey zot *loan* e kontinyen rod zot bann fortifyan pou zot kapab soutenir zot lekor.

E mon dernyen pwen Mr Speaker, mon ti a kontan osi dir, akoz nou pe dir poudir sa i en keksoz ki konsern nou tou, kanser tete e tou lezot kanser.

Mon ti ava demande ki, si mon pou al en pti kou lo *food*

*security*, akoz i annan en tandans ki dimoun i dir, *we are what we eat*.

E alors pou met en lanfaz lo bann keksoz ki nou enporte. Lotrozour ler Minister Lagrikiltir ti'n vini, nou war poudir nou ankor pe depan bokou lo bann keksoz ki nou enporte.

Alors mon ti ava dir, annou met lanfaz lo bann keksoz ki nou enporte, pou fer sir ki nou vreman pe enport sa bann keksoz, nou pe vreman depans dan bann bon manze ki bon pou nou popilasyon.

Mr Speaker, wi, vwala ki mon ti ava annan pou mwan dir. E mon pe dir ki nou pa kapab diriz divan. Me selman nou kapab aziste nou lavwal. Mersi bokou Mr Speaker.

### **MR SPEAKER**

Mersi Onorab. Onorab Lemiel.

### **HON SYLVANNE LEMIEL**

Mersi Mr Speaker. Mr Speaker mwan Oktob antye i ganny konsidere koman mwan kanser tete e pandan sa letan bokou sansibilizasyon i ganny fer lo sa size.

Kanser tete i enn parmi bann lezot kalite kanser ki afekte bokou madanm isi Sesel, san eparnye bann msye. Statistik Avril ziska Zen 2021, i



montre ki i annan 34.1 poursan ka kanser tete ki ti ganny raporte par Lopital Sesel.

Sa i swivi par kanser disan, ki li i ti 30.3poursan, e li osi i pe vin tre, tre alarman. Lopital Sesel in raporter ki kanser tete e kanser disan i ariv plis ki 60poursan an total pandan sa dernyen 18 mwan.

Mr Speaker, sa i tre alarman. Alors i vreman enportan ki Minister Lasante, ansanm avek lezot lasosyasyon, non gouvènmantal, i kontinyen sansibiliz tou dimoun.

E pli enportan, *empower* bann zenn fiy e madanm, lo fason pou pli, lo fason pou pran pli bon ka avek zot lekor, enkli vey byen e egzamin zot tete. Vey byen zot ladyet e osi al fer bann *screening*, pou ki bann deteksyon i kapab ganny fer boner.

Mon'n ganny enformen par en profesyonnel Lasante, ki i enportan ki bann madanm pa reste lo pilil kontraseptiv pou tro bokou lannen. Akoz pilil kontraseptiv ki osi en *hormone*, i kapab kontribye anver kanser tete.

I annan lezot kalite kontraseptiv ki i annan mwens lenpak lo lasante reproduktiv, ki bann madanm i kapab servi pou redwir risk ganny kanser.

I osi annan serten prosedir medikal ki servi radyasyon parey *X-ray* ek *CT Scan* ki kapab ogmant risk pou devlop kanser tete. Mr Speaker, ozordi i mon koleg Onorab Bastienne, demen i kapab nenport antre nou.

En zanmi oubyen en Manm fanmir. Mon oule raport mon sipor a ou Onorab Bastienne, e a tou bann dimoun ki pe viv avek kanser tete e lezot kalite kanser.

Lavi pa fini la. Mon dir zot tou kouraz. Swiv byen zot bann tretman e reste touzour pozitiv. Mon sipor i osi al ver bann travayer *Oncology Unit* pou zot devouman e travay dir ki zot pe fer.

Kontinyen donn sa bon swen nou bann pasyan. Mon ti a kontan rekomande ki *Health Care Agency* i kontinyen donn plis sipor *Oncology Unit*.

Pou zot kapab kontinyen delivre en bon servis a nou bann pasyan ki pe viv avek kanser. E osi, kontinyen investir dan bann lekipman modern pou detekte nenport ki kalite kanser, pli boner, e sa i a ede sov lavi bokou dimoun.

An termin an Mr Speaker mon oule donn mon langazman personnel e osi langazman tou Manm mon *Caucus*, ki nou pou kontinyen siport tou zefor pou

ed bann ki pe pas atraver sa moman difisil, koze par kanser.

E nou pou kontinyen met presyon lo bann Lotorite konsernen, pou amelyor lo deteksyon e osi lo tretman. Mersi Mr Speaker.

### **MR SPEAKER**

Mersi Onorab. Onorab Sandy Arissol.

### **HON SANDY ARISSOL**

Mersi Mr Speaker, bonn apre midi ankor enn fwa, bonn apre midi tou Manm.

Mr Speaker letan nou pe koz lo en size lasante, mon ti a kontan profite pou felisit Mr avek Mrs Balette pou zot 50an lanniverser maryaz ki nou'n vwar wikenn.

E mon ti a kontan anvi ki nou lo en Mosyon lasante, swet zot bonn sante touzour dan zot parkour. Mr Speaker, letan mon ti pe fer katesis lekòl, avek Per Rogatien, avek Per Marslin sa letan.

Zot ti dir ek nou o komansman, *Dieu* ti kree a *le ciel et la terre*. Apre *Dieu* ti kree *l'homme* a son *l'image*. La apre i ti beni zot e i ti dir avek zot miltipliye, *devenez nombreux, remplissez la terre*.

Apre i ti dir ek zot Mr Speaker, tou sa ki zot vwar dan

zarden, zot kapab servi koman nouritir.

Menm sa ki dan lanmer zot kapab konsonmen, menm sa ki pas par lao zot latet, sa ki anvole, zot kapab servi *comme* nouritir.

Me prezan kestyon ki demande, se kote kanser in antre, letan mon'n tann Onorab Aglae in donn nou sa dat, sa kantite lannen pase, depi son legzistans.

Eski nou'n aret manz sa ki ti dan zarden ki nou ti gannyen? Eski nou'n aret manz sa ki ti dan lanmer ki nou ti gannyen? Eski nou'n prodwir nou prop kalite manze ozordi, ki'n fer ki nou dans a sityasyon?

Larepons, mwan mon pa konnen, e mon asire plizyer nou pa konnen. Parske ozordi sa ki nou bezwen konsyan, se ki torti, li i fer 3 keksoz li Mr Speaker, i manze, i bwar, i dormi, marse apenn si i marse.

Selman li i viv 400zan dapre lasyans. Me nou zonm, fanm, nou kapab fer pli gran legzersis, al dan *gym* pli ser, vey nou ladyet, fer sir ki nou pe pran, vey nou ler dormi, me en bo zour, nou kapab ganny apwentman zis parey nou ser Onorab Bastienne in dik nou, ou ganny en apwentman ou al kot dokter, dokter i dir avek ou, Mr Arissol mon annan en move

nouvel, selman mon bezwen dir ou.

Ou'n ganny dekouver poudir i annan en kanser ki pe manz ou, konmela zot dir ek ou ki staz tou ki in arive, ki zistans i ete.

E menm parfwa, dokter i kapab dir ek ou, get sa, ou annan apepre 6 mwan pou ou viv e nou ti a kontan bann fanmir i donn ou sipor, oubyen si ou en pe envalid, zot transfer ou sa ki nou apel Lopital North East Point kot ou ganny bann dernyen swen, bann dernyen *care*.

E apre parey nou dir, ou rabat avek lavi e ou kit sa *monde*. Mr Speaker size ki nou pe koz lo la ozordi, i pa en size eksitan. Me i en size efreyan. Le 14 Fevriye 2011, mon ti perdi mon *baby brother* Savienne Arissol, ki ti annan selman 21an. I ti ganny *leukemia*.

E sa lannen le 20 Out i ti pou annan li 31an. Me parey nou dir, kanser i vir partou. I pa aköz ozordi nou pe koz lo, bann madanm in anmennen Mosyon lo kanser tete, aköz kekfwa zot annan en pe plis tete ki nou, zot in anmenn kanser tete. Non Mr Speaker.

Zot in anmenn Mosyon lo tete, parske, zis parey Onorab Lemiel in dir ek nou, sa i son mwan. Me kekfwa i ava annan

en mwan ki ava dedye pou kanser prostat, menm si zot napa prostat, bann madanm zot a siport nou lo sa Mosyon, zot ava koz lo la.

E zot ava prezant bann keksoz ki i annan dan zot distrik an relasyon avek sa. Me lesansyel ki nou'n fer ozordi, se ki nou'n kapab koman en Lasanble, koz lo en size ki pe afekte nou tou.

Pa aköz mon annan, pa aköz ou napa, be i en size ki afekte nou tou. Parske nou tou ki la dan Lasanble, nou annan en vwazen, nou annan en zanmi, nou annan en koleg travay, nou annan en fanmir oubyen nou partner, msye, madanm kekfwa ki pe viv avek kanser.

Oubyen ki'n viv avek kanser, me i pa'n kapab tenir, alor in ale in kit nou. E mon krwar tou bann pwen ki'n fer resorti ozordi Mr Speaker atraver tou bann entervenans.

Mon krwar i esansyel e mon krwar i enportan ki nou kit dan nou lespri, poudir menm *COVID* in vini, in fer en pe dezord, i annan kanser la deor, e i ankor pe ravaz nou pei.

Me selman i annan 3 pwen ki mon'n tann bann madanm koz lo la Mr Speaker, ki mon'n pran li koman 3 rezolisyon. Ki

letan mon'n ekout zot pe koze, mwan mon'n marke.

I annan sa enn ki Onorab Desheila in koz lo la, se lafason ki nou apros bann pasyan oubyen bann dimoun ki pe viv avek kanser. Ou konnen sa konpany ki dir ek ou, vin boner, detekte boner, pa esper lo dernyenrer.

Me selman i annan plizyer dimoun ki letan i vin devan avek en abnormalite, en bos dan kwen son likou, en groser anba son lebra. I vini li, parey Onorab Desheila in dir, i ganny trete parey en pasyan normal.

Me selman ki li in fer, in ekout lenstriksyon dokter li, in vin devan, in raporte. Parske zisteman pou kapab detekte boner.

Savedir sa ki mwan mon'n retire ladan, se sa ki nou pe dir avek bann Lotorite konsernen, Lasante. Get bann dimoun ki vin avek sa bann pti detay an plis avek en lot lizye.

Pa get li koman sa pasyan ki'n asize lo ban depi klinik ouver, in vini ozordi akoz i en Lendi bomaten, alor in bezwen vwar dokter. Annou get li avek en lizye spesyal.

Dezyenmman Mr Speaker, letan mon'n tann bann Manm koze, zot in koz an relasyon avek lapwentman. Mwan mon annan en msye ki reste La

Batie, mon pa mansyonn son non.

I ganny son apwentman, parske in ganny dir poudir en pasyan kanser. E ler i ariv son apwentman, zot dir ek li, non, non, dokter pa pe war dimoun ozordi.

In sorti tou sa zistans, in pey en transpor, in ariv kot Twa Zonn e in ganny dir poudir son apwentman in anvoye. "Be solman mon ti pe al *call* ou, mon pa ankor ganny sans *call* ou!"

Tousala i bann keksoz ki nou bann pasyan oubyen nou bann Seselwa i fer fas avek. So ozordi i en leokri dan Lasanble Nasyonal e nou pe dir ek bann lotorite konsernen, annou regard bann dimoun avek kanser, avek en lot lizye.

Letan i konsern son lapwentman, annou pa anvoy li demen tanto, annou pa dir li napa spesyalis, annou pa sey donn li en leskiz. Me annou gete ki mannyer avek sa pti gin resours nou kapab asiste zot.

Parske parey nou'n dir premye, in fer son bout, in vin devan, ou'n donn li son apwentman e li i santi poudir i pa konfortab don son lakok akoz i pe viv avek kanser. E nou tou nou konnen, kanser i pa parey Sida.

Sida ozordi ou kapab viv ou lavi *as if* ou napa Sida. Me kanser ler i poz lanmen lo ou, nou tou nou konnen, poudir i pa pou larg ou e normalman i gard ou pou en pti gin letan.

Be selman avek bann tretman ki ou gannye, ek sipor moral parey Onorab Desheila in dir nou, i kapab ed ou sirmont sa difikilte.

Mon trwazyenm e mon dernyen pwen Mr Speaker, ki mon'n tann bann madanm koz lo la ler zot in fer zot deliberasyon, se lo kote finansman.

Parey Onorab Jany in dir, i annan dimoun ki ozordi i en pasyan kanser, kekfwa apre ki in fer son *chemo*, i pa santi li kapab al travay ozordi. Kefkwa son lekor avek mon lekor pa parey. Rezistans, lafason ki i reakte, i pa kapab leve ozordi.

Kefkwa i ava enportan la, bann Minister pou zot koze, pou zot konnen lekel bann pasyan ki lo sa staz, ki pe fer tel tretman. Pou ki si zanmen i anmenn son pape oubyen leskiz, be li, zot a get li avek en lot lizye.

Me pa koman sa travayer ki pa abitye vin travay, i en donner poum e pe rod en leskiz. Tousala i sa ki mon'n tande ozordi Mr Speaker parmi bann madanm zot leokri.

Alor mwan pou fini Mr Speaker, mon ti a kontan prezant mon sipor lo Mosyon prezante par Onorab Esparon an diskisyon avek *Caucus* bann madanm e pou donn zot sipor, e pou osi don sipor tou bann dimoun ki pe viv avek kanser la deor.

E pou mwan osi senpatiz avek tou bann fanmir Seselwa. Nou bann Seselwa ki'n perdi en manm son fanmir, espesyalman bann zanfan, avek sa ki nou apel kanser.

Avek sa detrwa mo Mr Speaker, mon ti a kontan prezant mon sipor pou Mosyon prezante par Onorab Esparon. Mersi bokou.

### **MR SPEAKER**

Mersi Onorab. Mon ava envit Onorab Esparon ouver fer son rezime lo Mosyon silvouple.

### **HON REGINA ESPARON**

Mersi Mr Speaker. Bokou in ganny dir, me les mon fer konklizyon koumsa. I enportan ki Minister Lasante ansanm ek bann partner kle, zot rode kwa ki kapab ganny fer pou ranforsi sa ki deza an plas, ki byen.

E rode ki mannyer pou amelyor sa ki pa pe marse. mon'n koz ek enn de pasyan ki dir mon, ki *management* kanser li menm i bezwen ganny revwar.

*Training* pou *staff* e osi bann profesyonnel ki pe travay ek kanser, i neser ganny *update* tanzantan. Minister i bezwen investir dan *breast specialist*, ki ozordi napa.

Annan plis *oncologist*, revwar sa ki zot apel *critical medicine list* pou bann pasyan kanser. Revwar protokol tretman pou bann *relapse cases*, e vwar bann defayans ki kapab ganny adrese. Minister Lasante i bezwen anbark lo en *national screening program* ki pli regilye.

Si i dir ou toulezan, fer li toulezan. Aret anvoy dimoun pou pli tar, aköz pli tar i kapab kout lavi. Annan bann servis pli pre avek, anmenn bann servis pli pre ek kominote.

Ankouraz plis *self-examination*, plis sansibilizasyon atraver *family planning clinic* dan bann distrik. Kot i konsern *mammogram*, annan en dezyenm masin pou si sa enn pa marse, omwen i annan en *backup*.

E nou pa war nou ek en lalis espere pou en kantite letan. Ankouraz lezot prive, pou osi ofer sa servis. Mon lans en lapel ek medya pou annan plis program edikasyonnel lo size prevansyon.

E pou plis lorganizasyon non-gouvernmental, angaz zot

anver demars pou ed bann viktim ek kanser, en pe parey *Cancer Concern Association*.

Annou met plis lanfaz lo *after care*, parey nou ser Desheila in dir. Mr Speaker si nou kapab etablir en program deteksyon boner, *at primary health care level*.

I pou redwir *stress* pou sa pasyan, i pou redwir depans lo Gouvernman, pou anvoy pasyan trete. E i pou sov en kantite lavi.

An termin an mon swe se ki Minister Lasante ek Gouvernman i pran sa Mosyon koman en *wake-up call* e amelyor keksoz pou nou bann pasyan ki pe souvan, ki pe swiv tretman kanser.

Annou osi note ki detrwa lannen pase, *Caucus* Madanm ti deza koz lo sa size. Me napa gran keksoz ki'n sanze. Parski Gouvernman presedan pa'n pran sa an men pou adres bann keksoz ki nou ti met devan.

Mon lapel se annou gete kwa ki nou kapab, kwa ki kapab ganny fer dan *short term*. E kwa ki kapab vin bann *long term solution*. Mon ti a osi kontan salye travay ki bann ners kot *Hospice* pe fer.

Akoz zot osi zot fer fas ek en, ek bann dimoun. E pou zot sityasyon i pli difisil. Parski *Hospice* li i akey bann dimoun

ki *terminally ill*. Mon salye zot fer.

Pou ou Onorab Porice, moto dan nou lalit politik ti pa les tonbe, pa bes lebra, ou konnen ki ou kapab kont lo mon, 100 poursan, kouraz mon ser ! Avek sa 2 mo Mr Speaker, mon, (Onorab Desheila Bastienne eskize).

Avek sa 2 mo Mr Speaker, mon met sa Mosyon devan Lasanble pou aprouvasyon. Mersi.

### **MR SPEAKER**

Mersi Onorab Esparon. Mon ava azout mon sipor e mon lankourazman pou bann Manm lo zot demars lo sa Mosyon.

Avek sa mon ava envit bann Manm vot pou Mosyon. Me par formalite les mon lir Mosyon Onorab Esparon. I lir koumsa.

An vi sa gran logmantasyon dan lakantite ka kanser ki pe ganny detekte lo trwazyenm staz, sirtou kanser tete ki pe afekte bann madanm, sa Lasanble pe demann Gouvernman, atraver Minister Lasante pou anbank lo en programm agresiv pou detekte bann ka boner ki ava sov lavi.

Manm ki an faver Mosyon lev lanmen silvouple? Mersi, tou Manm in vote. Mosyon, vot lo Mosyon Onorab Esparon ki

mon fek lir, in ganny 32 vot pour, 0 vot kont e 0 abstansyon. Alor Mosyon in aprouve par Lasanble.

**(APPLAUSE)**

### **MR SPEAKER**

Bon mon a remersye bann Manm pou zot entervansyon.

Mon prezant mon regre avek Onorab William ki nou pa'n annan letan pou pran son Mosyon, nou a met li pou en lot zour osi vit ki posib. Nou pou pran en poz la e nou pou repran travay apre midi 2er.

E sa i ava lo *Unemployment Relief Scheme (Repeal) Bill, 2021*. Mersi.

**(BREAK)**

### **MR DEPUTY SPEAKER**

Bonn apre midi, tou Manm Onorab. Nou pou kontinyen avek nou *Order Paper* pour sa apre midi. E aprezan nou pou pas lo Mosyon, prezante par Onorab William. Donk nou ti ava envit li, pran *podium* pou prezant son Mosyon silvouple.

### **HON WAVEN WILLIAM**

Mersi Mr Speaker. Bonn apre midi tou dimoun ki a lekout. Mr Speaker Mosyon i lir *comme swivan*: -

Prenon kont fitir devlopman sekter rezidansyel e lekspektasyon nasyonal lo size lakaz ek later, sa Lasanble i demann Gouvernman pou revwar son Polisi e stratezi lo kalite lakaz ki pe ganny konstri e lo kriter alokasyon lakaz e kare later.

Mr Speaker avan koz lo Mosyon, mon ti a kontan fer de pti komanter;-

Enn se felisit Onorab Esparon pou son Mosyon bomaten. E dan sa moman kot nou pe selebre e komemor bann ka kanser. E mon osi anvi dir ki sa mwan i en mwan vreman spesyal, akoz nou fek selebre 15an lalit, pou laliberte lekspresyon e lenformasyon, Mr Speaker, boner sa mwan.

E mon osi dir ki ankor dan 6 zour en lot gro lanniverser, sa se sanzman dan gouvrenans pei.

**(APPLAUSE)**

**HON WAVEN WILLIAM**

Mr Speaker, mon krwar poudir sa Mosyon in ariv dan en bon moman, par lefe ki ou'n annan en sanzman Gouvernman.

E i annan bokou keksoz ki ozordi letan ou pe regard lelan devlopman ki pei in pran lo plizyer size, i annan sa nesese pou revwar.

E size sa Mosyon, i tonm dan kad enn sa bann revizyon ki nesese ozordi. Mr Speaker, tou dimoun i annan en rev, i annan en vizyon zot anvi form en fanmir, zot anvi ganny en lakaz, ouswa ganny en kare later.

Mr Speaker, mon'n annan sa gran plezir pou ganny sa leksperyans 26an dan politik, dan Grand Anse Mahé. E mwan mon fason ki mon pou entervenir i baze lo bann fe, leksperyans ki mon'n pas atraver pandan sa parkour, vizavi devlopman lakaz e later dan distrik.

Mr Speaker, mon rapel byen, '89 letan mon ti komanse, mon ti regard dan distrik Grand Anse Mahé akoz sa lepok nou ti ganny dir ki, ou bezwen konn pou distrik. E mon ti fer sir ki, mon ti kouver balizaz mon distrik e mon ti konpran vizyon sa lepok.

E mwan osi mon ti anvi, amenn sanzman dan lafason ki kalite lakaz ti ete dan distrik. Nou tou nou konnen bann lakaz kolonyal, bann vye lakaz e lanvironnman pou bann fanmir pa ti tro bon. E kot i byen parey mon dir, nou dir byen, kot i mal nou dir i mal.

E mon a dir ki ansyen Gouvernman, in fer en kantite lakaz, ansyen Gouvernman in



demark en bon pe kare later, ki fanmir Seselwa in gannyen.

Me i annan de moman kot, sa bann pratik pa'n byen ganny fer. Kot ou vwar ki in annan labi Mr Speaker, sa i en lot deba ki mon pa pou al ladan. Me lenportans sa Mosyon se ki enn, ler mon sa leksperyans devlopman lakaz anba bann diferan *Scheme* ki ansyen Gouvernman in met devan par egzanp nou pe koz *flat*, nou pe koz *social housing*.

Nou pe koz lo bann lakaz *semi-detached*, nou pe koz bann lakaz *self-help*, nou pe koz bann proze kondominyonm, proze 24-24. Bann diferan *Scheme Loan*, e nou pe koz lakaz *emergency*.

E ozordi nou pe koz lo *transit house*. Mr Speaker mon'n nonm tousala, pou demontre bann evolisyon. An menm tan osi vwar bann problemm, ki bann diferan fanmir zot in pas atraver.

Mr Speaker ozordi i annan sa nesesite pou Gouvernman revwar Polisi, revwar stratezi vizavi kalite lakaz, pe ganny konstri.

Mr Speaker nou dekouver osi ki bann lakaz ki'n ganny konstri ozordi, depi sa bann letan, in annan diferan kalite problemm. Par egzanp pli gro problemm ozordi se drenaz, ou

annan problemm ki annan pou fer avek desarz, lakaz ler nou pe koz lakwizin, lasanmben avek kabinen.

Mr Speaker, ler ou pran konsiderasyon bann planifikasyon ki pa'n ganny byen kalkile sa lepok. Ki ozordi avek nouvo devlopman i annan sa nesesite pou revwar. Avek devlopman teknolozi ozordi, nou bezwen amelyor lafason, ki planifikasyon e devlopman bann diferan proze i ganny fer.

Mr Speaker ozordi osi, i annan sa nesesite pou revwar bann lagreman ki'n ganny sinyen, pou bann dimoun ki pe aste, ensi ki pou bann dimoun, ki pe *rent*.

Akoz Mr Speaker ozordi, avek leksperyans, avek serten sa bann kondisyon ki ganny mete dan sa bann lagreman, i pa relevan. Mr Speaker par egzanp pou mwan i pa tro kler ozordi ki mannyer en dimoun ki reste lo *ground floor*, avek sa dimoun ki reste dan dezyenm letaz. Li i pe bezwen pey li anviron R800mil pou en lasanm, ouswa 2 lasanm, 3 lasanm ki anler lo dezyenm letaz konpare avek sa enn ki anba, ki annan en bout later. Me selman li ou vwar poudir son pri i anviron, apepre R300 ou 400mil.

Me solman zot tou zot bann *social housing* Mr Speaker. Mr Speaker ozordi osi, letan ou vwar poudir, i annan bann lakaz ki ti'n ganny fer 2 ou 3 ouswa 3 letaz. Mr Speaker ou mazine si i ariv en lensidan kot i annan dife, *emergency exit* Mr Speaker pa egziste dan laplipar.

E ou kapab imazinen, letan nou mazin sa dife ki fek pran resaman la kot *City Mart*. Ou mazin en dife ki ti kapab arive dan en *housing estate* aswar, kot ou annan bann dimoun pe dormi e ou annan bokou laflanm. Dimoun i kapab perdi lavi. So i annan sa nesesite pou revwar.

An menm tan Mr Speaker. Nou pe modernize, teknolozi i a nou laporte. Be *lift* pou bann vye dimoun ouswa bann dimoun ki mwen kapab. I nesese ozordi met sa bann fasilite.

Mr Speaker ozordi osi, pou bann gran fanmir, bann zanfan i annan bokou zanfan lo vilaz. E la mon mazin Barbarons, dan *Orchid Village*. Napa en landrwa pou bann zanfan zwe. E ou vwar poudir bann zanfan pe tay, taye pe *disturb* bann vwazen aköz dan planifikasyon - pa'n mete sa.

E Mr Speaker, osi lontan ki Lotorite konsernen ki annan pou fer avek konstrir lakaz,

donn later zot pa konsilte, zot pa konsilte ase avek bann dimoun ki'n ganny mete dan distrik, anba Lotorite Distrik, zot pa pou fer en bon travay.

Mr Speaker par egzantp ou vwar osi poudir, lekleraz dan bann vilaz, pa'n ganny fer byen e i annan sa nesesite pou revwar.

Mr Speaker mon koz osi ozordi avek devlopman. Tou dimoun ozordi pe aste li en pti transpor. I annan bokou bann *housing estate*, kot bann dimoun i bezwen *park* dan semen. E plizyer lensidan i kapab arive kot, ou annan bann plizyer ranze transpor, kot i kapab, enn kout lavi, aköz retar.

Mr Speaker, mon pe koz osi ozordi bann ki reste dan flat, pa kapab plante. Mr Speaker ler ou reste dan flat ou bezwen fri pwason, grat pwason, lav lenz dan en serten fason, ki apre en serten letan si ou pa pe okip byen sa *flat*, ouswa sa lakaz.

Mr Speaker i nesese ozordi konsider, met bann bout kot en *common area*, kot dimoun i kapab fer sa bann lezot pti aktivite, ki i pa, mon kapab dir afekte tro son lenfrastruktir son lakaz anndan, avek loder, sirtou.

Mr Speaker nou vwar osi ki, pa tou dimoun ki ozordi ki

ganny sa bann *social housing*, ki annan en *washing machine*. Me i ti pou enportan petet konsidere si landrwa i annan, met en *common area* kot dimoun i kapab lave. Akoz non, Mr Speaker?

Mr Speaker i annan plizyer keksoz ki mon kapab koz lo la, ki mon santi ki enn i annan nesesite pou revwar. Par egzanp, nou pran Lotorite ki administre bann *housing estate*, zot pa pe kapab ozordi enplimant bann diferan kondisyon bann lagreman ki'n ganny sinyen Mr Speaker.

Me nou vwar poudir i annan nesesite, pou revwar. Akoz letan en dimoun in ganny en lakaz, ozordi ou pa kapab met li deor. Ou, ou pa kapab met li deor, akoz sa dimoun in ganny mete dan sa lakaz akoz i bezwen.

Be i bezwen annan bann lezot keksoz ki i kapab ganny fer, pou kapab enn met dimoun dan lord. Me i annan en ta par egzanp tapaz lanmizik, ou annan bann diferan lezot keksoz ki vin en pti pe annwiyan.

Me ou vwar poudir sa *landlord* li menm li, *PMC* i pe fel en pti pe. Me i annan sa nesesite pou konsilte avek bann diferan *partner*, pou nou kapab sanz serten bann fason fer.

Mr Speaker nou pe koz osi la lo *maintenance* lakaz. Ozordi dan en ranze flat, twatir i konekte. En dimoun ki aste, avek enn ki pe pey *rent*, i demande, menm si ou pe dir li poudir be sa *common area* ozordi, konpare ek lontan li i sipoze peye pou repara.

I annan dimoun ki pe pey *rent* i dir ou be akfer mon bezwen kontribye, si mon pa pe aste sa flat. Ouswa si enn ki anvi repar son twatir i pou afekte sa lot.

*So the way forward*, nou pou bezwen revwar tou sa bann keksoz. Eski nou met li ansanm ouswa nou fer sir i annan bann separasyon. Si enn i anvi bouze, lot pa anvi bouze, ki annan en *common ground*.

Mr Speaker mon pou osi azoute ki i annan nesesite, nesesite pou en bon planifikasyon. Par egzanp, si mon pran bann lakaz ki'n ganny fer dan *land bank* Barbarons. Ozordi Mr Speaker, dan laplipar nou annan bann gro problem drenaz. Akoz, sa lepok sete fer lakaz, ou trouv *JCB* ki antre lo teren, i aplati, kare later i ganny tire, epi semen i ganny fer.

Mr Speaker delo ozordi pe afekte en mazorite sa bann lakaz. E si bann dimoun ki'n aste zot kare later, zot napa

listwar lo sa, lo sa *parcel* later lo ki zot in vin lo la, Mr Speaker, i vin en gro problem;- en gro problem pou zot e zot lenvestisman i pa *secure* Mr Speaker.

E ou demande pli tar, be sa bann dimoun ki'n aste ki rekour zot annan, akoz bokou ozordi la i vremen konsernen avek sa sityasyon.

Mr Speaker osi mon pou al lo sa lot size ki apel *emergency house*, ouswa *transit house*. Ler ou get dele letan ki'n ganny donnen pou sa bann dimoun bouze, Mr Speaker si mon memwar i bon, en dimoun i kapab pran li plis ki 1an.

E ou vwar poudir sityasyon osi dan sa bann *estate* ki konsern *emergency house* ozordi, i annan nesesite ganny revwar. I annan nesesite ganny revwar, akoz lafason ki sa bann lakaz i ganny fer - enn, epi landrwa ki ganny swazir pou met sa bann lakaz.

Eski lakantite ozordi nou pe mazin mete dan sak distrik, o bor kanmarad, i devret? Ouswa nou devret revwar lafason ki nou fer sa bann diferan konstriksiyon?

Mr Speaker tou sa bann keksoz ki mon'n nonmen, i bann leksperyans, ki bann plizyer zabitan ozordi, pe fer fas avek. E avan terminen Mr

Speaker, mon ti a kontan ki nouvo Gouvernman i revwar, i revwar Polisi avek stratezi dan nouvo lapros vizavi alokasyon lakaz, ouswa fer lakaz.

Ozordi teknoloji in montre nou poudir, pri ki bann dimoun pe pey lakaz, i annan serten materyo konstriksiyon ozordi ki kapab ganny ranplase, ki kapab redwir, par lanmwatye sa pri lakaz Mr Speaker.

Mon kontan ki nouvo Gouvernman pe pans lo la. I annan bann dimoun ki deza pe diskrit lo la, e zot anvil fer bann, bann, bann *pilot projects*. Mr Speaker bokou nou bann fanmir, zot pe vwar zot enn pti pe dan lanbara, letan zot in fini pey zot *loan*.

E i annan bokou fanmir osi ki pe aspire ganny zot lakaz, ouswa pou aste en kare later. Ozordi letan ou regard kou konstriksiyon Mr Speaker i efreyan.

Mon rapel 2015, nou ti ganny dir poudir, par met kare i kout anviron 8000 a R10mil pou fer en lakaz. Me ozordi Mr Speaker letan mon'n verifeye, zot pe koz anviron 12mil a R16mil par met kare.

Mr Speaker avek sa sityasyon pandemik e lekonomi mondyal ki'n ganny afekte, Sesel pa en leksepsyon, mon pe dir ki nouvo Gouvernman pou

bezwen, pou bezwen revwar lafason ki bann lakaz ouswa revwar lafason, si nou pa kapab adopte bann nouvo teknolozi. E avek nouvo materyo konstriksyon, pou nou kapab fasilite bann dimoun, bann fanmir, ki pe aspire pou zot fer en lakaz.

Mr Speaker osi, letan nou pe koz devlopman, Mr Speaker mwan, mon annan en lenkyetid ozordi. Lenkyetid akoz lefe ki nou en Pti Leta Zil. Ou annan bann landrwa kot dansite konstriksyon i vremen bokou. E ozordi Mr Speaker, lizye pa trouve.

Me solman nou tou nou konnen poudir polisyon, atraver bann desarz, nou tou konnen poudir dan plato ler i annan gro lapli, i annan inondasyon lanmer, ou annan lanmer mont, desarz Mr Speaker pe al dan lanmer, desarz desann dan larivyer, dan lanmar e dan lanmer.

Mr Speaker i pa zis sa, i annan osi devlopman vizavi lagrikiltir. Tousala pe azout ansanm Mr Speaker, ki si koman en pei, ki nou depan lo lanmer, ki nou depan lo lanvironnman, nou depan lo Sekter Tourizm Mr Speaker, mwan santi poudir sa dan lavenir i devret en gro priyorite pou Gouvernman *du jour*.

Mr Speaker avek sa de pti mon, mon krwar mon'n koz ase lo la, ver sa nesesite, sa nesesite ozordi pou revwar tou sa bann keksoz. Mersi Mr Speaker. Mon demann tou bann Manm pou donn mwan sipor, lo sa Mosyon. Mersi.

**(APPLAUSE)**

**MR DEPUTY SPEAKER**

Mersi Onorab. E aprezan mon ava demande lekel ki pou segonn Mosyon Onorab William. Onorab Monthy.

**HON PHILIP MONTHY**

Mersi Mr Speaker. Mosyon i ganny segonde. E mon ti a voudre entervenir en pe pli tar lo Mosyon. Mersi.

**MR DEPUTY SPEAKER**

Sertennman. E alor mon pou donn laparol *Leader of Government Business* Onorab Bernard Georges.

**HON BERNARD GEORGES**

Mersi. Mersi Mr Speaker. Bonn apre midi Mr Speaker, bonn apre midi tou mon bann koleg isi dan Lasanble e tou dimoun ki pe swiv nou.

Mr Speaker mon pa kapab pa pran laparol lo en size osi enportan, e osi pertinan ki sa enn ki devan nou la ozordi. E

mon felisit Onorab William pou prevwayans pou anmenn sa, sa Mosyon apre midi.

Mon konnen ki sa, sa Mosyon i tous nou tou, akoz nou tou ki responsab dan distrik, oubyen nou tou ki bann Manm proporsyonnel ki responsab lo nivo nasyonal, nou annan sa preokipasyon, ki zanmen nou kapab annan sifizaman lakaz avek later, lozman pou bann demander.

E nou pou bezwen a en serten moman. E mon krwar sa moman i la koman en Nasyon, ansanm san regard politik, met zefor ansanm pou kas sa serk visye, kot toultan nou pe tay deryer lakaz. E zanmen lakaz i sifizan, pou bann demander.

Nou pa kapab a *vitam aeternam* lannen ale, lannen vini annan menm problem toultan. Nou bezwen trouv en solisyon pour nou kapab rezourd sa problem en fwa pour tou. Pour ki bann dimoun pa bezwen esper, 10, 15, 20an pou zot ganny en lakaz.

E apre, ler zot ganny en lakaz, onnetman oubyen dan en fason forse zot bezwen, al lo televizyon e dir, i annan 15 an mon pe esper en lakaz mon remersye sa Gouvernman. *Whatever* Gouvernman i ete, sa enn avan, oubyen sa enn ozordi pour, pou donn mwan en lakaz.

Mon krwar nou bezwen sorti dan sa serk e Onorab William in donn nou en pti pe en apersi lo ki mannyer nou kapab sorti dan sa serk visye. E sa se ki nou bezwen fer keksoz dan en fason diferan.

Mon krwar ki sa Gouvernman la, enn son bann priyorite. I pou bezwen pou li kapab anmenn bann solisyon a en problem ki nou pa'n kapab rezourd depi en kantite letan.

E mon partaz sa ki Onorab William in dir, ki bann Gouvernman par lepase, in fer bokou, pou *build* lakaz pou nou person pa kapab renye sa. I en fe. E nou bezwen, e nou bezwen aksepte, aksepte sa fe.

Malgre ki, dan mon distrik Les Mamelles, nou'n ganny eparnye avek, avek sa bann konstriksyon. E ziska prezan lo *Scheme 24-24-24* nou'n ganny nou 8. Me lezot in benefisye. E mon kontan pou zot.

Mr Speaker mon krwar sa ki, sa ki nou bezwen fer la ozordi se *move away* - sorti dan sa *mindset* ki se Gouvernman ki bezwen fer lakaz pou dimoun. Mon krwar sa se enn nou bann premye priyorite.

Wi Gouvernman in bezwen entervenir dan lepase. Zis apre lendepandans Gouvernman in bezwen entervenir direktman, pou li

fer lakaz, akoz ti annan en mankman konsiderab lozman.

Avek en popilasyon ki ti pe, non-selman grandi, me ki ti pe vin, mwen, plis eze. Ti pe ganny plis larzan, Gouvernman ti bezwen entervenir pou *build* lakaz. Sa personn pa, pa renye.

Me ozordi kot nou'n arive, mon krwar nou bezwen *move* lo en lot nivo. E se, se nepli Gouvernman ki bezwen responsab pou fer lozman dan nou pei.

Mon krwar sa, sa moman ozordi kot nou'n arive si nou anvi kas sa serk visye, Gouvernman i bezwen sorti dan konstriksyon tou lakaz e reste dan konstriksyon en serten kategori lakaz. E se sa mon propozisyon mwan.

Nou'n vwar-nou'n vwar avек letan ki'n pase, ki bann lakaz ki Gouvernman pe fer i deplizanpli, pli zoli. I deplizanpli pli byen fer, i deplizanpli annan bann keksoz ki ti napa avan. *Built-in wardrobe, tiles* ater, bann lasal de ben konvenab eksetera, eksetera.

Donk nou'n vwar ki'n annan en evolisyon anmezir ki nou popilasyon in vin pli eze, zot demann in osi agrandi. Alor kot Gouvernman ti entervenir pou fer *social housing* a en serten moman, ozordi

Gouvernman pa pe fer *social housing*.

Gouvernman pe fer *housing*, ki lo menm nivo, ki bann investiser prive pe fer. E mon krwar la se la kot nou vwar kot diferans i vini.

Avek menm kalite, ou preski menm kalite konstriksyon, avек *finishing*, sekter prive li i pe lwe en lakaz, de lasanm, 10, 15, R20mil. Annan de fwa menm plis ki R20mi. Tandis ki, lo kote Gouvernman, bann dimoun i ankor pe aste bann lakaz e pe pey annan de fwa mwens ki 1000, annan de fwa 1000, annan de fwa R2000, par mwan.

Donk i annan en, en keksoz ki pa balanse. I annan en *imbalance*, ki mon krwar nou devret, nou devret kapab rezourd. E selon mwan, sa nouvo Polisi ki mwan mon ti a swete ki sa Gouvernman i adopte se, en Polisi kot i bezwen fer en distenksyon, ant *social housing* avек lezot kalite *housing*.

Mon pa pou tous *land bank*, later, eksetera, sa malgre ki annan en kantite pou koze lo la. E malgre ki sa i tonm dan konteks sa Mosyon ki devan nou, akoz letan pa permet - me permet mwan Mr Speaker, reste zis lo sa zafer lakaz.

Gouvernman mon krwar i annan en responsabilite pou li fer *social housing*.

E *social housing*, i bezwen *social housing*. Eskiz mwan, me en bon pe bann lakaz ki Gouvernman pe fer ozordi, dan konteks *social housing* i pa vreman *social housing*.

Se bann lakaz ki nenport ki zenn koup, dan nenport ki pei lemonn ti ava kontan annan koman zot premye lakaz, oubyen menm koman zot lakaz eternalman.

E donk Gouvernman, pa devret - mon pa krwar pe sibvansyon sa bann kalite konstriksyon.

Mon apel Mr Speaker mon ti anmenn en zanmi sorti Kenya vizit mon distrik. E nou ti pe *drive* anler. E mon ti pe montre li bann lakaz, bann nouvo flat ki'n ganny fer anler dan *Upper Les Mamelles*, e mon'n dir li sa se Program *Social Housing* Gouvernman.

E i dir mwan, be eskiz mwan sa i pa *social housing* ditou sa! Sa napa nanryen pou vwar avek *social housing*. Sa se *good quality housing*. Se *housing* en bann dimoun *middleclass*. E nou, e nou sosyete in vin en sosyete *middleclass*. E nou sosyete in vin en *high income earning country*.

Alor nou bezwen, nou osi asim nou bann responsabilite, san ki bann ki bezwen, i tonm deryer. E sa fodre, nou fer li, nou fer li byen kler.

Gouvernman i bezwen kontinyelman investir dan *social housing*, me i pa *job* Gouvernman pou li investir dan *housing* ki bann sekter prive, i kapab investir ladan.

Bokou dimoun ava mazin, be ah, be la sa ki pe arive se ki olye rezourd problem. Nou pe al an aryer. Non Mr Speaker, mon krwar pa. E les mwan eksplike aköz.

Resaman ler Minis Rangasamy in vizit Les Mamelles, dan nou *mindset* aköz sete sa, Program Redevlopman Gouvernman lepase. Dan nou *mindset*, *including* pou mwan, sa ki nou ti pou fer se nou ti pou demoli bann lakaz ki la depi letan kolonyal e ranplas zot par bann *tower blocks*. Bann lakaz letaz, parey nou'n fer dan *Upper Les Mamelles*.

Me nou pa ti'n mazin de keksoz. Premyerman, kou *obviously* i ti pou gran. Me dezyenman bokou bann dimoun ki pe reste dan sa bann lakaz, pa neserman anvi sorti e al dan en lot kalite lakaz.

Sa ki zot ti a prefere se zot lakaz i ganny repare, zot ganny



en pti lavarang devan, zot ganny *extension* deryer, zot lakaz i ganny refer. Bann nouvo lafnet, en meyer twa eksetera. Se sa ki zot ti anvi, akoz non selman zot abitye.

Me *at the same time* i pa pou kout zot, pour zot al dan en lot landrwa e rekomans pey en *loan* ankor enn fwa. E nou bezwen konsyan lavolonte sa bann dimoun. Donk, pou mwan i annan definitivman en sekter kot - e mon konnen ki, mon konnen ki sa ki mon pou al dir la, i riske ganny mal konpran, so konpran mwan byen.

Nou bezwen annan plizyer nivo *housing* dan nou pei. I annan serten dimoun ki, par egzanp in ariv laz retret, oubyen, oubyen set en dimoun ki annan mwayen modes. Me ki bezwen en lakaz, e ou annan en lot, o bor li ou annan en zenn koup ki tou lede i travay. E zot travay dan bann, dan bann sekter ki kot zot ganny en bon saler. Enn i kapab *afford* en lakaz, lot pa kapab.

Me tou lede i ganny menm kantite, menm kalite lakaz. E Gouvernman i bezwen sibvansyonnn enn, oubyen donn priorite enn, ki kekfw a en lot ti ava prefere annan. E nou tou, si nou, si nou senser avek nou lekor, nou tou dan nou distrik nou'n bezwen annan sa bann

problemm. E nou'n bezwen fer fas, avek swazir enn, oubyen en lot. E sa bann swa zanmen i fasil.

Alors si nou annan, diferan kalite lakaz nou ava kapab ofer en dimoun lakaz ki al dapre son mwayen. E kot bann i kapab peye, zot devret peye kot bann ki pa kapab peye, pa devret peye. Se sa mon krwar, sa ki nou devret pe anvizaze. E se sa ki mwan mon pe *préconiser*.

So alor lekel ki pou fer, sa bann lakaz ki Gouvernman ziska prezan pe fer? Bann zoli lakaz, bann nouvo blok ki parey sa enn, 8 lakaz dan mon distrik. Mwan mon ti a kontan propoz avek Gouvernman. E mon pa pe fer li dan vid.

Mon'n koze avek bann, bann konpanyen konstriksyon. Mwan mon ti a kontan propoz avek Gouvernman en sistenm *PPP*.

*Public Private Partnership* oubyen en *Private Public Partnership*. Gouvernman donn later, les sa kontrakter li al rod larzan, Gouvernman pa pou bezwen esper *La Chine*, oubyen *L'Inde* oubyen al demann larzan, oubyen met larzan Bidze. Les sa kontrakter al rode.

Donn li sa kalite konstriksyon ki i devret fer, les

Gouvernman vin en fasilitater anver bann labank. Olye *PMC*, olye bezwen peye pandan 4, 5, 6, 10an, 15an pou ou mont lo lalis, les nenport ki kapab e ki bezwen antre dan en *Scheme*, kot i ava aste son lakaz atraver en *loan* pandan 20an, ou 30an ki Gouvernman ava *facilitate* avek labank.

E personn pa pou annan en problem. Gouvernman pa pou bezwen tir dimoun, donn zot lakaz. Se labank ki pou annan sa responsabilite. Bann dimoun pa pou bezwen pey, 10,15 R20mil. Akoz en lakaz R1milyon, dapre bann statistik ki Onorab William in dir, si ou *borrow* en larzan avek en labank e ou pey li lo 20-30an. Ou pou *still* pey apepre 2000-R2500 ou *loan* par mwan.

So i pa pou, i pa pou *break the bank*. I pa pou fer ki bann dimoun pa pou kapab annan lakaz. Gouvernman i sorti ladan, e bann kontrakter ava *build* a zot *speed* ki nou, nou konnen i pou bokou pli vit, ki *speed* Gouvernman. Akoz zot pou annan en lentere pou zot *build*, pou zot vann, pou zot tir zot larzan e dimoun i ava kapab ganny zot lozman.

Vwala sa ki mwan mon pe propoze Mr Speaker. Akoz, avek en tel sistenm kot dimoun pou *own* zot lakaz, ou pou nepli

annan sa bann problem ki Onorab William in mansyonnen e ki nou tou nou konnen.

Ou pa pou annan problem kot en dimoun, in fer in aranz son lakaz. In met *tiles*, i zoli, in sanz lafnet, i pe viv byen. E *right next door* avek li i annan en dimoun ki, ni en karpet in pa'n mete lo son estik ater. Ni en lili i napa. E nou annan sa.

Ou bezwen, ou bezwen kapab annan en sistenm, kot oubyen en bann blok, tou dimoun i *look after* zot flat. E en lot blok o bor, personn pa fer li e vin en nespes gento.

Nou pa kapab annan sa kalite sistenm, mon krwar nou bezwen bouze. E sel fason pou nou bouze se fer dimoun kontan sa ki zot annan. Akoz zot pe peye pou sa ki zot annan en zot pa pe ganny li koman en faver ki Gouvernman in fer.

Nou pou, nou nepli kapab Mr Speaker dan venteenyenm syek, vin en sosyete kot ler ou bezwen en lakaz, ou met ou non lo en lalis, ou espere. Apre en zour ou ganny en *call* ou ganny en lakle.

Nou nepli kapab reste dan sa kalite sistenm. Nou bezwen sanze. E nou bezwen en sistenm kot dimoun pa pou bezwen espere, e kot Gouvernman i kapab delivre lo

son promes e kas sa serk visye ki nou'n viv ladan pandan 40an.

Annou aksepte ki enn bann rezon ki Gouvernman ti kontan kontrol lakaz parey nou konnen - mon pa anvi fer politik akoz parey mon'n dir taler, sa se en size ki tous nou tou.

E mon ti a kontan ki nou tou nou met zefor ansanm pou nou kapab ariv a en solisyon. Me nou bezwen aksepte ki lakaz ti ganny servi koman en zouti politik dan lefase.

Annou pa repet sa fot, annou pa ozordi fer lakaz vin en zouti politik pou bann dimoun ki o pouvwar ozordi. Annou fer en fason kot tou dimoun pou annan. Sa ki bezwen i ava ganny selon son mwayen, e selon son bezwen.

Alor Mr Speaker, an konklizyon e mon remersye ou pou donn mwan laparol boner ozordi, mon ti a kontan, ki bann dimoun parey madanm Dorisyia Albert anler, Brillant pa pou bezwen esper 14an pou dan en *emergency house*, pou li kapab ganny en lakaz konvenab;- ki sa bann keksoz i ava bann keksoz dan lefase.

Kot bann dimoun ki bezwen, ava kapab *afford* en lakaz selon zot mwayen. Bann ki anvi enn en pe pli *top part*, i ava osi zot osi annan sa, dapre

en sistenm kot Gouvernman ava responsab pou fer bann *social housing*.

Me i ava les Sekter Prive avek son sipor, avek son *l'appui*, fer bann lezot lakaz. E dan en fason ou en lot, met sa problenm lakaz deryer nou, *once and for all*. Mon remersye ou Mr Speaker.

**(APPLAUSE)**

### **MR DEPUTY SPEAKER**

Mersi Onorab Georges. Byen koze, fer byen konpran. Letan pa dan nou faver. Nou ti oule fini sa Mosyon ozordi. E nou travay ziska 5er normalman.

Letan mon pe get lalis la, zis bann *MNA LDS* ki'n edike zot oule koze. *Unless*, i annan en Manm *US* ki mon'n mank son lanmen. Mon ti ava apresye, si ou ti ava endike zot le koz la.

I annan 12 Manm *LDS* ki'n edik zot letan. *So* anba *Order 57(11)*, mon pou set en *time limit*, akoz lakantite Manm ki'n endik zot lentansyon pou koze. Mon pou donn sakenn 10minit. E alor nou pou *proceed*, Onorab Georges Romain, *next* ziska 2.51. Mersi.

### **HON GEORGE ROMAIN**

Mersi Mr Speaker. Bonn apre midi Mr Speaker. Bonn apre

midi tou koleg Onorab e tou dimoun a lekout.

Mr Speaker, mon ti a kontan kontribye enn de pwen lo Mosyon ki Onorab William, in anmennen. Akoz nou pe koz lo bann Polisi ki an plas ozordi, ki gid lafason ki Gouvernman i asiste fanmir pou ganny lakaz ek later.

E petet pou nou kapab revwar serten Polisi ki ava kapab amelyor sa sistenm ki an plas, pou donn bann tel lasistans. Ozordi striktir ki an plas i afekte bokou endividi, ki pe rod en bout later ouswa en lakaz. E ki annan bokou fwa sa bann dimoun i vwar zot pe esper en kantite letan.

Mr Speaker en lakaz oubyen en bout later i en keksoz i en keksoz ki tou fanmir i reve pou annan. E Gouvernman atraver son bann Polisi, in met anmars bokou striktir pou ed fanmir kapab *attend* zot rev.

E mon konnen ki nou Gouvernman, in priyoritiz sa, dan son bann stratezi pou ed fanmir ki dan bezwen pou en lozman. Me parkont, mon krwar ki annan enn de pti keksoz ki Gouvernman ansanm avek lakominote i devret kapab fer pou amelyor sa prosesis.

Premyerman Mr Speaker, mon senserman krwar

ki *MLH*, i merit vin pli azour avek kantite dimoun ki pe rod lakaz ek later. Wi nou rekonnet ki zot in antre lo en platform *digital*, pou amelyor dokimantasyon e rikord lo bann aplikasyon ki'n ganny fer.

Me parkont sa sistenm i ankor serten defayans, akoz i ankor pe pran bokou letan, pou ganny serten lenformasyon, lo bann aplikan ki'n fer demann pou lakaz ek later. Sa bann dimoun i vwar zot bezwen pe refer laplikasyon, e remet laliny ankor e sa i kree bokou fristrasyon.

Mr Speaker, i annan bokou osi ki krwar ki annan keksoz mal avek kriter ki'n servi dan lepase pou donn lakaz. Par egzantp, fer dalon pas avan lo lalis, donn lakaz bann dimoun ki ti'n deza annan lakaz, me in deside lwe, ou vann. E prezan tap laport Gouvernman pou rod lasistans pou en lot lakaz.

E alor i enportan pou nou fer sir, ki sa bann move pratik, i pa kontinyen pou nou kapab reganny konfyans avek manm piblik.

Mr Speaker pandan mon vizit dan distrik, mon'n rankontre bokou bann zenn profesyonnel ki ankor reste avek zot paran. E zot anvi konstrir zot prop lakaz. Paran in donn zot en bout later o bor

kot zot, me parkont lwe zot fer demars pou ganny *loan* ek *HFC*, la zot ganny difikilte pou ganny ase larzan, pou fer zot konstriksyon.

Petet in ler pou reevalye sa sityasyon, aköz nou merit mazine, ki ler nou ed en zenn koup. Sa i pou ede pou redwir presyon lo lalis later ek lakaz dan sistenm. E sa fanmir i a ganny asiste, bokou pli vit ki si i ti pou bezwen al aste en bout later, pey sa *loan* later e rebran en lot *loan* pou fer lakaz.

Petet Gouvernman ti kapab vin ek en *Scheme* spesifik, pou ankouraz bann paran ozordi ki annan sa mwayen, pou donn zot zanfan en bout later. En tel *Scheme* ti a kapab petet ganny konsidere, ler en *loan* pe ganny pran pou fer lakaz sa bann zenn.

Mr Speaker ler en lakaz i brile, en kominote e Gouvernman i zwenn ansanm, pou donn lasistans sa fanmir dan en moman detres. E la nou vwar dan Anse Etoile, lo Ile Aurore kot Minis in prononse ki zot pe fer en proze *20unit* lakaz, ki pou, ki pou la koman en *back up*, pou asiste bann fanmir tanporerman dan en leta dirzans, tel parey nou annan Barbarons.

Sa i en bon linisyativ ki Gouvernman in vin avek. Mr

Speaker aköz sa i a ede, pou asiste dimoun pli vit e osi koup kou pou rod lezot landrwa reste pou bann fanmir.

Me Mr Speaker ozordi i enportan pou nou pa zis depan lo Gouvernman, me osi fanmir ki kapab. E annan mwayen i merit koste ansanm pou ed lezot manm fanmir ki an bezwen, dan sa bann moman detres.

Kot fanmir i vremen pa kapab, Gouvernman merit kapab kontinyen donn lasistans.

Me kot larestan i kapab, mon lans en lapel, pou nou ed nou fanmir dan bann tel moman difisil. E pa les tou lo ledou Gouvernman.

En lot eleman ki ti pou definitivman soulaz en fanmir ki'n vin viktim en lakaz ki'n brile, se en lasirans Mr Speaker. Mon krwar ki, mon krwar i esansyel ki tou dimoun ki annan en lakaz i merit annan en lasirans pou kouver en tel, evantyalite ki i perdi son lakaz. Aköz i kout bokou, pou fer lakaz Mr Speaker.

Lo kote later Mr Speaker. dan mon vizit dan distrik, mon'n remarke ki annan bann bout later endividi, ki pou Gouvernman, me ki napa okenn devlopman e personn pa pe okip sa landrwa. E sa

landrwa in atir bann aktivite anti sosyal, ki i pa bon pou lakominote.

Alors, mon pe rekomande si sa Minister i kapab fer en *survey*, pou konnen ki kantite later ki annan dan bann diferan distrik. E an retour i kapab vann piblik ki'n fer laplikasyon pou later. Sa osi i ava ede, pou akseler sa prosesis donn later.

Mr Speaker, lafason ki Gouvernman pe donn later. E parfwa nou vwar ki sa pe tro tarde. Par egzanp nou annan 35 bout later ki'n fini pare, dan *land bank* La Gogue. E sa bann aplikan in fini ganny zot let, an bon pe letan pase. Me parkont zot ankor pe espere, pou ganny zot bout later.

Me lenfrastriktir *PUC* pe pran letan pou materyalize. Alors Mr Speaker tousala i ede pou met retar. Bann aplikan, ti'n kapab ganny zot bout later, e komans debrouye antretan ki zot pe esper *PUC*. Zot ti a kapab pe netway zot teren, e sa ki annan son mwayen pou komans konstriksyon, i ti a kapab komanse.

Bann ki pou pran *loan* zot kapab komans fer zot aplikasyon. Tousala i ava ede pou tir sa fristrasyon ki pa neser. Me Gouvernman li i espere, i pe esper tou

lenfrastriktir fini ganny avan ki i *allocate* later.

Mon ti a kontan Minister konsernen i revwar lafason ki zot donn later *land bank*, dan en fason pli vit e pli efikas. E an menm tan manm piblik, i merit ganny sansibilize, pou ed zot konpran lafason ki sa bann prosedir i marse.

Mr Speaker avan mon terminen, mon oule osi felisit tou travayer *MLH*, *HFC* e *PMC* ki pe travay tre dir pou asiste fanmir avek zot bann bezwen. Me nou konnen osi, ki annan ki pe kontinyelman met retar pou kree fristrasyon dan piblik.

Alors mon demann Lotorite konsernen, pou idantifye sa bann blokaz, e pran aksyon avek bann ki pe dormi lo *file*, pou met retar dan sistenm.

Mr Speaker, mon rev se pou vwar tou Seselwa kapab ganny son prop lakaz ki pe espere. E viv dan lape, dan kominote. Mersi Mr Speaker.

### **MR DEPUTY SPEAKER**

Mersi Onorab Romain. Mersi pou sa lekonomi 3 minit ki ou'n fer pou nou. Onorab Labonte *you're next*. 10 minit.

### **HON ANDY LABONTE**

Mersi Mr Speaker. Bonn apre midi tou Manm, koleg Onorab.

Bonn apre midi tou sa ki a lekout. E en bonn apre midi spesyal, tou zabitan La Riviere Anglaise. E tou pasyan ki pe soufer avek kanser e zot fanmir, ki'n perdi en pros avek sa maladi.

Mr Speaker sa Mosyon, i en Mosyon ki pou ede enspir Gouvernman. E donn direksyon lo lenpak striktir devlopman e vizyon lenfrastriktir, kalite lakaz ki nou ti ava swete pou nou sosyete dan lefitir.

Ler nou pe koz lo lakaz ek later, i enn parmi bann bezwen vreman esansyel pou batir en sosyete ki solid. E permet bann fanmir, viv dan en fason sivilize e an bonn sante.

Tou imen i bezwen en landrwa repoze, apre en lazournen byen sarze si non prodiktivite pa pou alaoter. Me sa Mosyon, pe koz lo fitir devlopman sekter rezidansyel e lakseptasyon nasyonal lo size lakaz ek later.

I vreman enportan ki nou pran kont plizyer laspe, ler nou pe koz lo devlopman ek fitir en Nasyon. Me mon regard sa Mosyon, an de parti.

Premyerman i pe demann, Gouvernman pou revwar son Polisi e stratezi lo kalite lakaz ki pou ganny konstrir dan Sesel. Mon krwar i vreman enportan, aköz mazorite dimoun ki mon

koz avek ki an bezwen en fwaye, zot eksprimen ki lesansyel, se annan en twa lo zot latet.

Alors i remarkab ki zot pa pe demann *deluxe*. Me en lakaz ki abordab, dirab, san okenn lenkonvenyans. E ki valer pou sa larzan, ki zot pe ganny demande pou peye.

La nou koz bann lakaz bann lakaz *low cost, modern* parey Kreol i dir. Me i nepli tan, pou nou fer bann lakaz sitan sofistike e ekstravagan, ki apre sa bann tarif repeyman i tro egzorbitan pou en fanmir ordiner kapab *afford*.

Dan mon distrik la Rivière Anglaise, lalis lakaz ek later i sitan long. Parkont nou konnen ki serten endividi, ki mye eze, oubyen ki'n fer zot *saving*, zot kapab *afford* en lakaz ki lo en nivo repeyman, pli eleve.

Me pa aköz ki zot kapab, *afford* en lakaz ki lo en baz, pli eleve ki zot bezwen pey kabri dan sak. Plizyer fwa mon'n tann bann lo lot kote latab, koz kabri dan sak. Me mon pou donn zot en legzanp tipik, kot nou zabitan in pey kabri dan sak.

Mon pran en legzanp dan mon distrik kot *Condominium*, Chateau Vallon, Union Vale. Depi zour ki zot in antre ladan, ziska ozordi, sa bann zabitan zot pe rankontre tou sord kalite

difikilte. Basen delo koule dan plafon, lapli fwete ranpli lakaz, balkon kase, problemm *wiring*, desarz ou vwazen i rann lapel dan ou twalet. E bokou lezot ankor.

Mon annan zabitan ki dan flat, e zot flat i koule depi premye zour ki zot in antre ladan. Problemn zanmen in rezourd. Zot ganny anvoye demen, tanto. Me apre ki zot in fini peye, zot ganny dir ki sa i zot problemn e pa problemn Gouvernman. E Gouvernman i fer reparasyon, e zot ganny demande pou pey en pri egzorbitan konmsi zot pe aste en nouvo lakaz.

Mr Speaker se pour sa rezon ki Gouvernman *LDS* pa kapab repet bann menm fot. Me bezwen plito fer sa ki sa Mosyon pe demande e revwar kalite lakaz ki pe ganny konstrir pou nou zabitan.

Mon ti ava swete ki Gouvernman *du jour*, i konsider travay an partenarya, avek bann kontrakter ek bann biznes ki dan sa sekter konstriksiyon, en pe parey ki Onorab *LGB* in koz lo la.

Akoz i annan bokou kontrakter, ou endividi la deor ki'n pare pou zot al rod finansman, konstrir lakaz e vann avek bann endividi lo en baz abordab. Akoz i annan

bokou ki'n pare pou fer sa, senpleman zot pe demande ki Gouvernman i met later a zot dispozisyon.

E pou rezourd problemn sosyal, nou bezwen osi konsider, annan landrwa detann pou zanfan. E loter Mosyon, in koz lo *parking*, mon ti a swete ki ler zot pe planifye konstrir lakaz, nou osi mazin, annan fasilite *parking*. Akoz nou pa kapab konstrir lakaz, me nou pa mazin *parking*, akoz mazorite fanmir i annan en transpor konmela.

I pa akseptab, ler ki *PMC* i dir avek zabitan al demann zot *MNA*, pou fer *parking* pou zot akoz i pa responsabilite *MNA* pou fer *parking* pou zabitan. Me plito zot ki'n planifye lakaz, se zot ki merit planifye sa.

E dezyenm parti esansyel, sa Mosyon, pe demann Gouvernman pou revwar kriter alokasyon lakaz ek kare later. E ankor enn fwa Mr Speaker, i annan plizyer kontrakter la deor ki'n eksprim zot swe.

Nou konnen poudir Gouvernman ler i annan bann later *land bank*, i vwar li difisil pou met lenfrastriktir pou kapab komans konstriksiyon. Alor i annan bann biznesmenn, kontrakter ki pare pou met sa bann lenfrastriktir, petet Gouvernman i kapab travay



avek zot ki zot, zot kapab benefisye avek en *plot* kot zot kapab apre konstrir lakaz ankor, swa zot a lwe oubyen vann lo en baz abordab.

E pou bokou dimoun i pa kler lo lafason ki alokasyon later ek lakaz in ganny fer pou plizyer lannen dan lefase, isi dan Sesel.

Mr Speaker se pour sa rezon, ki i touzour annan bokou dezapwentman lo sa size alokasyon lakaz ek later. Akoz sa ki premye i pas dernyen, e sa ki dernyen i mon premye.

Menm si i azour avek son peyman. Ou vwar en manrmay i fek komans travay dan lakaz, Mm en madanm dan son 50an pa ankor kapab ganny en fwaye pou li ek son fanmir. Me ki pli bizar ankor, en zanfan i ganny lakaz avan son paran.

Me son paran in fer aplikasyon avan sa zanfan e i azour avek son peyman. Zenn ti pe ganny demande pou fer piti lo piti, pou ki zot vin lo lalis priyorite. Fer zanfan, lo zanfan pou vin lo lalis priyorite.

Mr Speaker, afilyasyon politik pa kapab vin en kriter pou donn lakaz. Akoz sa, i ti en kriter sirtou dan distrik La Rivière Anglaise, kot mon bann zabitan in eksprim sa.

E se pour se la rezon, ki i annan serten zot prop dimoun

in ganny viktimize avek sa. E ozordi, zot vwar zot menm La Rivière Anglaise, zot in perdi Mr Speaker.

### **MR DEPUTY SPEAKER**

2 minit.

### **HON ANDY LABONTE**

Mr Speaker lakaz i drwa tou Seselwa, anba nou Konstitisyon. E non pa en faver. Akoz ou pe peye pour sa. Menm ki zot in dir met *MNA* ek *DA* lo *Board* Alokasyon i touzour reste en mister la sa sistenm pwen ki ganny servi.

Akoz alokasyon, i baze lo sa sistenm pwen, ki nou bezwen swiv e napa latransparans. Sel sistenm pwen ki petet nou kapab konpran, se ki kliyan ki pe pey zot *HSS* kontinyelman, kliyan ki lo lalis pou plizyer lannen e aktiv ek peyman.

Si kliyan oubyen zanfan i annan probleman medikal, si i annan labi dan landrwa aktyel kot sa zabitan pe reste e lakantite dimoun ki pe reste dan sa fwaye aktyel.

Toudmenm i enportan ki Gouvernman i fer li kler enn fwa pour tou, e pour nou konnen ki mannyer ou ganny pwen, e kantite pwen sa endividi i gannyen pou sak sa bann kriter.

Mon swe se pou ankouraz sa bann ki konsistan dan zot peyman *HSS*, pou kontinyen. Antretan ki nou a sey met lord dan sa bann dezord.

Mr Speaker, nou rekonnet zefor ki Minis Rangasamy ek son Minister pe mete pou adres son sityasyon e met en pe laklerte dan sa fernwanr.

Me i annan serten bann ansyen zofisye, ki merit arete avek sa bann vye latitud. Akoz Seselwa i ankor pe tourn an ron e pa pe ganny lenformasyon ki apropiye e kredib.

Finalman zot fini par ankoler, e fristre e santi ki zot pe ganny viktimize. Sa bann menm dimoun, dan bann menm pozisyon i donn ou bann menm larepons.

Mr Speaker, alors ankor enn fwa sa nouvo Gouvernman i bezwen vwar en nouvo fason fer ki dan latransparans, akoz se sa enn bann rezon Lepep in vot pou en sanzman. E se sa, ki sa Mosyon pe demande.

### **MR DEPUTY SPEAKER**

Ou letan arive. *Wrap-up*  
Onorab.

### **HON ANDY LABONTE**

... la so size. Mon pou terminen en pti moman Mr Speaker. La lo size kare later, pa koz lo la. Ou tann dir napa ase kare. Me

serten fanmir ki deza annan gran propriyete, zot zanfan pe kontinyen ganny later Leta.

E menm zot lakaz ganny konstrir par *loan* ek Gouvernman. Serten Dirizan dan ansyen Gouvernman, i annan ki zot zanfan pa ti ni ankor ganny 18an ou pa ti pe viv Sesel, in ganny 2 kare later pou vin en sel kare. Menm sa parti politik ki ti o pouvwar pou 43an, i annan tro bokou kare later e pti malere i ankor pe espere menm.

Mr Speaker koze lo sa size later ek lakaz, i kapab ale ziska lafen mon manda. Sa size, alokasyon lakaz ek later i merit ganny adrese o pli vit posibil. Parey loter Mosyon i kontan dir, si nou pa pran aksyon la konmela menm, kabri i kontinyen manz salad.

Mon pou aret la, pou donn mon sipor total sa Mosyon. E mon demann Gouvernman pou pran kont, nou bann rekomandasyon akoz nou pe dir, ki nou zabitan pe santi e ki ti a swete vwar. Mersi Mr Speaker.

### **MR DEPUTY SPEAKER**

Mersi Onorab Labonte. Onorab Doyace Porice, *next* ou annan ziska 3er10.

### **HON DOYACE PORICE**

Mersi Mr Speaker. Bonn apre midi a tous. Mosyon anmennen par Onorab William, lo size lakaz ek later i en Mosyon ki pou enteres bokou Seselwa. Kot in anmenn en kantite lekspektasyon la deor.

E nou piblik spesyalman bann dimoun ki pe espere, e ki pe kontribye pou zot ganny en lakaz ouswa en bout later. E lo mon zil Praslin, pa pe ganny eparnyen lo sa size, kot bokou nou zabitan pe espere.

Mon pou koz en pe lo sistenm pwen. Ki pe ganny aplike, ki ti pe ganny aplike dan sa Minister. Kot nou'n vwar, ki pa ti pe mars dapre parey i ti devret ganny enplimante.

Akoz dan lepase, ti annan dimoun ki'n ganny lakaz ek later, san annan okenn pwen, ki fer, ki fer zot kalifye. Tandis ki bann ki pe peye e osi annan bokou pwen pa ti pe ganny asiste. Mr Speaker, menm parfwa pa konnen ki mannyer sa sistenm pwen ti pe marse dan sa letan.

Nou konnen ki dan nou distrik, ou menm dan nou pei napa ase later pou vann, ni menm pou fer lakaz pou donnen. Me, mon krwar ki nou bezwen donn latansyon plis bann, ki vremen dan bezwen.

Dan distrik, pandan vizit ou ganny bokou konplent avek

nou *constituent*. Akoz sa sistenm lakaz ek later la deor, nou annan bokou ki'n kontribye.

Me nou pa konnen kote sa larzan ti ete, e ki zot ti pe fer avek. Nou osi menm pa konpran, sa bann *interview*, ti pe ganny fer pou ganny lakaz ouswa later.

Nou menm vwar osi kalite lakaz ki sa bann dimoun i ganny *allocate*. Parfwa i pa ti pe ganny byen partaze Mr Speaker. Par egzanp i annan ki napa zanfana, me i ganny lakaz trwa lasanm. Tandis ki annan de ou trwa zanfana, ti pe ganny lakaz, enn ou de, ouswa de lasanm. Me zot ti napa swa sa letan.

Zis pou zot aret lwe lakaz, ouswa aret ganny problem devan laport lezot dimoun, e osi fanmir. Kot sa pa ti zis e menm, pa normal. E kliyan pa ti santi zot konfortab, vi ki zot ti pe pey zot larzan sa letan.

Later osi ti annan en bal ladan, kot nou'n vwar ki ti annan ti pe ganny plis ki en kare later, ouswa pe donn zot dalon ki pa merite.

Mwan mon konn serten dimoun, ki'n ganny plis ki trwa kare later. Akoz i ti annan dalon ki travay dan sa seksyon, ki pare pou pran gous. Ozordi li ki annan biznes lwe lakaz, tandis

ki nou pti malere la ater, pa pe benefisye, ni en pti bout pou li fer en pti kazo.

Mon krwar avek sa nouvo Minis, e nouvo Gouvernman, i a kapab revwar sa bann sistenm oparavan. E menm revwar konsiltasyon avek sa bann travayer, ki pe travay dan sa seksyon later. Akoz i annan ki ankor pe *call* zot dalon, pou vann later pou gous.

Mr Speaker, i vreman fermal pou vwar nou bann zenn fanmir ki pe kontribye e pe espere. E ki ankor pe lwe lakaz, byen ser. Kan sa larzan ti a vin dan fon sa Minister, pou ki i a kapab fer plis lakaz.

Sa sistenm pwen enn ler ou a krwar ti pe zis en kouvertir lo nou lizye, pour ki nou pti Seselwa pa konplent.

Alor mon pe enplor ek Gouvernman, pou revwar tou sa bann sistenm lakaz ek later e sistenm pwen. E pare pou ekout nou, nou lavwa dan distrik. E lavwa nou pep la deor, e pour ki nou pti fanmir Seselwa i a benefisye zot osi.

E mon enplor avek nou pep, pou kontinyen peye sirtou ler zot in fini ganny lakaz, pou ki lezot i a benefisye. E zabitan Baie Sainte Anne Praslin, i a osi benefisye pou en pti en lakaz ouswa en bout later. Avek sa pti lentervansyon, mon pare pou

siport sa Mosyon. Mersi Mr Speaker.

### **MR DEPUTY SPEAKER**

Mersi Onorab. Prosen lo mon lalis se Onorab Michel Roucou. Donk ou ava annan ziske, 3er16. Tyek ler, ler ou pe koze. Mersi.

### **HON MICHEL ROUCOU**

Mersi Mr Chair. Bonn apre midi a tous. Bonn apre midi spesyal pour zabitan Mont Fleuri. Mon osi mon le solider avek bann pasyan kanser Mr Speaker.

Konnen poudir toultan, i annan en met par lao, ki pe get dan zot semen. Mr Speaker de semenn pase, zabitan Mont Fleuri ti vwar alokasyon en nouvo blok flat 8 *unit*.

E ladan ti annan en madanm dan son 80 ekek lannen ki'n esper pou 50an, pour li ganny en lakaz. Sa se madanm Ginette Sinon.

Sa akoz Mr Speaker. Se ki tou dernyerman Mr Speaker, ler ti annan alokasyon lakaz Corgat Estate i ti vwar li ganny met akote, akoz i ti deside pou li vin koz pou mwan dan mon kanpany Eleksyon.

Mr Speaker, ki nou'n vwar dan lepase, se ki bokou dimoun ki'n reste dan bann oter lo Mahé, zot in ganny bouze pou

zot ganny mete, lo bann *housing estate* dan leba.

E sa ozordi in anmenn plis blokaz, pou bann dimoun ki napa en bout later. Akoz Mr Speaker, mon a eksplike. En dimoun ki reste dan bann leo, dan bann distrik. I vwar li i napa sa fasilite pou semen ariv kot son lakour.

E ler i pran li en *loan*, laplipar son *loan* i al dan sarwa, ki sa aprezan i fer li vin difisil, pour li kapab konstrir son lakaz. E ki nou'n vwar se ki, Gouvernman ti bezwen pran en desizyon kot i bouz sa bann dimoun, dan bann *housing estate*.

Be mwan mon mazine poudir ki nouvo Gouvernman, i bezwen revwar sa. Akoz mon panse, poudir bann dimoun ki napa en sou bout later, ozordi zot, zot pe ganny penalize akoz bann ki annan bout later, zot pa'n kapab devlope.

E mwan, mon krwar poudir avek Gouvernman i devret vwar nouvo fason fer, se ki ed sa bann dimoun. Petet kree en *Scheme*, ki ava kapab ed sa bann fanmir ki, pou zot kapab devlop zot later pou *build* en lakaz pou zot.

Parey in ganny dir oparavan, konmela i annan bann nouvo fason fer. Parey

bann lakaz *cement board*, ki sa i ava kapab ed bokou fanmir.

Mr Speaker ler nou pe get bann *housing estate* ozordi, Gouvernman osi i bezwen revwar, eski *PMC* pe anmas sa lakantite larzan, pou zot kapab kontinyen fer sa bann *maintenance*? Ouswa Minister kot *MLH* i bezwen vini antre vwar espesyalman sa bann problem *sewage* ki annan.

Bann problem koule, parey in ganny mansyonnen oparavan. E mwan mon panse, poudir avek nouvo fason fer nou bezwen vwar dan bann distrik. Vizit sa bann fanmir, zis parey mwan dan mon distrik. I annan en fanmir laplipar pe esper en lakaz. Be selman ler ou pe gete, Gouvernman i kapab monte, e rod en fason pou *build* en blok flat pou kapab ed sa fanmir, e sa ava kapab tir presyon lo nou lalis lakaz.

Dan mon distrik Mr Speaker, nou annan nou 154 zabitant ki pe konsistan avek zot peyman lakaz. 79 lo la, zot pa pe kontinyen avek zot peyman tou lemwan.

E mon pe profit ozordi la, pou mwan dir zot, pou zot pa perdi lespwar, kontinyen ek zot peyman. Al vwar zot *housing officer*. Mr Speaker dan lepase ki nou'n vwar? Nou'n vwar poudir bokou dimoun in ganny

anbete, i panse poudir *MNA* ki donn lakaz. Kan sa pa sipoze.

E ozordi nou'n vwar poudir ou desann ou ale, ou fer ou kontribisyon ek *housing* e la atraver en sistenm pwen ki'n ganny nonmen, pour ou kapab ganny vwar pou ou ganny asiste ek en lakaz.

E mwan mon panse poudir, kot Minister Lakaz, bann zofisye *customer care*, i bezwen aret dir ek dimoun ler i vin demann en larepons lo son pwen. Ki zistans i ete, kote i ete pou zot donn en larepons kler.

Aret dir ek dimoun pou, mont dan zot distrik pou al vwar *MNA*. Akoz *MNA* napa larepons, pour sa. Dimoun pe pey son lakaz atraver *HFC* e apre atraver Minister kot zot *housing officer* laba, zot kapab konnen en pti pe kote zot *stand*. Mon bezwen vin fran avek zabitan, avek dimoun zot menm zot pou zot konnen kote zot *stand*.

Mr Speaker, Mont Fleuri i en landrwa, kot nou pe depan zis lo redevlopman Corgat Estate pou lemoman. Ki pou, parey nou vwar bann vizit ki'n fer, bann diskisyon ki'n ganny sa, anba sa proze *PPP*, kot Gouvernman, pe revwar ek en kontrakter pou kontinyen sa redevlopman.

E mwan mon pe demann ek Gouvernman, se annou get en pti pe dan distrik ankor. Annou vwar bann bout later, parey mon annan de msye ki'n vwar mwan, zot in pare pou zot antre an dyalog ek Gouvernman, pou zot kapab tonm lo en kondisyon pou fer lezot lakaz pou bann zabitan dan mon distrik.

Mr Speaker, lo kote later. Mon osi tou pa bezwen nonmen dan mon distrik. Bokou dimoun ki frekant Kan Tobruk ki zot al marse. Fer en pti legzersis laba, zot kapab vwar kot nou bann later in ganny abize.

E kot i annan en biznes, en madanm biznesmenn Mr Speaker ki'n ganny li en gro morso. Pourtan i annan plizyer bout later li, dan diferan distrik. E ozordi, nou vwar poudir lo lalis later dan mon distrik i annan en bon pe dimoun pe espere. E zot pe ganny anvoye, zot in ganny anvoye pou plizyer lannen.

E nou, nou pe demande ki Gouvernman i antre, i revwar bann bout later. Zis parey Farah, in desann parey toultan mon dir, in desann, i montre, i montre ek bann zofisye poudir kot i reste, i annan bann later la. E li i ankor pe espere, pe ganny anvoye demen, tanto. Be selman en dimoun li in fini

ganny asiste, avek en bout later laba.

Mr Speaker ler nou pe koz lo kote later osi tou, nou pe demande ki Gouvernman, annou retourn dan sa fason fer, dan lepase kot nou ankouraz bann dimoun pou zot kapab vwar bann pti bout later kot zot reste. Sirtou bann later zeritye, tousala nou bezwen *deal* lo la sa.

Vwar ki mannyer pou revwar pou ede, ki sa i ava ede pou anpes annan sa, sa problem later. Akoz parey nou'n ganny dir poudir later i limite, Gouvernman pe revwar later, dan bann distrik ki mannyer pou ed bann dimoun dan lepase ki'n perdi zot bann kare later malapropo.

Mr Speaker, zis parey dan mon distrik, tou le Sanmdi, mon ganny en *call* poudir i annan en ansyen Minis ki pase avek en *mop* ek en seo, i vin netway en lakaz anler. Be mwan mon pe enplor avek li mwan Mr Speaker!

Pran sa lakaz donner, nou ava ed de fanmir dan nou distrik, ou vwar? Tou le *weekend* mon ganny en pti *call*, ler i pase ek son *mop* ek son seo Mr Speaker. Ou vwar? Akoz bann dimoun pe demande ki i pe fer, i deza i annan en lakaz li. Ki mannyer i pa pran sa bann

lakaz pou asiste bann dimoun avek?

Mr Speaker, mwan mon pou donn mon sipor sa Mosyon ki Onorab William in anmennen. E mwan osi mon pou anmenn mon soutyen avek bann dimoun ki ankor pe espere.

I fer mon mazin Beverly Prosper en zenn fiy, ki in vin vwar mwan, i dir mwan poudir en zofisye kot *Housing* in dir ek li, ale kontinyen tik anler akoz ou pa pou gannyen lakaz. Ou vwar?

E sa i fer mon mazin madanm Maryvonne Labrosse osi tou, anler dan mon distrik Rochon Mr Speaker. En madanm aze, ki osi tou i anvi ki Gouvernman i antre, anmenn sa nouvo *Scheme* pou kapab fer en *block flat* lo zot propriyete pou ed zot fanmir. Zot ava peye zot, zot pa pe dir donn zot pou nanryen.

Parey nou'n vwar dan lepase, kot bokou promes Eleksyon in ganny fer, kot ansyen Gouvernman i monte i fer lakaz. Apre zot fer dimoun pa peye. Mersi Mr Speaker mon pou donn mon sipor Mosyon.

### **MR DEPUTY SPEAKER**

Mersi Onorab Roucou. Mon ava pas laparol avek Onorab

Hoareau. Pa bliy kondisyon letan. Mersi.

### **HON JOHN HOAREAU**

Mersi Mr Speaker. Bonn apre midi Mr Speaker. Bonn apre midi tou dimoun ki a lekout.

Mr Speaker, Mosyon ki devan nou anmennen par Onorab William, pe demann Gouvernman pou revwar Polisi e stratezi lo la kalite lakaz ki pe ganny konstrir e lo kriter alokasyon lakaz e kare later.

Pou mwan sa trwa mo kle, Polisi, stratezi, e kriter alokasyon i fer si oule, *the backbone of* sa Mosyon.

Ozordi ler nou pe get Polisi Later ek Lakaz nou vwar i sipoze baze lo en Polisi redistribisyon ekitab later. Sa i vedir, en morso pou sak fanmir oubyen sak aplikan.

Anvi ki souvandfwa Gouvernman i bezwen konstrir bann lenfrastriktir de baz;- par egzantp semen, rigol, konneksyon *sewage*, laliny delo, laliny elektrik, i fer ki, Gouvernman i bezwen souvandfwa sibvansyon, bann morso later.

Akoz sa bann lenfrastriktir li menm si ou pou azout son kou avek sa later, i pa pou abordab pour bann dimoun mwayen dan nou *class* Seselwa.

Alor an dizan sa, mon annan serten propozisyon. Pou fer ki akoz later in vin en komodite vreman, vreman rar. Alor serten morso later, ti kapab ganny vann osi lo *tender*, pou kapab *cross-subsidize*, bann lezot morso dan bann landrwa kot zot pe devlop bann nouvo *land bank*.

Sa ti a fer ki, Gouvernman li menm pa ti a perdi sitan bokou e bann dimoun osi ki pe aste sa later ti ava partaz en pti pe sa kou.

Mr Speaker serten morso later osi i kapab ganny vann avek bann dimoun ki pare pou, pou antre dan bann *Public Private Partnership*, parey Onorab ki Onorab ki'n koz avan mwan in fer resorti.

Si serten morso later i ganny vann avek bann devloper, zot devlop later lo serten kondisyon, anba serten kondisyon. E zot fer li dan en fason abordab pour pep Seselwa, nou ti a kapab ganny nou, bokou plis later, ki lakaz ki ganny fer, bokou plis later ki ganny devlope. San ki Gouvernman li menm i trouv, met lanmen dan son kof pou tir sa larzan, ki si i napa.

Mr Speaker konstrir vertikal, sa osi i en size ki nou *Planning*, Lotorite *Planning* i bezwen reget ladan. Akoz



souvandfwa ler ou napa later, ou bezwen kalkil lo bann lezot stratezi ki fason ou kapab maksimiz sa pti *footprint* ki ou annan.

Mr Speaker, sa prosesis alokasyon later ek lakaz i sipoze ganny fer an respektan trwa prensip fondamantal la demokrasi e bonn governans.

Setadir latransparans, *fairness e accountability* - parey nou dir rann kont. Kestyon ki nou merit adrese se, eski sa bann Polisi, prensip pe ganny respekte? Eski i ankor relevan, avek letan ki nou pe viv ladan? Eski larepons sa bann kestyon, i pou kapab anmenn nou dan en lot direksyon?

I annan plizyer koripsyon, kot plizyer ka *unfairness* e plizyer ka kot *accountability* pa'n ganny respekte.

Nou tou nou a bezwen konnen, plizyer ka dan nou distrik, menm ansyen Minis ki'n vann son lekor ek son fanmir 40 morso. Dan ka Parti US, kot plizyer morso *or*, oubyen kare later in ganny aste, in ganny aste ek Gouvernman pou fer bann Biro Brans lo la.

Nou konnen plizyer ka, kot afilyasyon politik e lezot faver in pas avan. Tandis ki lezot in kaye lo en lalis, *vitam aeternam* pe espere kan zot tour pou vini.

Ozordi malerezman, napa bokou later ki reste. E se Gouvernman formen par LDS ki o pouvwar, ki pep Seselwa in elekte an gran mazorite ki bezwen *deal* ek sa sityasyon.

Alor nou bezwen fer zistis, pou rann zistis sa 9000 dimoun ki lo laplikasyon later, oubyen lakaz. Premyerman mon konvenki ki serten keksoz, dan Polisi i kapab ganny revwar. E sanze, parey loter Mosyon pe demande.

Lafason ki nou fer *due diligence* i devret ganny revwar, pou fer li vin pli efektiv dan determinasyon, pou vwar si en aplikan napa *lezot immovable properties*. E pou fer ki sa prosesis i reste osi enparsyal san lenfliyans politik.

Dezyenmman sa ka kot, sak ka i bezwen ganny adrese oubyen ganny *assess* lo son merit. Akoz serten sityasyon fanmir i sanze, de zour a zour. Par egzanp, annan de fwa en dimoun ki petet ti'n ganny, ki ti'n annan en relasyon e i ti'n ganny asiste, i vwar ki sa relasyon i kase e tou keksoz i resanze.

I form en nouvo fanmir e i annan. E i bezwen en nouvo, en nouvo demer si oule, en nouvo lakaz. Aloor sa bann sityasyon koumsa, i bezwen ganny *assess*

lo merit. Lo ki fason, sa nouvo ka i devret ganny gete.

I annan osi ka kot dimoun, par natir son travay i pa kapab reste 3an, kontinyelman dan Sesel, ki enn bann kondisyon pou ou ganny en morso later.

Dizon i en Diplomat, dizon i travay ek en lakonpanyen *offshore*, oubyen ek en lakonpanyen aletranze, sa osi pa kapab vin en fakter pou pa konsider li koman en dimoun ki kapab ganny en morso later.

Ler nou pe get osi lo Polisi lakaz, ankor nou vwar ki sa sistenm pwen i favoriz bann ki fer plis zanfan. Tandis ki bann ki'n pran zot responsabilite e deside pou retard zot plan pou fer en fanmir, an *espérons* en twa lo zot latet avan ki zot fer li, i ganny kit deryer.

Ankor sa size alokasyon lakaz, in napa latransparans dan lafason ki'n ganny aplike. Politik ek koripsyon in gat tou keksoz. I pa rezonnab, ki en dimoun i esper 19an, 20an avan ki i ganny asiste. Tandis ki, tandis ki laplikasyon serten i pase dan 3an.

Ankor Gouvernman i bezwen revwar lafason pou koup depans, e lafason pou koup letan ki dimoun i espere pou ganny en lakaz.

Mr Speaker ozordi avek modernizasyon, e nouvo teknolozi, i annan diferan fason pou konstrir lakaz pour ki letan e kou konstriksiyon i kapab redwir konsiderableman. Fodre fer en lodit lo metod, pou fer lakaz. En konsiltasyon avek bann enzenyer sivil, e tou ki konsernen, ti ava ede pou fer sir ki sa size i ganny trete a en pli, en nivo pli teknik.

Resiklaz boutey, sa osi i kapab anmenn en serten lavantaz, pou pei. Si bokou boutey sa milye de milye tonn boutey, ki ganny zete lo *landfill* si ti kapab ganny resikle, e fer bann *glass panels*, pou servi dan konstriksiyon ti a redwi en pe miray.

*Carbon fiber* ozordi, pe ranplas feray. E plastik resikle pe ganny servi koman bann, pou fer lafnet *PVC* avek. Bann prefab *fiber cement*, li osi i en lot opsyon. *Nonmetallic polymers based material* tousala, i kapab zwen en rol, pou fer ki bann kou lakaz i pli abordab, e i rezilyan, e i soutenab osi.

Mr Speaker *interlocking blocks*, i permet ou servi mwens siman. Tousala se bann opsyon. Mr Speaker loter Mosyon in met lanfaz lo nouvo metod konstriksiyon, ki mon krwar nou, mon krwar nou, nou pa pe fer ase dan nou resers

pou nou rod fason pou koup lo letan e kou konstriksyon.

Mr Speaker an terminan, mon poudir ki mon santi mwan ankouraze, par lefe mon dan en tim ki pe rod solisyon olye zis kritike, ki pe get lafason nou kapab amelyor lavi Seselwa dan, dan plas fer kalonmni e provok dezord.

Mon swe se ki, mon swe si ki Komisyon Anti-Koripsyon, i kapab travay pli dir pou fer sir ki sa bann ki'n donn bal dan later Leta, i kapab rann kont dan lefitir.

Mr Speaker sa ti mon kontribisyon. Mersi bokou.

### **MR DEPUTY SPEAKER**

Mersi Onorab Hoareau. Nou ava ganny letan pran en dernyen entervansyon avan nou *break*. Mon ava kriy Onorab, Manm Elekte pou distrik Au Cap, Onorab Samynadin.

### **HON KELLY SAMYNADIN**

Mersi Mr Speaker. Bonn apre midi ankor enn fwa, tou bann koleg Onorab. Mr Speaker demann pou later i enn ki toultan reste an gran demann dan nou pei. E i pou byensir reste koumsa an mezir ki nou popilasyon, i kontinyelman agrandi. E nou sitwayen i vyei.

Avek lentansyon asire ki sa bann demann i ganny, soutenir, i annan en *lands points system*, ki ti ganny etabli an 2017, Aek bi pou fer provizyon later avek Seselwa, ki annan bann bezwen priyoriter, oubyen zot annan bann abilite finansyel pou konstrir en lakaz.

En lot kriter ti pou asire ki pli bon latransparans dan lafason ki alokasyon later i ganny antreprann. Pou fer provizyon bann mekanizm enparsyal, pou alokasyon later rezidansyel, pou konstriksyon lakaz.

Mr Speaker dan distrik Au Cap laplikasyon pou later rezidansyel, i reste touzour en gran konsern. Bokou dimoun, sirtou bann zenn an partikilye, in apros mwan avek zot laplikasyon, ki zot pa ankor zanmen ganny en larepons apre plizyer lannen depi ki zot in soumet, ki zot in soumet anver Minister Later.

Mr Speaker, mon santi ki Gouvernman i merit pran en pti pe plis konsiderasyon pou nou bann zenn, ki anvi asir en lavenir pou zot zanan. E sa par met en twa lo zot latet.

Dan Au Cap i annan zabitan ki pe viv avek zot zanan, dan en sel lasanm kot zot paran. Malgre ki annan lannen ki zot pe monte, desann,

kot Biro Later pe esper en larepons pou zot aplikasyon.

E toultan rezon se ki zot pa ankor akimil sifizaman pwen pou zot kalifye. Later dan Au Cap i annan, me i zis ki prosedir pou fer alokasyon ki tarde.

An sa ki konsern, sistenm pwen pou alokasyon lakaz, li osi i ti ganny entrodwir an 2017, anba Plan Konpreansiv pour Later ek Lakaz. Demann pou lakaz, li osi i enn ki toultan an gran bezwen parmi nou popilasyon.

E nou koman bann MNAs nou konn sa tre byen. Anvi ki nou bann, *constituents* i souvan vin kot nou, pou vin rod plis detay, oubyen *updates* an sa ki konsern zot aplikasyon.

Mr Speaker, kekyon ki mon pe demande se, malgre ki'n annan bokou Seselwa, ki ganny asiste avek en lakaz, oubyen en morso later. Akoz ki annan ki menm si zot regilye avek zot peyman, i ankor pe trouv li pe esper lasistans pou plis ki 10an, oubyen 15an?

Me selman, i annan ki pa'n bezwen esper tou sa letan pou ganny asiste avek en lakaz, oubyen en later. Mr Speaker laprev i la. Dan distrik Au Cap, i annan en dimoun an partikilye ki'n ariv 23an, i ankor pe esper en lakaz. Sa i dapre lalis ki mon annan dan mon lanmen.

Sa pa normal ditou Mr Speaker. Eski sa dimoun i napa, en bezwen priyoriter apre tou sa letan ki i pe esper en lakaz? Oubyen sa sistenm, in ganny fer pirman pou rezon politik, oubyen pou fer kontan zis en serten group?

Sa i pirman montre ki i annan en defayans, dan sa sistenm alokasyon. E mon santi ki Gouvernman i bezwen revwar sa, e etabli bann mekanizm e stratezi pli efektif, pou ki nou ava kapab anfen retrouv vre latransparans, kot alokasyon later ek lakaz i konsernen.

Mr Speaker, mon apresye pou vwar ki Gouvernman pe revwar prosedir pou bann lakaz *emergencies*. Demann pou sa i kontinyelman ogmante, sirtou letan i annan bann ka dirzans, kot swa in annan en dife. En inondasyon, eksetera.

Me Mr Speaker nou bezwen pran kont ki annan, ki annan nou bann sitwayen ki lo lalis aplikasyon lakaz e ki parfwa, zot retrouv zot dan bann sityasyon kot zot napa en landrwa pou reste.

Ou menm zot pa kapab *afford* en lakaz lwe, e zot vwar zot pe rod en rekour anver Gouvernman, pou zot kapab ganny en solisyon pou zot problemm lozman.

E dan Au Cap, sa pa en leksepsyon, kot mwan souvan pe vwar mwan an kominikasyon avek Departman Lakaz, pou bann tel sityasyon koumsa.

Me malerezman akoz ki i annan en gran limitasyon dan provizyonman lakaz *emergencies*, petet ti ava meyer konstrir detrwa *blocks*, dan sak distrik, ou menm dan en lankadremman rezyonal. E sa ti ava ede soulaz Lotorite Distrik en kantite, osi byen ki travay Minister letan sa bann ka i ariv kot nou.

Mon kontan pou aprann ki annan bann *units* lakaz *emergencies*, ki Gouvernman pe al antreprann konstriksyon tre byento. Me selman dan lefitir, anmezir ki popilasyon i agrandi, ti ava meyer ki Gouvernman i konsider sa propozisyon.

Finalman, mon santi ki Gouvernman *PMC*, plis spesifikman, i bezwen vin en pti pe plis serye e pran aksyon pli realis, anver bann dimoun ki pa pe onor zot, zot lagreman peyman lakaz.

Mr Speaker, i pa akseptab ki en dimoun ki pe *rent* en lakaz avek Gouvernman, annan en aryeraz plis ki R50mil. Sa i irezonnab, e iresponsab lo tou lede kote. Dan sa ka, mon santi ki dan Polisi *PMC* e Minister

Lakaz, i devret annan en spesifikasyon ki sertifye klerman ki bann mezir, ou aksyon ki merit pe ganny pran, pou evit bann tel sityasyon koumsa arive.

Avek sa de pti mo Mr Speaker, mon remerci ou. E mon pe konfirm mon sipor anver sa Mosyon. Mersi.

### **MR DEPUTY SPEAKER**

Mersi Onorab Samynadin. Nou ava pran en *break* la pou nou retournen 4er. Ler nou retournen 4er i reste 6 Manm ki'n endike zot le koze.

So teknikman lalis in fermen apartir la. Sa 6 Manm i a koze, sakenn 10minit, i ava fer nou 1erdtan pou nou ariv 5er. E Onorab a fer son *summing-up*, koumsa nou ava fini ziska apepre dan 5er en kar.

Donk nou ava pran *break* la, e rebran 4er.

**(BREAK)**

### **MR SPEAKER**

Bonn apre midi tou Manm Onorab. Nou a rebran deba e mon annan lalis Manm, entervenans ki pe atann. Onorab Desheila Bastienne ou annan laparol.

**HON DESHEILA BASTIENNE**

Mersi Mr Speaker. Bonn apre midi Mr Speaker e bonn apre midi ser koleg Onorab e tou Manm a lekout espesyalman zabitan Perseverance.

Mr Speaker dan en pti pei parey Sesel ozordi, nou pa ti pe devret annan sitan problem lakaz ek later. Letan nou get lakantite morso later ki'n ganny vann, fer kado, e partaz antre dalon, ozordi dan Sesel bokou fanmir Seselwa, ti pou annan en pti kare later ek son prop lakaz.

Mr Speaker, letan nou get bann distrik tel ki Roche Caiman ek Perseverance. I bann morso teren ki'n ganny konble pou ogmant lespas, pou ogmant grander lespas pou met plis lakaz pou Seselwa. Akoz nou ti nepli annan plas pou konstrir lakaz lo nou later natal.

Mr Speaker, problem lakaz in vin deplizanpli, difisil, serye e difisil. Si tou bann lakaz ti'n ganny partaze dan son fason zis e transparan, ozordi bokou problem lakaz ti pou'n kapab rezourd.

Partaz lakaz lo baz afilyasyon politik, faver, dalon in fer ki ozordi bokou dimoun ki ti vreman bezwen lakaz, pour li ek son fanmir, i ankor lo lalis espere. E i a pe dormi anta, dan

salon, dan lavarang, dan koridor kot fanmir.

E sa enn ki ti ganny lakaz lo baz politik, faver zot in montre ki zot pa ti neserman bezwen lakaz. Akoz ozordi zot pe lwe sa bann lakaz a en pri egzorbitan. Zot pe fer de profi, e de profi lo zot frer ek ser malere.

E a lafen se sa dimoun ki pe lwe sa lakaz ki pou fini pey, tou pou zot. E li i reste lo la, i a kontinyen reste lo lalis espere. E i a pey lakaz son kanmarad.

Mr Speaker Gouvernman pou bezwen fer en bon resansman pou idantifye lakantite dimoun ki ankor lo lalis espere. Apre de kantite lannen, e ki vreman dan en sityasyon kritik kot menm lakaz, kot menm ozordi nou pe vwar tro bokou lakaz ki *overcrowded*.

Mr Speaker, letan nou get striktir bann lakaz ki'n ganny konstrir anba ansyen Gouvernman, i montre nou ki sa letan Gouvernman pa ti neserman pran letan pou etidye striktir sa bann lakaz, avan donn *go ahead*.

Ouswa in fer sa avek en bi, sankwa i ti'n remarke ki en lakaz en lasanm, ouswa de lasanm pa ti pou fer en gran dibyen en fanmir kot firanmezir i agrandi, zot ti a kapab demann permisyon pou zot

azout enn ou de lasanm avek zot prop finans, pou tir presyon lo Gouvernman.

Sa i montre ki Gouvernman sa lepok, ti kontan vwar Seselwa kontinyen fye lo li, pou arive ganny en lakaz pou reste ladan. Sa ti osi en lot fason manipil, Seselwa pou toultan krwar ki se Gouvernman ki kapab donn lakaz. E ou pou toultan annan sa krwayans dan li, esper li ler i a pare.

Mr Speaker, ozordi nou vwar lalis esper lakaz i kontinyen grandi. Me landrwa pou fer lakaz in nepli annan. Bokou fanmir pe sey demande pou azout de lasanm, ek zot flat dan Perseverance.

Me sa i vin difisil, aköz zot vwar zot pe bezwen depans an plis, pou arive fer sa lazoutaz. En fason ki pa pou defigir sa plan lakaz li menm. Ouswa zot senpleman ganny dir, ki ou pa pou kapab fer okenn lazoutman. Aköz lafason ki sa lakaz in ganny konstrir, pa permet nanryen ganny mete avek.

E osi nou vwar ozordi ki bann blok flat i ganny konstrir telman pre ek kanmarad ledò, kot zot vir ledò kanmarad ou kapab sorti dan en lakaz sot dan en lot. Lespas pou traverse deryer bann flat i napa, i telman

sere. Kot se la kot nou al vwar aköz ozordi i annan tou sa bann diskisyon antre vwazen.

Mr Speaker sa i pou osi aplik pou bann gro morso later dan Perseverance ki'n ganny partaze avek politisyen. Zot bann zanfan. Parmi i annan ti ankor pe lekol, in fini ganny son morso later. E bann ki pli zoli morso bout, ki nou apel li koman *prime land*, zot, zot pe reste Praslin, La Digue, later deryer in vin bwaze.

E i a pe soutir bandi pou fer zot bann aktivite sal. Servi sa bann landrwa abandonnen pou vann drog. Tousala se faver ek afilyasyon politik.

Se sa bann morso later, e sa bann morso later ti a kapab konstrir ankor lakaz lo la. Ouswa lezot striktir ki ti a vin dan lentere zabitan Perseverance.

Mr Speaker, ozordi dan Perseverance, preski napa en landrwa pou mont en bilding pou ed bann zenn antreprenner.

Lazenes pe rod en landrwa, pou zot kapab fer zot aktivite, napa. Aköz ler ti pe konstrir lakaz zot ti bliye i annan zenn ek lezot dimoun, ki pou bezwen en landrwa lwazir pou zot kapab *défouler* apre travay, e dan *weekend* partaz zot bann diferan talan.

Me akoz sa retar se ki setaki in ganny son gro morso later kit la, e disparet. I annan ki'n ganny morso later, dan Perseverance ki pe servi li koman *dump yard* ozordi.

Tou zot vye lekipman zot vini zot zet la. Letan zenn dan Perseverance pe fer letour, pou rod en landrwa pou fer en bilding, en landrwa pou zot kapab servi, lezot dimoun later pe dormi.

Mr Speaker, mon pou siport sa Mosyon anmennen par Onorab William, pour ki Gouvernman *du jour* i a vin avek en fason senp pou konstrir bann lakaz, dan lefitir. Ki sa a permet serten fanmir, arive azout en lasanm si i nesaser. E retir presyon lo Gouvernman.

Mon pe osi sizere ki lakaz i ganny donnen selon merit. E si ou demann en lakaz ou pou bezwen pe reste ladan. Ou pa pran en lakaz pou ou fer biznes avek.

Mon pe osi demande ki sa bann gro morso later ki'n ganny partaze, e ki la abandonnen ki pe soutir tou sord kalite aktivite anti-sosyal, son propriyeter i ganny idantifye. E i anmenn zot plan, pou sa bann morso later ki zot in, ki zot in gannyen dan nenport ki fason.

E si zot napa okenn plan, pou fer avek. Nou demande ki

zot rann sa bann bout later Seselwa ki anvi fer biznes ou ki pe rod en pti morso later, zot a kapab ganny en landrwa pou zot kapab fer zot biznes, ou menm fer en pti lakaz dan zot prop finans. Mersi.

### **MR SPEAKER**

Mersi. Mersi Onorab. Onorab Sebastien Pillay.

### **HON SEBASTIEN PILLAY**

Mersi Mr Speaker. Bonn apre midi Mr Speaker e bonn apre midi tou koleg Onorab.

Mr Speaker pandan sa, preski 2erdtan ki'n pase a pepre. Mon'n asize, mon'n ekout bann entervenans koz lo sa Mosyon ki'n ganny prezante devan nou dan Lasanble.

E mon bezwen demann zot, kwa egzaktman ki zot le *achieve* avek sa Mosyon?

Premyerman, sa Mosyon li menm i vin apre ki *Cabinet* in pibliy son desizyon lo nouvo Polisi ki i pou pran, vizavi *social housing*. *Cabinet* in fini pibliy sa. Swa Lasanble pa *in gear*, avek sa ki *Cabinet* pe dir, swa *Cabinet* pa *in gear* avek son bann reprezantan Lepep ki dan Lasanble.

Dezyenmman, pandan ki mon'n ekout zot, e petet piblik i ava realize akoz lo mon kote nou'n swazir pou pran en lapros



kot nou, nou pa neserman entervenir.

Me pou donn zot loportinite koman, reprezantan sa nouvo Gouvernman pou prezant zot, zot propozisyon lo ki manner zot krwar keksoz i devret ganny fer dan en fason, pli byen akoz *obviously* manner nou ti pe fer li, dimoun pa'n kontan. E zot pa'n re vot nou pou kontinyen fer li, parey nou ti pe fer li.

E lefe ki se zot ki'n ganny elekte prezan, pou gid, pou diriz pei. Zot pe prezant zot plan, zot nouvo Polisi. Be ki nou'n vwar dan plas servi loportinite pou prezant zot nouvo Polisi. Zot in prefere reakte koman bann *MNA* ki ou a dir zot ankor dan Lopozisyon e kritik Gouvernman ki sa ler i zot prop Gouvernman.

E pou mwan sa i en pti pe konfizan. Par egzanp nou ganny en Onorab ki dir nou poudir i annan en dimoun pe esper later pou 50an. Lakaz pou 50an. Onorab ou fek dir nou poudir nou o pouvwar pou 43an, la sa enn pe esper pou 50an. Onorab konmsi kanmenm dir, annou pa, envant keksoz, en?

Dezyenmman, dezyenmman Mr Speaker nou ganny en Onorab lo lot kote ki dir nou poudir, napa later. Me nou ganny en lot Onorab ki dir

nou i annan plizyer kare later li dan son distrik. Me ki annan serten dimoun, anndan dan *MLUH* ki pe swazir, ki manner pou *allocate* sa bann kare later.

Nou nepli o pouvwar depi lannen pase. I a fer lan ki annan en Gouvernman *LDS*. I en pti difisil pou mwan konpran ki manner, nou ki an minorite ki pe gid sa bann zofisye lo ki manner pou kapab donn sa bann kare later.

*(Interruption)*

### **MR SPEAKER**

Bann Manm Onorab en pe lord silvouple. Annou ekoute.

### **HON SEBASTIEN PILLAY**

Mersi, mersi Mr Speaker. Mon, mon koz koumsa Mr Speaker akoz i enportan pou Seselwa ki pe ekoute deor reelman, ekout sa ki zot, zot annan poudir.

Sel keksoz ki mwan mon annan poudir zot, se ki kot zot vwar poudir i annan en zofisye Gouvernman, okenn endividi kelkonk, ki'n swa benefisye dan okenn fason. Be anmenn li devan kot Komisyon Anti-Koripsyon. Anmenn li devan.

Si i mwan, si en lot dimoun zot santi in benefisye anmenn li devan. Zot annan levidans anmenn li devan. Zot

ki o pouvwwar. Me sa ki zot pa kapab kontinyen fer, se kontinyen sey konfiz dimoun lo bann largiman ki pe ganny fer.

Par egzanp, Onorab Georges in dir Gouvernman, i bezwen sorti dan *social housing*. Onorab Kelly Samynadin i dir, Gouvernman i bezwen fer plis *emergency housing*. Ok?

Onorab Hoareau, i dir nou poudir kekfwa Gouvernman i devret al ver en loptik pli modern, ki, mon, mon krwar Onorab in, i annan, i annan serten valer dan sa ki pe azoute. Me sa ki Onorab i bliye, ki dan son distrik i annan plizyer blok flat ki'n ganny fer par Gouvernman presedan.

Annefe dan tou distrik, ki zot sorti ladan dan plizyer blok flat e lakaz ki'n ganny fer par Gouvernman presedan. Nou rikord lo fer lakaz, i prouv son lekor.

Nou'n ganny akize pou *widespread abuse* dan lafason ki nou'n dir aparaman donn sa bann lakaz. Ki nou kapab dir zot? Zot pe dir nou menm zafer depi 2016, e dimoun in krwar zot, Seselwa in krwar zot. Prezan zot fer pli byen, fer pli byen.

Zot konnen kwa ki nou'n fer ki mal, fer pli byen! Akoz se sa ki, se sa ki dimoun pe espere fer pli byen ki nou. Kot i annan

labi, kot i annan isi, kot i annan laba, retire!

I pa kapab lan apre ki nou'n sorti dan Gouvernman zofisye Gouvernman, i ankor pe dir *MNA* al rod lakaz. Be Onorab Roucou konn sa tre byen, akoz *PMC* lontan en kantite bann zofisye ti kontan dir. Mon pa'n dir ou Onorab Roucou ki'n dir, mon dir dan *PMC* ti annan zofisye ki ti kontan dir. Be *MNA* ki donn lakaz.

Mon pa'n dir Onorab Roucou ki dir. Mon dir dan *PMC*. Mon pou fer kler sa, mon pa'n zanmen tann Onorab dir sa mwan.

I, ou konnen i lafason ki mon pe get keksoz dan sa deba ki mannyer in vini. Laprosman Gouvernman sete pou, annan en lapros pou fer *social housing*. Me non pa parey mon ser Onorab Desheila in dir, pou nou fer dimoun depan lo nou.

Nou lapros sete pou tir dimoun from son stati sosyal kot i ete, pou elev son stati sosyal pou anmenn li en lot landrwa. Eski nou'n reisi tir tou dimoun dan son stati sosyal kot i ete pou anmenn li en lot nivo?

Probableman nou pa'n reisi fer li. E eski nou'n reisi tir en kantite dimoun? E benefisye en kantite dimoun? Wi nou'n fer li. Eski ozordi en kantite dimoun ki propriyeter zot lakaz,

pa ti probableman propriyeter zot lakaz anba en lot sistenm?

Laverite i la wi. Akoz ki dimoun pa'n konpran, dimoun in krwar poudir nenport ki Gouvernman ki vini i devret fer lakaz, i devret rod fason pou *hébergement* son popilasyon. Non! I tou depan lo Polisi sa Gouvernman, e lafason ki i enplant sa Polisi.

E se sa lapros ki nou ti swazir pou pran. Sa parti ki mon reprezante ler ti dan Gouvernman, lapros ki nou ti swazir pou pran.

In annan en revolisyon dan sa lapros. An Avril 2020, nou ti fer sorti en nouvo *Housing Policy*, zisteman pou koz lo, bann propriyete kot ki annan fanmir, kot ou kapab fer bann apartman lo sa later, pou benefisyè sa bann fanmir, san ki i, met plis presyon lo demann lakaz Gouvernman.

Me malgre nou'n propoz sa avek Lepep Seselwa, Lepep Seselwa pa'n anvi nou, ki anmenn sa Polisi. In anvi zot ki anmenn en nouvo Polisi. E sa ki enteresan se ki, si sa deba ti'n komans avek rod en Lagreman Lasanble Nasyonal koman en kolektiv, pou enform Polisi lakaz, probableman nou ti pou pe ganny en lot lapros dan sa deba.

Be sa deba in komans avek en kote pe akiz en lot, pou tou sa ki'n al mal. Pou tou sa ki pa'n ganny en lakaz. E pou mwan mon vwar se sa ki, pa fer ki sa deba finalman pa'n kapab anrisir, kot i ti a kapab vreman anrisi sa sityasyon ki nou ladan ozordi.

E mon santi sa i en mank loportinite, pou nou Lasanble. En lot pwen pertinan ki nou bezwen met an perspektiv, i se ki, nou abilite koman en pei, pou nou kapab fer keksoz pou dimoun i depan lo resours ki annan a nou dispozisyon.

E si relman nou'n en pei kot resours in ganny abize, parey bokou dimoun i kontan servi dan zot bann largiman. Ozordi en kantite keksoz ki nou pe vwar otour sa pei, pa ti pou la.

E mon krwar en keksoz ki nou bezwen fer, ki mwan mon pou fer, se ki mon pou remersye sa Gouvernman ki pandan sa 43an, sa 43an wi pou nou sa 43an, pou nou sa. Kantmenm zot poudir nou in vole, in fer isi, in fer laba be pou nou.

Akoz pandan sa 43an nou'n fer en kantite keksoz, pou en kantite dimoun, *and will own it. The good, with the bad. We have to.* Napa swa.

Me zot, zot annan 1an. E 1an, 1an zot prop *MNA* pe vin

devan pe konplent, ki zofisyé dan Gouvernman pa reponn telefonn. I an zot pe konplent, ki zofisyé dan Gouvernman pe aparaman, donn later kanmarad parey Onorab Porice in dir. I an dan Gouvernman, zot bezwen ale al resarz batri.

Me sa ki pli enteresan ankor, zot koz nou koripsyon e akiz nou tou kalite koripsyon anba lesyel. I an dan Gouvernman, zot retir provizyon pou bann *spouse* deklar zot *assets*, dan Lalwa *Public Declaration of Assets*.

*(Interruption)*

### **MR SPEAKER**

E bann Onorab silvouple, annou gard en pe lord. Nou pe ekout kanmarad. Onorab Pillay kontinyen *please*.

### **HON SEBASTIEN PILLAY**

Mersi Mr Speaker. Mr Speaker mwan mon, mon largiman i senp, tre senp. Pandan 43an nou'n fer sa ki nou kapab fer. Nou'n konstrir, sa ki nou kapab konstrir. Dan Perseverance, dan Perseverance nou'n nobou fer en lekol, kantmenm in dir nou napa landrwa pou fer bilding nou'n vwar, i annan plizyer bilding ki'n ganny fer.

Ozordi *Truth and Reconciliation Commission* i dan

en bilding, ki'n ganny ler lo later Perseverance. E ozordi Gouvernman ki la, i ava a son tour pour li prouve, ki alaoter en manda ki Lepep Seselwa in donn li. E mwan pou mwan se sa, ki rezim tou sa ki nou pe diskite ozordi.

So si nou pou koz lo, en nouvo *Policy*, premyerman zot pou bezwen ganny kler antre zot ki kalite Polisi zot le. Si zot le en *Policy Social Housing*, si zot oule en *Policy Emergency Housing*, si zot le en Polisi Sistenm Pwen.

Si zot le Polisi kot Gouvernman i vini i fer lakaz dan bann landrwa kot bann later, i annan later zeritye, *co-ownership*. Sa i pou zot, i pou desizyon Gouvernman ozordi ki pou fer.

Me selman dimoun an deor la pe esper zot vin avek sa Polisi. E parey Onorab Roucou, i kontan *remind* nou, i a fer, i a fer 4an mon tann nonm Farah dan Lasanble. Fodre ou aret nonm Farah, fodre *at least* la anba sa nouvo *Policy* Farah i vwar en rekour. Delivre, ou konpran?

E, be, be mwan Mr Speaker mon konpran akoz Onorab in anmenn en tel Mosyon. Mon bezwen admet malgre ki mon koleg *Leader* Zafer Gouvernman, pa pou

admet ki son lentervansyon, i a *contretemps*, lentervansyon ki *mover* Mosyon in fer.

*Mover* Mosyon pe demann plis ganny fer. Me ou, ou'n demann en rekil, se sa ki ou'n fer, se sa ki ou'n dir ek nou. Be mwan, mwan pou mwan mon pe demann. I en bezwen annan en *alignment of purpose*.

A lafen dizour nou pou konnen, ki kalite Polisi Gouvernman pe vin avek aköz byento nou pou al *entame* Bidze 2022. E nou pou ganny Minister ki pe vin devan nou. E nou ava konpran ki direksyon, ki Gouvernman i oule ale, avek son Polisi Lakaz. Sa i pou enportan pou nou.

E lefe i reste ki ozordi, nou pa kapab vreman, parey zot tou zot a *remind* nou, apre mon a dir zot ki pou fer. Aköz sa manda Lepep in donn zot, e zot pou bezwen servi li dan tou meyer fason posib.

E mwan si mon annan en konsey ki mon pou, mon pou les avek zot se ki, se Lepep ki ava zize, si zot alaoter en manda, ki'n donn zot. I pa nou, i pa personn. Me sa ki nou, nou pou fer, i se ki nou pou bezwen asire, ki zot reponn a legzizans sa manda ki Lepep in donn zot.

E sa *mes amies* zot kapab kont lo nou pou fer. So Mr Speaker, mon konnen i annan

bann entervenans i grate pou reponn mwan, lo sa ki mon'n dir.

Mon pa'n bezwen fer okenn lensilt, fer okenn latak. Mon'n koz lo sa ki mon'n tande ozordi apre midi. E mon'n eksprim pozisyon ki nou, nou pe pran lo sa kote latab, pou nou ekout zot. E vwar ki pozisyon zot le pran.

E nou swete-nou swete ki deba i anrisir sityasyon ozordi e ki Lepep Seselwa i kontinyen vwar en, *improvement* dan son kondisyon lavi.

I kontinyen vwar en amelyorasyon, lo son kondisyon lavi, i kontinyen vwar en amelyorasyon dan son kalite lavi, ki i pe gannyen. Parey nou, nou'n toultan swete ki annan, e ki malgre tou nou defayans, nou'n seye pou delivre. Mersi Mr Speaker.

**(APPLAUSE)**

**MR SPEAKER**

Mersi Onorab. Swivan Onorab Philip Monthy.

**HON PHILIP MONTHY**

Mersi Mr Speaker. Mr Speaker Mosyon anmennen par Onorab William i enn ki tre enportan, e mon santi ki son *timing* pa ti pou kapab vin e en meyer

moman ki sa. Akoz mon pe dir sa? Se akoz koman nouvo Manm Lasanble pou mon distrik (ki pou premye fwa i en distrik *LDS* osi, mon krwar listwar in ganny fer) enn bann pli gran defi ki mon pe rankontre dan mon travay dan distrik - e mon sir ki sa i tou leka pour tou bann lezot koleg *MNA*, se sa demann pou lakaz ek later parmi nou ban zabitan dan nou distrik respektif.

Lamazorite zabitan ki'n vin war mwan oubyen ki'n kontakte i prensipalman lo sa size later ek lakaz. Sa nivo demann ki annan pou later ek lakaz dan Sesel i fer ki Mosyon Onorab William i enn ki tre relevan e ki mon sir i pe atir latansyon en kantite nou bann sitwayen ki pe ekout nou la aswar.

E mon mazine ki sa nivo demann pou sa de komodite ki'n pous Onorab William pou anmenn en tel Mosyon. Akoz si nou pa antreprann sa legzersis olye vwar en rediksyon lo lalis later ek lakaz, nou pou pe war nou lalis lo nivo distrik pe kontinyelman ogmante. E fristrasyon nou pep ki'n akimile pandan plizyer lannen ki'n pase pour pe osi agrandi.

Fodre pa ki nou oublie osi ki lakaz ek later in de keksoz kot in annan plis zwe politik

anba ansyen Gouvernman, ki'n fer ki plizyer nou frer ek ser ki pandan plizyer lannen in espere pou en *unit* lakaz, oubyen en kare later i war zot ankor pe espere.

Mr Speaker mon annan aplikan lo mon lalis lakaz ki mon fek gannyen ki pe pey zot *Home Saving Scheme* depi 1997 e ki ankor pe espere menm. Piti in ganny letan fer piti me zot ankor pe espere menm.

Me pandan ki pasyans sa bann ki tonm dan sa kategori i kontinyelman ganny teste, i annan serten ki akoz zot afilyasyon politik oubyen lyen familyal, ou war zot pe ganny priyorite par lao bann ki'n lo sa lalis depi lontan.

Mon admir kouraz sa bann ki'n pasyante tou sa letan e ki malgre tou zot fristrasyon zot in kontinyen fer zot kontribisyon. E mon santi mwan sagrinen ler serten mon zabitan ki vin war mwan i enform mwan ki zot in ase espere e zot in retir zot kontribisyon ki zot ti pe fer.

Mr Speaker mon pou profite pou lans en lapel avek tou nou bann sitwayen e sirtou bann zabitan Cascade, ki anvi ganny en *unit* lakaz pou vin fer zot aplikasyon i komans pey zot *Home Saving Scheme*. Akoz si ou pa pey ou *HSS* ou pa pou

kapab ganny priyorite par lao sa bann ki pe peye.

Initil ou sey *call MNA* e met presyon, ki ou'n vot pour mwan oubyen non, pou ou ganny en lakaz fodre ou pe fer ou kontribisyon. Sa zafer i annan ki pa'n pey zot *HSS*, me ki'n ganny *allocate* avek en *unit* lakaz, si in arive dan lepase anba nouvo Gouvernman ki pou tou Seselwa sa bann tel pratik pa pou ariv ankor!

Ler mon get Mosyon ki devan nou, mon enterpret li dan sa fason. Onorab William an dot mo pe demann avek Gouvernman pou *think outside the box* parey nou dir, pou vin avek bann nide e konsep pli inovativ ki sa pratik tradisyonnèl ki'n la pou plizyer lannen.

Avek lalis pou lakaz ki pe kontinyelman grandi, mon santi ki Gouvernman lo li tousel pou vwar li difisil pou satisfè demann nou pep. Diskisyon avek sekter prive i devret pran presedans, ki fer ki tou opsyon posib ki a ede konstrir plis lakaz e pli vit a ganny eksplòre.

I annan en nouvo Polisi Onorab Sebastien Pillay fek koz lo la, ki ti ganny aprouve par *Cabinet* bann Minis anba bann ansyen Gouvernman an Avril 2020, ki permet Gouvernman pou asiste en fanmir ki annan

later me ki napa sa finansman neserer pou konstrir zot lakaz.

Atraver konstriksyon zot lakaz gratwitman pou zot, me ki an retour sa fanmir i donn Gouvernman en morso later pou konstriksyon lakaz ki a permet asiste en lot fanmir.

Mr Speaker mon konnen ki Zis apre adopsyon sa Polisi *COVID* ti tape, me mon pou kantmenm war li enteresan pou konnen si in annan okenn endividi ki'n vin devan e montre zot lentere pou al dan sa direksyon?

Si statistik i montre ki sa pa'n leka, mon ti a sizere ki sa i ganny e revwar e ki Gouvernman i vin avek en nouvo solisyon. Akoz mon'n personnelman koz ek plizyer dimoun ki annan later me napa ki montre lentere pou antre dan en tel laranzman.

Mon konnen ki Minister Konsernen i deza pe komans mazin revwar bann Polisi ki kouver lakaz ek later, e mon pou sizere ki sa prosesis i ganny akselere.

Me an dizon sa nou kapab entrodwir nouvo Polisi, me si sa bann menm Polisi pa ganny respekste pou napa okenn diferans. Ler ou get Polisi aktyel pou lakaz oubyen menm *condominium*, i presize kler menm ki en aplikan i bezwen fer

son aplikasyon pou en *minimum* 2an. Pou *Scheme Self-Finance* e 3an pou *condominium*.

Eski sa in touzour ganny respekte dan lepase? Larepons i non. i annan aplikan ki'n fer aplikasyon en lannen e ki'n ganny *allocate* avek lakaz menm lannen menm. E sa pou mwan i mal! Sa bann pratik dezonnèt lepase fodre zanmen i re montre son vilen figir ankor.

An sa ki konsern '*change of use*' Polisi aktyel i kler lo la, i dir ou klerman ki '*change of use*' shall not be permitted. E Mr Speaker i annan serten endividi ki'n ganny lakaz anba swa *Scheme Condominium* oubyen *Social Housing* i pa pe reste dan sa bann lakaz e ki pe lwe avek lezot dimoun.

Alor ki annan nou frer ek ser profesyonnel ki vreman bezwen lakaz e ki'n fer aplikasyon, me ki pa'n reisir. Sa pou mwan i mal ankor, e mon pou demann avek Minister konsernen pou fer en legzersis e gete kote ki annan sa tel ka ki pe arive, e fer sir ki sa kalite pratik i arete!

E parey Mosyon pe demande mon pou ensiste ki ban nouvo Polisi i vin pli kler lo la pou dekouraze ki i annan benn tel pratik a lavenir.

Ler nou pou pe elimin labi kot sa ki son sityasyon aktyel i pa vreman enn kot i bezwen en lakaz, me akoz son afilyasyon oubyen lyen familyal i pe fer li ganny privez par lao sa bann ki vreman bezwen, nou pou pe ede redwir nou lalis aplikan pou lakaz e donn dimoun konfyans pou vin fer zot kontribisyon.

Detrwa mo lo later, Mr Speaker ;- anba Polisi aktyel an sa ki konsern later piblik, pou en sitwayen kapab kalifye pou en kare later, i pou bezwen annan en aplikasyon *land bank* e atraver sistenm pwen pou determinen si i pou kalifye. Si i pa kalifye i annan sa bann opsyon swivan;

Fer lapel pandan en peryod 30 zour, les tonbe pou demann pou later e fer laplikasyon pou *Social Housing*, oubyen *Self-Finance Scheme*, oubyen swazir pou reste lo lalis ziska ki petet avek letan ou a kalifye pou en kare later.

An deor sistenm pwen en endividi i kapab fer demann pou aste en morso later, si sa later i baliz avek propriyete son paran, pour vi ki sa later pa'n ganny dezinyen pou okenn devlopman, oubyen pou okenn rezon medikal sertifye par en *Board*. Mon'n sey konpran sa, sa bann Polisi Mr Speaker mon pa'n tro konpran.



Polisi i la me konbyen nou bann sitwayen ki fer tel demann anba sa menm Polisi, me ki zot ankor ranpli ek fristrasyon aköz zot ankor pe troun an ron? A moman aktyel ki mon pe koze mon annan plizyer ka ki bann zabitan mon distrik i met devan mwan e ki mon pe sey mon mye ansanm avek Minister Konsernen, pou trouv en solisyon.

Parmi sa bann *case* i annan ki annan plizyer lannen, kot en zabitan pe demann aste en porsyon later Gouvernman ki baliz avek on propriyete e ki mwens ki 400 met kare parey in fer resorti dan Polisi, pour ki i kapab satisfere Lotorite *Planning* pou komans en konstriksyon en lakaz pou son zanfan, me in touzour war li pe bit avek en miray.

Polisi i la me politik osi ti la anba ladministrasyon presedan ;- kot kouler politik ki ti determinen si ou pou kapab aste en morso later Gouvernman.

I ansan plizyer ka dan mon distrik kot serten zabitan in apros Lotorite Distrik sa letan aköz zot ti'n idantifye serten kare later Gouvernman ki *vacant*, e ki'n kareman ganny refize an dizon ki napa later.

Me apre ki ou vwar, en lot dimoun aköz li i piti msye entel,

piti madanm entel i vini e i aste sa menm morso later. Sa ki'n byen pase in byen pase menm. E zabitan Cascade lizye in ouver e zot war dan kler sa bann manboulouk.

Mr Speaker avan mon terminen, mon pou osi demande ki *PMC* i revwar zot Polisi. Aköz nou priyorite se met plis dimoun dan lakaz. E ler ou annan bann *flat* de lasanm ki lo *ground floor* e ki sa fanmir in grandi kot pti frer 12an pe bezwen partaz menm lasanm avek son ser 19an.

Alors ki i annan lespas pou sa fanmir azout en lot lasanm, me i ganny dir non! Mwan mon pa war sa i fer sans e i akseptab, rezon ki ganny donner se ki lespas anba i piblik e ki si i annan en lasanm ki ganny azoute i pou defigir sa *housing estate*.

Mr Speaker sa i fors mon pou poz mon lekor en kestyon, eski nou priyorite i vremen pou met plis Seselwa dan lakaz, oubyen nou pli konsernen avek laparans kosmetik bann *housing estates*?

Mosyon ki devan nou i enn ki vin ek en lenportans imans e mon pou enplor avek Gouvernman pou fer tou posib pou asire ki meyer fason i ganny adopte. E mon pou donk aport mon sipor pou sa Mosyon

e mon pou demann tou mon bann koleg pou fer parey. Mersi Mr Speaker.

**MR SPEAKER**

Mersi Onorab. Onorab Jany Letourdie.

**HON JANY LETOURDIE**

Mersi Mr Speaker. Bonn apre midi tou dimoun. Mr Speaker pou plizyer lannen Manm piblik la deor in fer laplikasyon pou kapab ganny en morso later oubyen lakaz. E sa zot in fer plis avek Gouvernman plito ki avek bann sekter prive.

Mr Speaker mwan mon krwar, mon war e mon dakor poudir in annan en zefor par Gouvernman avan pou redistribye later avek Seselwa dan en fason *équitable*. Me Mr Speaker malgre tousala problem lakaz avek later i reste enn ki re pertinan e lalis aplikasyon bann dimoun ki ankor bezwen later ek lakaz i ankor tre long.

Mwan Mr Speaker ler mon ti lekol mon krwar nou tou, i dir nou ti annan sa *hierarchy*, mon pa konnen si ti annan 7 oubyen 9. En keksoz ki mwan mon mazin en parmi sa 5 pli enportan lakaz, savedir lozman i tre enportan pou dimoun, akoz ou bezwen *provide* dimoun avek lozman.

Ozordi Mr Speaker mon ti a kontan fer resorti, met dan latansyon mon Gouvernman, nou Gouvernman *LDS* detrwa pwen ki mon pe fer sizesyon e osi bann pwen ki bann dimoun laba deor zot mete devan ki zot ti a kapab fer zot kontribisyon pou amelyor zot sityasyon ; - par egzanp bann dimoun parey Farah e bann lezot Farahs ki kapab egziste.

Mr Speaker premyerman mwan mon reste en *housing estate* ki apel Roche Caiman e nou tou nou annan en pti bout ki ler nou'n fer nou lakaz lo la e prezan i annan bann program, i annan bann plan ki'n donner i dir ou, ou kapab donn '*permission to build*' ou zanfane sa i kapab tir presyon osi akoz i kapab fer de lasanm i kapab azoute oubyen si ou annan ase lespas ou kapab fer en pti detasman.

Me i annan dimoun ki'n fini pey zot later, zot lakaz pe al lo 3an la Mr Speaker zot pa ankor kapab ganny zot lavant akoz zot bezwen sa avan ler zot kapab fer lezot prosedir pou zot kapab ed zot zanfane.

Oli problem savedir la i annan en gro problem i annan en kantite dimoun la deor ki zot ankor pe esper pou zot ganny zot lavant later, e ki zot pa pe gannye ki la nou bezwen

regarde ki posibilite pou fer sa arive o pli vit posib.

Lot pwen Mr Speaker i konsern bann lespas ki nou trouve dan nou distrik ki nou konnen poudir i pa pou Gouvernman me selman i pou bann dimoun prive. Mon donn legzanp ankor Roche caiman akoz sa i landrwa ki mon'n reste pou pli ki 25an.

Depi ler mon kit Palais de Sport ziske pres vizavi kot mon reste zis avan *Eden Island* Mr Speaker apard *Bird Sanctuary* en legzanp ki mon pe donner. I annan en pwa Dimans la ki depi 25an mon pa ankor vwar naryen arive avek. Mwan mon ganny an konpran ki poudir mon krwar i annan 2 ou 3 *plots* la ki pou bann dimoun prive.

Me 25an parey mon pe dir ou nanryen pa ankor ariv lo la eski mon pa konnen mwan, eski mon pe propoze, mon pe demande eski i annan en posibilite pour petet Gouvernman re aste si in vann akoz ti pou Gouvernman mon asire sa bann later *at least* pou kapab fer ankor en pe lakaz pou bann dimoun.

Sirtou bann dimoun dan mon distrik, Onorab Vidot mon krwar ou devret siporte lo la e mon ava *back* ou *up* akoz koman *MNA* Roche caiman mon krwar ou devret met en lafors lo

la e mwan mon pou apiy ou mon parey mon touzour dir ou.

**(APPLAUSE)**

### **HON JANY LETOURDIE**

Senserman mon pe dir ou sa Onorab. Mr Speaker apre ki mon'n remarke apre ki nou ti fer nou konpanyi i annan en kantite bann pti biznes ki zot reste la Roche Caiman zot ganny difikilte akoz ou pa kapab fer gato piman, ou pa kapab *spray* en loto, sa nou konnen i pa byen.

Me selman sa bann dimoun zot ankor pe ganny prosekite avek Lalwa Lanvironnman eksetera, akoz zot napa en landrwa pou ale. Deza zot biznes pe ti pti e zot pa ganny priyorite pou zot al laba Providence, akoz kekfwa zot mwayen.

Me an menm tan osi, i annan bann dimoun ki fer enportasyon bann keksoz parey zot dir i vann dan lanmen e nou war poudir i annan en nesesite pou annan kekfwa en *building* kot ki kapab fer bann *storage*, ki kapab lwe ;- mon pa konnen rod en fason kot petet s larzan Lotorite Distrik i a kapab lwe e rezener sa larzan ki i ava vin pou distrik menm ankor.

Sa bann lide ki mon pe anvoye, e mon asire poudir dan

diferan distrik petet nou kapab vwar bann lespas kot nou kapab fer s propozisyon kot nou kapab ganny enn de *blocks* e apre fer en lespas pou bann dimoun kapab fer zot *storage facility* pou fer zot biznes. Sa i de Mr Speaker.

E lot pwen Mr Speaker ki mon ti a kontan fer mon kontribisyon lo la, se bann dimoun ki'n ganny zot lakaz sirtou Onorab Bastienne, akoz mwan mon konnen akoz mon annan fanmir ki reste laba Perseverance.

I annan mon pa konnen ki mannyer i apele, pardonn mwan, i annan sa *agreement* ki ler zot in ganny zot lakaz mon krwar pou lespas lan si nenport keksoz i arive, apre Gouvernman ki kontinyelman si delo i kase, elektrisite i ariv en problemm gouvernman ki vin repare ki tou fre i tonm lo Gouvernman. Mon krwar sa i pou en peryod lan.

Mr Speaker koman enn an i pase tou keksoz i komans kase dan lakaz e i vre e sa bann dimoun zot vreman war zot pe depans bokou, bokou plis ;- ki petet mon konnen i annan R550mil pou bann *Housing Finance* e sa bann dimoun zot war zot pe depans enormeman pou *top up* lo sa 550mil ki ler ou a pe gete konmsi ou a krwar zot

pa pe vreman ganny sa valer pou larzan.

Kestyon ki demande, ki mon demande ki mon poze, eski ler sa bann lakaz in fini fer eski i annan dimoun ki vin regarde? Eski i annan en *oversight* ki ganny fer lo la pou regarde si tou keksoz i annord i an konformite? Sa ankor dimoun petet ennler zot apel sa konmsi ou a krwar konmsi zot pe ganny en *rip-off* konmsi Mr Speaker.

Sa mon ti ava demande ki dezormen petet letan nou fer nou bann lakaz, annou fer sir nou fer li en fason standar, en fason ki ase for ki ava permet nou bann dimoun pou zot fer lezot keksoz apard retournen, al aranz delo dan plafon ki pe koul partou, parey bokou bann Onorab in fer sorti Mr Speaker.

Mon dernyen pwen Mr Speaker ki mon ti a kontan fer mon kontribisyon lo la, bokou Onorab in koz lo la ankor, se bann materyo ki nou servi. Mon pa pe dir retourn ankor dan kabinen trou *or whatever* konpran mon byen, byen koze i fer byen konpran. Mwan mon'n grandi dan en lakaz tol en gran lakaz tol ki ti anboufte e anler ti o ti lo pilye.

I parey bann grannkaz lontan, telman i ti o, ler ou ti ankor ptipti dan bann 8an, 10an ou pa ni menm ganny

sans pou ou tous son plafon anler anba la akoz telman i ti o, ou ti kapab met en lot lakaz.

*Anyway*, i annan lakaz ki ti ganny fer avek plans, Onorab Hoareau taler in al en pe pli lwen in redonn tou bann lezot materyo konstriksyon, ki kapab kout en pe pli meyer marse ki nou kapab servi pou nou fer lakaz pou nou bann dimoun.

Me i annan bann dimoun osi Mr Speaker ki zot annan zot morso later ki paran in partaze e zot annan en pti larzan me selman i pa aziste.

Eski nou Gouvernman i a pe ankouraze kekfwa pou fer en demars pou an deor sa bwat pou regarde bann materyo ki i ale avek nou lanvironnman, ki kapab kout pli meyer marse ki osi kapab deservi nou bann dimoun ki kontan. E pou li omwen i ava war li in tir sa fardo en pe lo Gouvernman ki li osi i ava satisfè ki in ganny en komansman.

Aprè pli tar ler son mwayen kekfwa i ava pli permet li i ava regarde, si i pou ofer lezot keksoz lo la si i pou fer li an blok oubyen. Me selman ankouraz sa bann dimoun fer sa konsiltasyon avek dimoun avek manm piblik avek bann arsitek avek bann teknisyen ki annan pou regarde ki bann meyer fason ki apard blok,

*cement block* oubyen *prefab* ki mannyer nou kapab fer sa.

Mr speaker mwan mon pou donn tou mon sipor akoz mon vwar poudir i en size ki toultan dimoun pou anmenn lakoler lo la akoz si en dimoun, sitwayen letan i pa byen, i pa *happy* son leta moral osi i pa byen.

E sa mon pou donn tou mon sipor pou fer sir ki nou Gouvernman mon dir li, tou dimoun dan Gouvernman fer nou mye, ki omwen nou a kapab koriz sa ban lenzistis ki'n arive pou fer sir ki nou annan en pep ki viv ere, an bonn sante akoz son leta moral i byen. Mersi Mr Speaker.

### **MR SPEAKER**

Mersi Onorab. E swivan Onorab François Adelaide.

### **HON FRANCOIS ADELAIDE**

Mersi Mr Speaker. Bonswar tou bann dimoun espesyalman bann dimoun Baie Lazare ki pe ekoute. Mr Speaker mon pa pou fer zistis sa Mosyon, si mon pa donn mon koleg Onorab William sa sipor vi ki nou sorti dan menm rezyon e nou konn vremen bann problem ki bann dimoun i pas atraver.

E Mr Speaker aktyelman la ler nou pe koze i annan bokou bann dimoun la deor ki

pe pas atraver en ta problemm *in regards to* lakaz avek later, e dan mon distrik i pa en leksepsyon.

So mon pa pou kapab servi sa 5 minit ki mon pou gannyen pou petet koz en pe lo enn de bann sityasyon e ki mannyer nou kapab anmenn en pe solisyon pou ou kapab rezourd zot problemm.

Ankor dan detrwa zour i pou al fer lan depi ler Gouvernman LDS ti pran pouvwar e mon osi mon ti lager pou anmenn sa sanzman e ozordi mon pa dan L'Egzekitiv, mon dan Lezislatif e byensir se pa gouvernman ki ti met mon la se byensir mon piblik ki ti met mon la e mon pou bezwen fer sir ki mon pou lager pou mon piblik.

E mon kapab dir avek Onorab Pillay ki Lasanble Nasyonal i pa L'Egzekitiv, so Lasanble Nasyonal i la pou ekout son bann zabitan e pou anmenn bann pwennvi valab pour ki nou ava kapab pran en solisyon.

E deswit Mr Speaker mon pou demande ki Gouvernman i o pli vit posibil anmenn sa revi lo sa zafer later avek lakaz.

Akoz parey in dir in ganny diskite dan *Cabinet*, nou, nou pa dan *Cabinet*, nou, nou dan Lasanble Nasyonal. E i

enportan ki nou annan konsiltasyon pour ki nou, nou a kapab koz ek nou piblik e ansanm nou ava fer en travay ki pou vreman benefisye pep Seselwa.

Mr Speaker Baie Lazare parey nou'n dir, bokou letan nou'n koze, vre i annan en pe later, me selman ozordi mon pou debout pou bann zabitan Baie Lazare aköz nou vwar nou pe tro ganny ranplase.

Nou vwar bokou bann dimoun ki pe sorti bann lezot distrik aköz zot mwayen i en pe pli for ki nou zot pe ganny later e nou, nou pe ganny pas pou petet nou a kapab dir bann sitwayen apre.

Me sa mon krwar dan sa revi later, sanmenm sa mon pe demande ki Gouvernman ler i anmenn sa Polisi e mon pa tro, tro kontan, sa mo Polisi petet Lalwa ti ava en pe pli bon en pe pli *binding*. Pour ki dezormen zabitan Baie Lazare zot osi pa aköz zot annan later ki zot bezwen donn tou dimoun ki nou, nou pa gannyen.

So, mon krwar priyorite i devret pou bann zabitan Baie Lazare aköz zot pe espere i annan bann ki annan 11an e zot *meet* kriter.

E mon ti a kontan ki petet zot osi zot kapab ganny konsidere aköz en lakaz swa en

later i pa en *luxury* konmela e mon kapab die i en *must*.

E mon krwar poudir Gouvernman in ler pou li pran en desizyon pou dir eski i annan later ouswa nou bezwen rod en lot fason pou nou kapab donn dimoun lozman. Si napa later nou bezwen admet ek nou lekor poudir napa later.

E Seselwa i bezwen konpran poudir mannyer keksoz pe ale avek nou popilasyon ki pe vini byensir later pou vin en problem, e parey mon'n dir dan Baie Lazare nou dimoun i bezwen pas pou priyorite.

Mr Speaker bokou koze in koze lo *land point* avek *housing point system*, e mon osi pandan mon manda dan lopozisyon sa letan mon ti koz for.

Akoz mon ti trouve poudir i annan en de balansman ladan, aköz mwan mon ti'n menm annan dimoun ti ganny 83 pwen dan rafal Bidze si zot mazine mon ti met lipye ater. E byensir sa zafer *land point system* avek *housing point system*, mon krwar li osi nou devret reviz li o pli vit posibil, pou fer sir sa ki merite i gannyen.

Mr Speaker ler nou pe koz lo *affordability* lakaz avek later, e i annan bann keksoz ki petet i kapab fer sa bann dimoun dekouraze. Mon annan en proze

Baie Lazare ki mon pe pouse, en *sewage treatment plant* ou bann dimoun Anse Gaulette Ex-Pool.

E ziska ozordi mon zis ganny anvoye, mon ganny anvoye, mon ganny anvoye e bann dimoun isi i, zot soufer.

E sa i ede pour zot petet al rod en lot lavi aryer, pou al rod en lot bout later, en lot lakaz. Me si Gouvernman aktyel i deside *tackle* sa problem, definitivman bann dimoun i ava ganny plis lanvi pou reste kot zot e byensir demann pou lakaz avek later i ava desann.

Baie Lazare i annan en bon pe later prive, *PPP* par egzant ki Onorab Georges in dir, e mon krwar nou devret komans antre ladan en pe pli vit posibil, nou dimoun pe espere.

Mwan mon krwar ki koman *MNA* pou Baie Lazare mon pe koz avek Gouvernman la ki lan pe pase semenn prosenn i pou sote, nou pou bezwen pli serye, e pli *tackle* bann problem pour ki bann dimoun Baie Lazare, e bann dimoun dan Sesel an zeneral i a santi zot lavi en pe pli konfortab.

Mr speaker mon konnen mon letan i en pe kourt, me solman sa ki mwan mon an i dir se sa i en keksoz ki nou pa pou kapab kontinyen ankor lot lannen pou mwan vin koz ankor

lo la, akoz mon pou santi mwan, mon pa pou santi mwan konfortab.

E petet mon dernyen pwen mon pou mete Mr Speaker dan mon bann resers Baie Lazare mon'n trouve ki kantite later ki bann dimoun ki'n deza annan i annan ankor. E la mon pou demann Minis mon pou demann Gouvernman pou li kapab donn tou distrik, donn tou distrik zot *land use plan*.

Pour ki nou tou nou ava konnen kote ki annan later pou lakaz e ki bann lakaz ki nou kapab fer, e kote ki annan bann plan pour bann lezot devlopman.

Dimoun dan distrik i ava kapab ganny konsilte e nou ava met nou *input* ansanm pour ki nou distrik i ava devlope, e kot i bezwen annan lakaz dimoun dan distrik i ava kapab met nide ansanm. E menm rod bann dimoun ki anvi investir dan distrik pou fer sir ki sa proze lakaz pour ki nou pep i a benefisyé.

Mr Speaker mon pa pou tarde. Onorab William mon byen kontan ou'n anmenn sa Mosyon, mon pou siport ou tou dilon e nou fer sir ki sa proze i ganny realize. Mersi.

### **MR SPEAKER**

Mersi Onorab. E nou a ekout Onorab Wavel Woodcock. Wi Onorab Loze wi, dir mwan ki *Order* sa?

### **HON JOHAN LOZE**

Annou fer li anba *Order* 49(1) Mr Speaker.

### **MR SPEAKER**

Wi.

### **HON JOHAN LOZE**

Mr Speaker. Lasanble an se moman nou pe fonksyonn anba en lord ki ti ganny *issued* par Deputy Speaker avan nou ale. Deputy Speaker ti fer kler konmkwa ki i annan 12 dimoun lo lalis e ki son lalis in fermen.

Onorab Woodcock in lev lanmen ler ki Onorab Pillay ti pe koze, mon pe asize la mon war li lev son lanmen mwan.

So in lev son lanmen anba lord *knowing full well* ki Deputy Speaker in dir li. Ki mon krwar i en mank respe pou ou e pou Deputy Speaker *and for the other members*. Mersi Mr Speaker.

### **MR SPEAKER**

Mersi Onorab Loze. Me Onorab Woodcock son non i lo lalis ki Deputy Speaker in les avek mwan. Alor mon sipoze i ti'n leve son lanmen avan ki mon



ante. Mersi. Nou a ekout Onorab Woodcock.

**HON WAVEL WOODCOCK**

Mersi Mr Speaker. Mr Speaker mon krwar i enportan pou mwan koriz sa *misapprehension* ki pe arive la. Le rezon ki mon non ti lo lalis avan mon ale se ki annefe ozordi 3er apre midi Prezidan Wavel Ramkalawan in *assent* Lalwa pou *repeal Criminal Defamation*.

E koman Chairman lo Komite pou medya lazenes avek kiltir mon ganny envite pou *attend* sa seremoni. Ki mon fer avan mon ale Mr Speaker mon ti'n fini notifiye Deputy Speaker pou met mon non, lo lalis pou mon koze ler mon trounen. La ki mon'n fer ler mon dan Lasanble mon zis notifiye ou Mr Speaker, pou fer sir ki mon non i ankor lo lalis. *Ok*.

**MR SPEAKER**

Wi.

**HON WAVEL WOODCOCK**

So Onorab Loze mon pa konnen, ler ou pa konn en keksoz plito ou reste ou trankil.

**MR SPEAKER**

Wi ou'n eksplike Onorab Woodcock ou kapab kontinyen.

**HON WAVEL WOODCOCK**

Mr Speaker ou konnen Lepep Seselwa deor i merit sagrinen, zot merit sagrinen sirtou ban ki elekte bann Manm *US* lo lot kote latab. Ozordi nou pe koz lo en Lalwa sitan enportan ki tous, (*sorry*) lo en Mosyon sitan enportan ki pe tous tou kous nou popilasyon.

Nou pe koz lo later, nou pe koz lo lakaz, alokasyon later ek lakaz pou bokou nou bann frer ek ser Seselwa ki pou plizyer lannen zot pe espere pou zot ganny en bout later ouswa pou ganny zot lakaz. Me ki nou'n war ozordi Mr Speaker se ki i annan 7 Manm Elekte lo lot kote latab, 3 Manm Proporsyonnel.

Sa 7 Manm Elekte napa enn ki'n pran laparol pou adres en size sitan enportan, zis en Manm ki pa'n zanmen ganny elekte dan son lavi ki'n adres sa Mosyon ozordi. Ozordi nou annan laliberte lekspresyon dan nou pei, en *Leader* pa kapab gard son bann manm pou anpes zot koze lo en topik ki tous zot popilasyon ki tous zot pep dan zot distrik.

Mr Speaker dan *LDS* nou pa parey *US* nou, ou konnen akoz i annan divers lopinyon lo kote *LDS* Mr Speaker akoz nou pa parey zot. Nou tou nou annan nou drwa pou nou koze

pou eksprim nou lekor dan la fason ki nou oule.

Onorab *Leader* Lopoziyon, Onorab *Leader* Zafer Gouvernman in koz lo *Public Private Partnership* ki mon santi i en bon keksoz ki nou merit *venture* ladan, akoz Gouvernman i kapab annan en Polisi kot bann dimoun dan sekter prive.

Gouvernman i kapab fer provizyon pou fer later Leta *available* kot bann dimoun nou kontan dir *PPP - Public Private Partnership* bann dimoun an deor dan sekter prive i kapab antre ladan *build* bann lakaz pou bann dimoun Sesel. A en pti ase abordab. Sa i enn bann *area* ki nou kapab *venture* ladan, i en propozisyon ki enportan.

Lo lot kote Onorab Samynadin boner in tous lo sa size *social housing* ki li osi i en konponan enportan ki napa okenn ante nou la ki'n dir annou *scrap*, annou tir program *social housing*, i ankor egziste i ankor form par dan *manifesto LDS*.

Konmsi mon santi pour ennler sa bann konparezon ki zot pe fer i pa fer sans. Ou pa kapab konpar en Gouvernman ki'n la pou 43an avek en Gouvernman ki pa ankor ni ganny lan ki prezan ki i pe al

ganny lan, en Gouvernman ki pe fer son mye pou retir pei dan en kriz ekonomik dan en trou ki Gouvernman presedan in met nou ladan.

Mr *Speaker* sa Gouvernman lavolonte i ankor la, nou anvi ed nou pep, nou anvi ed nou popilasyon, nou anvi ed nou Nasyon. *Leader* Lopoziyon in koz lo anrisir deba, me deba pa'n ganny anrisir Mr *Speaker* akoz bann Manm lo lot kote latab, bann Manm Elekte pa'n koze, pa'n met zot pwennvi devan.

Ti pou enportan pou annan sa dyalog, pou nou fer lesanz nide pou nou get ki manner, pou nou asiste e ed nou pep dan sa sityasyon ki nou pei i ladan ozordi.

Mr *Speaker* annou koz lo bann Polisi lakaz ki deza egziste, en konsern ki plizyer zabitan mon distrik in met devan mwan. Annefe pa zis dan mon distrik avek plizyer dimoun, ki mon'n koz avek zot dir en Polisi, dan lepase en keksoz ki Gouvernman in fer dan lepase se pou fer bann lakaz zis en lasanm, ouswa menm ozordi i annan bann lakaz ki ou war pe ganny fer 2 lasanm.

Gouvernman i merit konsidere ki olye fer en lakaz en lasanm, ouswa de lasanm ki

tou lakaz ki ganny fer in ganny fer 3 lasanm, akoz?

Ki nou'n war dan lepase se akoz ler Gouvernman i fer en lakaz en lasanm i met en fanmir ladan kekfw a i annan zis en zanfan apre sa fanmir i grandi i ganny 2 ou 3 zanfan.

Ou war poudir apre Gouvernman in bezwen fer lezot lakaz 2 lasanm 3 lasanm pou met sa bann fanmir ladan, akoz fanmir in agrandi e en lakaz en lasanm pa se pou zot ouswa en lakaz de lasanm.

Mon krwar i merit annan en Polisi ki okenn lakaz bann *social housing programs* dan le fitir ki ler Gouvernman i fer lakaz i merit konsider tou lakaz 3 lasanm, pou nou pa war nou dan sa sityasyon kot ler fanmir in agrandi, ou bezwen trouv en lot landrwa refer ban lot proze pou remet sa bann fanmir ladan.

Sa i en bann keksoz ki mon krwar in kre en *issue* dan lepase e i enportan fer resorti Mr Speaker ki fodre zanmen ankor i annan lapliferans politik dan alokasyon lakaz. Nou bezwen tir politik, akoz nou tou nou konnen napa naryen pou kasyet.

Lot kote latab zot konn tre byen mannyer keksoz in marse oparavan, se ki dan lepase ou lapartenans politik i zwe en

gran rol, dan lekel ki ganny lakaz ouswa lekel ki pou ganny en kare later lo *land bank*.

En keksoz osi enportan pou ganny fer Mr Speaker se pou reviz sistenm pwen. E dan lepase mon rapel ler Minis Charlette, ler ti vin devan Lasanble Nasyonal en kestyon ki ti ganny demande, se mon krwar si mon pa tronpe mon ki ti demann sa kestyon lo regar dan sistenm pwen.

I ti oule en leksplikasyon lo ki mannyer alokasyon lakaz i ganny fer, kot i dir, i ti dir si i ti baze plizoumwen lo sityasyon sosyal bann aplikan lo lekel ki pou ganny lakaz.

Mon rapel i ti pe eksplike si en fanmir i annan plis ki en fanmir dan en lakaz i ganny plis pwen, si i annan en fanmir i annan, kekfw a i annan zanfan ki pe dormi dan salon i ganny plis pwen, e si i annan lot zanfan pe dormi dan lasanmben i ganny plis pwen.

Konmsi ti annan en sistenm pwen konmsi ki mon'n war in, i pa ti neserman ankadre tou dimoun akoz in ti met bokou bann dimoun a en dezavantaz.

Sirtou bann bokou bann zenn enportan, sirtou bokou bann zenn ki'n kontribye dan nou lasosyete, bann zenn

kefwa ki'n form zot fanmir, ki zot in fer aplikasyon lakaz.

E zot, zot ganny dir poudir non ou pa pou gannyen ou akoz ou, ou annan zis en zanfan alors ou, ou bezwen atann. Ou konnen nou'n defavoriz en sours nou popilasyon bann dimoun ki kefwa zot in pran zot responsabilite en fanmir ki li in plan son lekor, e in plan son fanmir i annan petet en fanmir zis en zanfan.

E menm i annan bann dimoun ki petet in deside pou li pa annan zanfan. Me ler li i al fer laplikasyon i ganny dir poudir be non, non ou pa pou gannyen ou akoz ou napa ase zanfan pou ou gannyen.

Ou konpran konmsi i enportan ki nou get tou dimoun, nou pa zis get sa laspe sosyal me nou osi nou get bann dimoun ki pe kontribye, bann dimoun ki'n ... i enportan ki nou balans keksoz nou pa get zis en kours sosyete me nou get tou dimoun, nou ankadre tou dimoun dan nou popilasyon.

En lot keksoz Mr Speaker kot i konsern fer lakaz, i enportan ki bann lakaz ki ganny fer i bann lakaz ki lo standar, pa bann lakaz ki koman ou fini fer pa pas detrwa semenn, detrwa mwan lakaz dir war bann problem i konmans

leve ou war kot tol i kole, *water storage* dan plafon i komans kase.

E mwan ler mon mazin detrwa ka lo Praslin Moulinien *Estate* i enn ki Onorab Gill i konn tre byen kot bann till ti sor, ti grennen lo lakaz. Ki apre zot in bezwen depans sepa konbyen larzan pou sanz twa lo sa bann lakaz ki ti pou fer sa bann dimoun peye.

Me akoz i en lager ki'n ganny anmennen granmersi sa bann dimoun pa'n bezwen peye pou ranplas tol lo lakaz. *Tamatave Estate* 1 i enn.

Problem tenk dan plafon i *leak* plafon delo in gat plafon dibwa in pouri, nou war bann ka parey *Ex-Teachers Estate* Praslin kot pi perdi in ganny fer devan lari dimoun kot loto i park, sak fwa mare-o pi perdi i deborde e i napa *STP* konmsi i annan bann keksoz ki'n ganny fer *without proper planning* ki *in fact* i parey nou'n vann bokou dimoun.

Parey nou kontan dir an kreol kabri dan sak nou don zot en keksoz ki apre zot in *end up* depans pli bokou larzan pou zot refer *maintenance* re aranz sa bann landrwa ki Gouvernman in donn zot. En lot size Mr Speaker ki mon bezwen koz lo la e sa size *Scheme Condominium*.

Mr speaker sa ti en program ki ti ganny fer pou bann *return graduate*, me ki nou'n war dan lefase ler in ariv ler dan lefase pou fer alokasyon *condominium* mon pa pou mansyonn personn, mon pa pou target personn. Olye ki bann *return graduate* ki'n ganny *condominium* nou'n war bann O-Zofisye dan Gouvernman ki'n ganny lakaz. Ok ?

I annan en bann ki ti deza annan zot later zot in van zot later, sa ki ti deza annan zot lakaz zot in vann zot lakaz zot in ganny *condominium*. La al konte dan bann *condominium* partou Perseverance e plizyer lezot landrwa nou a war kantite O-Zofisye Gouvernman ki dan *condominium* ouswa zot piti ki pa'n zanmen *graduate* dan liniversite ki pe reste dan sa bann *condominium*.

Tousala i bann pratik ki'n arive dan lefase ki nou bezwen regete, Polisi en later Leta par personn bokou rezidansyel. Ouswa en lakaz Leta par personn. Mr Speaker nou tou nou konn bann *case* ozordi deor e dan piblik i annan Minis ki'n ganny plis ki 51 bout later, ok?

I annan en bann ki'n ganny plizyer bann ptipti bout apre in re vann sa bann ptipti bout in ganny bann gro bout.

Apre i revann sa gro bout ankor i ganny bann pli ankor bann pri pi bout menm. Mr Speaker sa i ban keksoz ki'n arive e nou bezwen reviz sa bann Polisi pou fer sir ki sa bann keksoz pa ariv ankor.

Akoz la later i en resours limite, ozordi later in vreman limite nou'n bezwen rod en fason ki mannyer ou pou zer sa pti git later Leta ki reste. Ou bezwen fer li dan en fason ki byen, dan en fason ki efikas.

Mr Speaker i annan bann pe koz bon labous ozordi ki Gouvernman in fer isi, Gouvernman in fer laba, *Leader* Lopozisyon in ponp son Gouvernman. Me selman in bliye li menm poudir son Gouvernman i, zot parmi bann ki'n pran later Leta zot in donn bal lo later Leta.

Zot in pran 46 bout zot in fer sa ki zot oule lo la e i annan bann bout ki zot in gannyen pou R1 sa osi ti merit koz sa, zis mazine 46 bout later *United Seychelles* kantite lakaz, kantite *condominium* ki nou ti pou kapab fer lo la ki ti pou benefisye Lepep Seselwa.

Tousala i bann keksoz ki'n arive dan lefase ki nou Gouvernman i dir pa kapab kontinyen, nou bezwen sanze. Mr Speaker parey onorab *Leader* Lopozisyon, *Leader of*

*Government* in dir Gouvernman i bezwen antre dan negosyasyon avek bann dimoun dan sekter piblik pou aste later.

I enportan sa, i annan bokou dimoun, mwan i annan en kantite dimoun dan mon distrik in apros mwan mon mazine ki i annan bokou dimoun osi ki dan bann lezot Manm dan Lasanble ki plizyer zot bann *constituent* in apros zot in dir zot koumsa;

“Meton mon annan en bout later en ektar ouswa detrwa ektar ouswa detrwa milimet kare e mon anvi, mon pare pou mon vann sa later avek Gouvernman pou zot fer en proze *condominium*, pou zot fer en proze lakaz ouswa pou zot fer zot devlopman ankor. I annan en kantite dimoun ki annan sa volonte pou vann zot later avek Leta e mon krwar poudir Leta i bezwen idantifye sa bann dimoun, ganny en konversasyon avek zot pou aste sa bann later.

Petet zot kapab negosye lo en pri ase abordab, e Gouvernman i kapab ganny sa bann later pou ede fer bann proze parey mon dir lakaz, *condominium* ouswa lezot devlopman ki pou benefisye nou bann dimoun Sesel.

En lot keksoz Mr Speaker mon pe konklir, en lot keksoz

Mr Speaker se nou bezwen ankouraz. E fasilite *loan* pou bann ki oule fer lakaz kot zot paran. Parey bann zanfan ki zot paran in donn zot *permission to build* mon krwar i annan en Mosyon si mon pa tronpe Onorab Bernard Georges ki ti anmennen sizyenm Lasanble.

Kot nou bezwen ed bann dimoun ki zot kot zot paran e zot annan en bout later zot oule devlop sa later zot oule fer - *I don't know* en lakaz *semi-detached* ouswa en lakaz ouswa fer, azout en lasanm pou ganny loportinite pou zot kapab fer sa bann fasilite *loan* pou ed zot.

Mr Speaker dan lepase in napa *proper planning* lo later *land bank*, later *land bank*. En ta legzanp mon kapab donner Saint Sauveur i enn kot i annan en fanmir 15 dimoun it pe reste dan en lakaz, lo en later. Gouvernman i vini i *subdivide* sa later an 4, 6 morso. Lo sa bann dimoun, sa bann dimoun pa ni okouran apre zot Gouvernman ni apros zot i dir zot bezwen sorti la.

15 en fanmir 15 dimoun dan en lakaz, zot in reste la pou plis ki 30 an.

### **MR SPEAKER**

Onorab atann mwan en pti kou.

### **HON WAVEL WOODCOCK**

Yes.

**MR SPEAKER**

Mon konpran Deputy Speaker ti'n donn en direksyon bann Manm pou 10 minit e mwan mon obzerve ki lezot Manm in swiv. Alor mon a envit ou konklir.

**HON WAVEL WOODCOCK**

*Ok* mon ava *conclude* Mr Speaker. *Ok*. Mon ava ferm la Mr Speaker. E ozordi nou war sa fanmir zot pe ganny dir zot bezwen sorti ki annefe la zot pe sey lager pou Gouvernman rod en fason pou asiste sa bann fanmir.

Alor Mr Speaker i enportan ki sa size later i ganny gete avek en lizye vreman, vreman serye.

Parey mon dir i en topik ki vreman enportan ki ozordi mon vreman, vreman sagren ki deba i plizoumwen lo nou kote latab lo kote, *LDS* me malerezman ki lo kote *US* zot pa enterese avek byennet bann zabitan dan zot distrik, kot i konsern sa size later avek lakaz. I vreman enkyetan Mr Speaker. Avek sa de mo mon dir ou mersi.

**MR SPEAKER**

Mersi Onorab. Byen a se moman mon ava anvoy loter Mosyon Onorab Waven William

pou fer son *summing-up*. Mersi Mr Speaker.

Mr Speaker mon anvi komanse par dir ki mon pa ti reve yer swar e deside pou anmenn sa Mosyon ozordi. Mon a osi dir ki si mon ti dan sizyenm Lasanble e lo kote *US* zot ti pou dir mon poudir *timing* sa Mosyon pa bon pa anmennen.

Mr Speaker mon ava osi azoute ki Lopoziyon zot dir nou zot krwar dan progre, nou toultan ganny lesanble ki nou bezwen *think outside the box*, me solman lenpresyon ki ou gannyen se zot anvi nou reste e viv dan bwat olye ki sorti.

Mr Speaker mon pa kapab ganny en konpran dan sizyenm Lasanble letan mon ti lo kote *US* ler ou regard ban kestyon, bann Mosyon ki'n ganny anmennen par *US* sirtou lo sa bann size konsern lakaz ek later, drenaz desarz ensidswit.

Mr Speaker mon vreman vwar li drol ki ozordi avek en Lopoziyon ki krwar dan progre, ki krwar dan evolisyon devlopman Mr Speaker *timing* sa Mosyon lefe ki byento nou e al selebre lan laviktwar sanzman. Sa Mosyon efektifman Mr Speaker pe regard ver evolisyon devlopman nou pa anvi reste dan kad sa

43an avek tou sa bann problemn Mr Speaker.

E mon ti a kontan koriz *Leader* Lopozisyon ki Onorab Georges pa'n dir aboli *social housing*. E in rekonnèt ki ansyen ladministrasyon in fer bokou lakaz, in met a dispozisyon bokou kare later, mon osi mon'n avoue sa, akòz mon osi Mr Speaker Grand Anse ler mon ti pe rod mon kre later Mr Speaker, mon pa ti rod zis pou mwan Mr Speaker.

Mon ti fer sir ki bann zabitan otour mwan ki pa ti ankor ganny en kare later ouswa vin en propriyeter ki zot osi zot benefisye an menm tan parey mwan Mr Speaker. E ozordi mon fyer ki bokou bann zabitan Grand Anse Mahe zot propriyeter e zot annan zot lakaz. E sa i pa vedir poudir nou pa pe rekonnèt Mr Speaker.

Mr Speaker mon vwar ki lopozisyon ankor ozordi in mank en lokazyon pou zot ansanm ek nou rod sa ki pli bon, sa ki pli meyer pou asire ki nou sitwayen bann ki deza propriyeter, ouswa pe aspire pou vin propriyeter zot kapab ganny *the best deal possible* e an menm tan bann lenfrastruktir dan en pri abordab Mr Speaker.

Mr Speaker mon kapab dir osi ki sa Gouvernman la ki fek

vini in erit en bon pe fardo ki ozordi Lopozisyon zot anvi atraver bann komitman ki'n ganny fer ki sa Gouvernman dan lespas lan i *attempt* pou rezourd tou.

Menm si nou konnen ki mondyalman lefe ekonomik pandemik *COVID* lo tou pei ki pa'n eparny Sesel ki nou pe fer fas avek Mr Speaker. Mr Speaker nou anvi ki keksoz i ganny fer byen, parey Onorab Georges in dir nou pa pe dir aboli *social housing*. Me nou pe dir ki i bezwen annan en distenksyon ant bann kalite lakaz.

E mon pou dakor avek li Mr Speaker akòz kot mon'n ganny elekte mon konn sityasyon mon bann zabitan, mon konnen ki zot soufrans e zot douler.

Ozordi letan zot pe al rod en *loan* ouswa bann kriter ki ganny met devan zot pou zot kapab ganny en lakaz.

E mon santi poudir ki nou bezwen evolye lo la, regarde ki fason nou kapab annan konsiltasyon avek zot an menm tan donn zot bann swa e posibilite dan kalite lakaz ki zot bezwen ozordi Mr Speaker.

Mr Speaker Lopozisyon i bezwen sorti dan sa vye *mindset*. Nou, nou pe evolye nou anvi bouz pli devan e mon



pou dakor avek Onorab Georges ki wi ozordi kot nou'n arive dan sa konzanktir devlopman sosyoekonomik, lapros in ganny fer oparavan ozordi i annan sa nesesite pou revwar Mr Speaker.

Akoz legzizans sityasyon mondyal e Nasyonal, Mr Speaker mon pou tonn dakor avek tou bann pwen ki lo kotye Manm Lopozisyon in pran laparol zot in koz lo la e wi i bezwen annan *fairness*.

Mr Speaker ki mon vwar se ki ou annan en Lopozisyon ozordi ki ankor fermal partou, zot ankor brile e lanse Mr Speaker.

Akoz Mr Speaker zot vwar ki tou zot bann stratezi pou anpes nou bouz devan, pou annan en *mindset* avek *free thinking* Mr Speaker pou zot sa ozordi i en gro problem. Mr Speaker nou krwar ki bezwen annan en revizyon.

E sa nouvo Gouvernman par lefe ki in ganny lan in ase etidye sityasyon, e *Leader* Lopozisyon taler in dir ki be sa enn ki pa reponn telefonn aköz nou pa dil avek. Mr Speaker nou konnen ki pou arive, sa fraz viktimizasyon pou monte Mr Speaker.

Me solman mon pe demande si zot ti ekout Anbasader Marylise Potter

letan, ki i ti dir letan en nouvo Gouvernman i vin o pouvwar, ki devret arive. Mr Speaker sa i en lot deba dan li menm.

Mr Speaker mon krwar poudir i annan sa nesesite revwar tou. Mr Speaker ler mon lir paz 35 dan *manifesto LDS* ki'n al dan eleksyon 2020 lo tol Manm Lasanble Mr Speaker. Mr Speaker mon pe pran sa rol vremen serye. E mon pou lans en lapel avek nouvo Gouvernman.

Mon vwar ki *Physical Planning Bill* pe vin devan Lasanble byento, Mr Speaker lan pe al pase i pou enportan ki bann ki dan Egzekitiv zot ekout nou en pe plis. Ki sa konsiltasyon i ganny fer ase plis aköz nou konn en bon pe keksoz, en bon pe lenformasyon i nou kapab ed zot dan sa demars pou don Seselwa sa ki pli meyer.

Mr Speaker mon a dir osi ki nou pa kapab dan distrik bann desizyon i annan en lenpak nasyonal dan sa kominote ki Lotorite Distrik pa ganny enkli dan bann konversasyon, kot ou vwar bann lagreman ki'n ganny fer par ansyen Gouvernman ki ozordi i ankor annan bann dimoun ankor pe kasyet lenformasyon.

Mr Speaker nou pe dir avek Minis konsernen ki nou anvi en amelyorasyon lo la, akoz si non nou pou bezwen anmenn zot dan Lasanble e fer zot donn nou larepons akoz sa i nou rol Mr Speaker.

I pa vedir ki nou kont Egzekitiv parey petet *Leader* Lopozisyon pe krwar poudir akoz sepa Polisi pe ganny diskrit lo la, ki koman en Manm Parlman prenon kont ki nou konn nou rol koman en Manm Parlman ki nou pa kapab kestonnen ouswa anmenn sizesyon.

Mr Speaker mon ava demande ki Gouvernman i konsider sa Mosyon e bann sizesyon ki'n ganny met devan e ki keksoz i ganny er byen.

Mr Speaker mon pa kapab ganny en konpran ozordi bann *young graduates* ki nou'n promet zot pou fer zot ganny en *condominium*, ki ozordi menm si zot pa ankor travay ouswa ganny en travay zot pe rod en loan zot pe ganny demande R300mil Mr Speaker pou depoze.

Mr Speaker sa bann keksoz ki nou bezwen sanze. Mr Speaker en lot keksoz ki mon krwar sa Gouvernman pou bezwen letan i pe pran konsiderasyon nouvo devlopman Mr Speaker sa Mr

Speaker pour mwan parey mon dir i trakas mwan.

I pou bezwen komans mazine ki fason pou met sa proze tretman desarz lo en plan rezyonal Mr Speaker.

Par lefe ki nou en destinasyon touristik e nou premye pilye lekonomi Mr Speaker, si nou tro tarde avek sa nou pou annan nou en lenpak vremen negatif e letan sa i vin o piblik e o nivo enternasyonal Mr Speaker i kapab afekte nou gravman.

Mr Speaker avek sa de mo mon anvi remersi tou bann Manm ki'n koze e mon konnen poudir pep Seselwa la deor in dezapwente, akoz nou ti ekspekte ki Lopozisyon ti ava zwenn avek nou pou kontribye.

Mon konnen zot pa forse koze, me solman koman en Lasanble serye en Lasanble ki anvi sa ki meyer pou pep Seselwa nou ti ava swete ganny zot lopinyon. Mr Speaker mersi bokou. Mersi pou zot sipor.

### **MR SPEAKER**

Mersi Onorab William. Onorab Pillay mon pa pou kapab ouver en deba, eski ou pe al koriz en keksoz ki annan referans avek ou, silvouple fer zis sa akoz nou a bezwen bouze. Wi.

### **HON SEBASTIEN PILLAY**

Mersi Mr Speaker. Mr Speaker mon pou koriz en *misapprehension* ki Onorab in fer, Onorab nou pozisyon lo Mosyon e ki nou, nou konnen ki ou Mosyon pa *binding* e ki napa naryen ki lanse swa ki brile avek, nou ki nou santi ki si nou Gouvernman ti serye i pa ti ava anons en Polisi *regarding* lakaz ek later e apre son bann Manm pe debat en lot kalite Polisi.

E vwala mon pozisyon. So, pa *misinterpret* keksoz ki mwan mon'n dir e mon annan. Avek tou respe ki mon annan pou ou personn pa ti pou anmenn ou Mosyon, parey personn pa'n zanmen anpes ou anmenn okenn Mosyon ler ou ti dan sizyenm Lasanble.

Akoz sa i zis bann demagozi ki pe fer dimoun krwar en lot keksoz. Mersi Mr Speaker.

### **MR SPEAKER**

Mersi Onorab Pillay. Bon nou'n ariv ler pou nou vot lo Mosyon e mon a zis repas lo *wording* Mosyon Onorab William ki lir koumsa ;-

Prenon kont fitir devlopman sekter rezidansyel e lekspektasyon nasyonal lo size lakaz ek later, sa Lasanble i demann Gouvernman pou revwar son Polisi e stratezi lo kalite lakaz ki pe ganny konstri

e lo kriter alokasyon lakaz e kare later.

Manm ki an faver lev lanmen silvouple, mersi. Okenn Manm ki kont? En pti pe pasyans silvouple bann Manm les mon terminen. Bon lo Mosyon Onorab William ki mon fek lir, 23 Manm in vot pour, 0 kont e 10 abstansyon. Alor mon deklare ki Mosyon in aprouve par Lasanble. Mersi bokou.

Mon remersye bann Manm pou zot lentervansyon. Nou ava *adjourn* la e nou a rebran travay demen bomaten e demen bomaten nou annan 2 *Bills* lo *Order Paper* nou ou komans lo '*Unemployment ...* Les mon a ganny son tit byen. *Unemployment Relief Scheme (Repeal) Bill 2021*. Mersi. *Adjourn*.

### **(ADJOURNMENT)**

